


NSÒMBELU WEBÈ

MMUKUMBÀNYÌNE

ÈVÀNJEELÌYÒ ANYÌ?

 Twánjì tùshaalàayi biimànyine kuulu katancì kakesè cyanaàna, patùdi twinyika mitù mpindyewu bwà kweyemena Mukalenge apa. Piikalàku malòmbà à kumanyisha kùdi Nzambì, bu wêwè mwà kuswà elà ànu cyanza cyèbè muulu mpindyewu kùdiYe pa dîbà edi, nùнку ewu, nènku ùshaalè mulame mu mwoyi wèbè cyùdi ukeba aci.

² Taatù wetù wa mu Dyulu, tudi ne kusàkidila bwà ditùkù dikwàbò edi. Nènku mpindyewu ndyèdi dikaadi dibange kudisàkidila; nedìikalè bwalu bulonda. Masangisha à mu dindà emu akaadi mamane kupita. Mèyì adi mambiibwe akaadi mu mpeepèlè, pa mukàbà wa mèyì, ne netwikale ne cyà kutuutakeena naaWu dîngà ditùkù. Nebikèngelè kwikalaDì anyì dyà bushùwà anyì dyà mashimi. Kàdi twètù tudi—tudi twitabuuya ne Didi dyà bushùwà, bwalu Dìdi Dîyi Dyèbè.

³ Mpindyewu, tudi tulòmbà bwà Wèwè kutukumbajila, dilòlò edi, malòmbà atùdi tulòmbà aa. Ne byanza byètù, bitùdi beelè muulu ebi, tudi tufila malòmbà ètù. Wèwè ukaavwa mumanyè bitùvwà naabi dijinga, ne bitùdi tulòmbà. Pa nàнку tudi tulòmbà bwà Watwàndamunakù, Mukalenge, ne watùpakù cidì majinga à myoyi yètù, mbwena kwamba ne, piikalabi ne tudi mwà kukwàta naabi mudimu bwà kukutwa Wèwè mushinga. Enzaku nàнку, Mukalenge.

⁴ Ondopaku màsaamà adi munkacì mwètù. Umùshaaku mpèkaatù yònsò ne bupidyà bwònsò. Utupe Èbè. . . cyàkàbìdì citùpà cyà mabènesha Èbè, dilòlò edi, Mukalenge, patùdi twelangana meeji pa Dîyi apa, ne pa cikondo citùdi ne mwoyi eci. Tudi badisangishe, Taatù, kacìyi mu kiipàcila kakwàbò to ànu bwà kuteeta bwà kuyiila mùshindù wà kwikala ne nsòmbelu mutàmbe kulengela, ne bwà kwikala ne nsòmbelu wa mutàmbe kulamakanangana Neebè. Bwalu nyèwù tumòna ditùkù dyènda diseemena, ne twètù tudi ne cyà kwikala tudisangisha misangu yàbùngì, bwà kupeta dileeja dyà njila dyà kùdi Wèwè. Enzaku nàнку, Taatù, mu Dìna dyà Yesù. Amen.

Twasàkidilaayi. Nudi mwà kusòmbaayi.

⁵ Ndi mumanye ne kùdi luuyà lubì be, ne mwaba mwine ewu mùle tètè mudiwu emu. Nènku tudi tuumvwa bitùtacisha bwà patùdi katùyì ne. . . byamu bifidì byà citaleela. Nènku mèmè. . .

Pàmwăpa aci neciikale . . . Kùdi bintu bìbìdì bìndì njinga kwenza bwà èkèleeziyà, pândì ànu mpeta mpùngà wà kwalukila mu mùshindù wùndì muswè kwalukila awu, mêmè mwalukile mu masangisha mu mùshindù ùdì ùkèngediibwa. Ndi muswè ci—cisanji cyà pyàno, ciikale cisòmba mu mùshindù *ewu* awu, mu mùshindù wa ne mwimbi wa cisanji cyà pyàno iikale mutàngile kùdi disangisha. Ndi muswè cisanji cyà orgue lwà ku *elu* luseke; ne cyamu cifiđi cyà citaleela. Pa dîbà adi ndi ndyùmvwa ne nebyàkane nànkù. Ne pa nànkù tudi . . . Netwikalè mwà kweyemena Mukalenge, ne bamanyè ne Yèyè neàtùkumbajile cyôci aci.

⁶ Ngeela meeji, mbangambìle ne, Mwanèètù Hickerson mmufùme ku dyangata *eci* mu cikàndàkàndà mwàmwa. Ùvwa mucitèèke pa mèèsà àànyi à mudimu paanyimà pààpa. Ncisùmbù cyà Banjèlò cidi mu cikàndàkàndà civwà cyambiibwe aci. Nudi numòna mbùngàkeenu wa cipaapu cyà musàkà awu anyi? Tàngilàayi Ewu nùnkù ku *elu* luseke, dipwapwa disongòlòke, mwikalè ulwa ne cyàđi Cyèndè citàdika mùshindù *ewu*, ku dyàbalùme dyanyi. Ànu múmvwà mwambe mu cyambilu cimwècimwè eci, kukaadi ngondo ne ngondo ne ngondo, nwamònu's, s'ki Cyôci aci. Nènku cikàndàkàndà cyà *Look* . . . Anyi, cikàndàkàndà cyà *Life* ncidi ciCipàtule, no—nomba wa ngondo mwitànù, matùkù 17 à ngondo mwitànù, ngeela meeji mmwòmò. Ncyà bushùwà anyi? Matùkù 17 à ngondo mwitànù, nombà awu. Mandamu Wood ùvwa ùngambila leelù mene ewu ne bààbùngi mbamubiikile bamwela nkonko. Cidi mu nombà wa mu ngondo mwitànù, matùkù 17 à ngondo mwitànù.

⁷ Nditutu didi kadiyi dyùmvwika to. Ditutu adi didi kilòmèètà makumi ànaayi ne yibìdì mu butùmbùke ne kilòmèètà makumi ànaayi ne mwandamukùlù mu bucyàmà. Nènku's ki citùvwà twamba mwab'ewu aci. Ki kùvwà Mwanjèlò wa Mukalenge mupweke ne muzakaje mwaba awu. Ne cyònsò . . . Ncidilè ðiyi dikolè . . .

⁸ Ndi mumanyè ne kùdi muntu ùmwèpelè, piikalàbi ne . . . Ngeela meeji, Mwanèètù Sothmann, s'ngàmòmù katanci aka, mwaba kampànda. Ùdi apa. Yèyè ùvwa mwimane lwà . . . Èyo. Ànu lwà paanyimà *apa*. Ùvwa mwimane pabwîpi pàvwàci cenzèke. Ngeela meeji ne ncivwa kule menemenè nendè to. Mvwa ànu mumumòne, mêmè kuteeta bwà kumukùpa cyanza. Ànu, mvwa ne tulòndò twèndè atu. Aci, nya—nyama ayi, yitùvwà twenda tulemba ayi, yivwa ne . . . Kayivwa pa kakùnà aku to. Mpindyewu ki yôyi kuyayi pa kakùnà kakwàbò. Mvwa muyisangane, ditùkù kumpàla, ne mêmè kubàmbila kùvwà kùkèngela kuya. Mêmè kubànda lwà *apa*, mwaba wa ne, bu yôyi mwà kulwila eku, mvwa ànu mwà kutuuta cingoma muulu mu lupeepèlè bwà ne nyìpingàjè lwà kwàka, bwà bòbò kupetabo wabo—wabo—wabo nyama. Nènku, yivwa nngulube yà diitu.

⁹ Ki pa nànkù mêmè kusambuluka, *elu* luseke, kadi yôyi

kayìvwamù to. Kayìvwa ní ng'elu luseke ní ndwàlwa to. Mémè kumòna Mwanèètù Fred ùpàtukakù, kàdi kayìvwakù to. Kwalukilaye, ki Mwanèètù Norman kubàndayè pamutù pàà kakùnà apu. Ki mémè kukùdimuka, kupweka mu kaamùkidi kakesè kàdi kubànda, ànu mémè nkààyaanyi, mu ntàntà wa wipacila kilòmèètà yibidi ne citùpà wa ngènda mpicila mu citùpà kampànda cyà buloba cyà bikùnàkùnà byà mabwe byà dikèma. Nènku nkaavwa musòmbèle panshì mwikale ànu nkènzàkana. Dìbà òvwa dyènda dìbànda mundaamuanya amu.

Nènku mvwa mwikale ntuula tulumyana atu, tutùtù tubiikila kwàka ne, tukwàta-mbuji atu. Nkantu kafwànàngane ne ntambwe-dishinda. Mvwa munkaci mwà ditùtùla ku mukòlò wa mùpanù wànyi, ya mùshindù ànu ùmwèùmwè menemene ne yìmvwà mudimòne ntùula pàmvwà mwaba ewu nnwambila bwà cikèenà-kumòna apu, kùkaavwa bu, ngondo yisambòmbò nànkù, kumpàla kwà kwenzekaci. Mémè kwamba ne: “Ebu bwalu’s mbwà dikèma. Mòna mùndi nsanganyibwa ànu ku nord wa Tucson menemene, byenze bu pankaci pàà nord ne esètè. Bidi byenza . . .”

“Tucson,” nudi bavùlùke, mungààkambà, “kakesè pankaci pàà sud ne wesètè.”

Ki mémè kwamba ne: “Ebu bwalu’s mbwà dikèma.” Mvwa mutàngile ntambwe-dishinda ayi, mùshindù ewu, nyitùula ku wànyi. . . yìvwa yàbúngi, ku mikòlò yà mùpanu wànyi. Pawikalà kùyìku mwanji kukufika to, mmwaba wa cipèèlà. Kawèna bu ewu nùnkù to, nànsha kakesè. Mutàmbe kutòòka misangu mitwè ku makumi àbìdi kupìta muneemu; kàbìdi kamwèna micì ne bikwàbò bu mùdibi muneemu emu to. Mùdi ànu ntulu ne lusenga.

¹⁰ Ki mémè—mémè mwikale ànu nyitàngila, mùshindù ewu. Ki mémè kubàndulula ànu mèsù. Nènku mu ntàntà wa bu, ndi mufwànyine kwamba ne, mètres nkàmà mwandamukùlù ne mwaba wùmvwà awu, mémè kumòna mutù mujimà wà. . . cisumbù cijimà cyà ngulube yà diitu, midyàdije panshì, yipàtukila lwà mundekeelu, mùvwàyi yìdya mabeji à tuumici twà mafùke. Ki mémè kudyàmbidila ne: “Mpindyewu, ngìkalapù nànsha mwà kwambila Mwanèètù Fred ne Mwanèètù Norman bwà kuyabò kwine kwàka, s’ki mwaba ngwòwò wàwa nàka.”

¹¹ Kàdi dilòòlò òvwa didyànjlile, Nyumà Mwìmpè ùvwa neetu bilenga byà dikèma mu kampòonyi amu, mu mùshindù wa ne Ùvwa ùngambila bintu bìvwà byenzèke ne bìvwà munkaci mwà kwenzeka. Kukèngelabi bwà njuuke nye kule ne kampòonyi kàànyì aku.

Ki pashìshe, dindà dyà pàakacyàbu, mvwa mubànde kuntwaku. Ki mémè kubanga. . . Mémè ne: “Mpindyewu, bu mémè ne mùshindù wa kufikakù kùdi Mwanèètù Fred kwàka, s’nèmmwambilè ànyùnguluke mukùnà ewu,” ùdi bu mu ntàntà

wa—wa kilòmèètà umwe ne citùpà mu nùнку ewu. Bìwwa bikèngela bwà mèmè kuya bu—bu mu ntàntà wa kilòmèètà yisàtù ne ndambù anyì mipìte apu, kumwangata, pàmwápa mitwè ku yitaanu. Kupingana mu nùнку ewu, kwìnshì kwà eci, citùdì tubiikila ne “kakùna kàà bikùnàkùna” aka, kulwa mubànde nùнку ewu, kuulu kwà mikùna yà bikùnàkùna byà mabwe, misongòlòke eyi, ne kupwekela lubilu eku, kukòsolola kàdi kulwa luseke lukwàbò, kàdi kupweka kuya mutàngile mu nùнку ewu ne kumwangata. Nèнку bìwwa bikèngela kuyayè too ne kwìnshì kwà kakùna aku, kuya kangata Mwanèètù Norman, uvwa mwikale mu ntàntà pàmwápa wa kilòmèètà yisambòmbò ne citùpà anyì mwandamukùlù, pashìishe kwalukila. Nèнку mvwa nkèba kutèeka ka—kapesè kakesè kàà dibeji dyà mushwàla wà Kleenex kàmvwà mwà kulembelejila ku kapesè kàà—kàà dibeji dyà mucì wa cingweja kwine aku, bwà mèmè kumòna ne nku lusongo kaayi lwà kakùna kwà kupàtùkila pàmvwà mwà kwalukila.

¹² Ki mèmè kubàndila ànu kuulu kwà kakùna kakesè kùdì mabwe masongòlòke àbùngì, ne kùdì mu—mupwa wà nyama yà tushà mupwekèle ku luseke lukwàbò alu, bu mu ntàntà wa, kaa, mètres makumi àsàtù ne mwandamutekète, anyì makumi ànaayi ne àsamnbòmbò kwìnshì kwà mabwe matùmbùke aku. Cìwwa bu, kaa, dìbà dikaavwa dibàndakù, twámbe ne mpa dìbà mwandamukùlù jaajaaja, anyì dìbà citèemà. Udiku mufwànyine kudicinkila cintu cyà mùshindù awu anyì, Mwanèètù Fred, pàmwápa pa dìbà citèemà jaajaaja, cintu kampànda’s? Mèmè kunyeemena lwà kuulu aku elu luseke, lùkàsàlùkàsà, bwà ngulube ya diitu ayi kayilù kumòna to. Yòyi yitu ngulube mìlùme ya cisuku, nudi bamanyè’s, kàbidì yìtu ne bwòwà bwà dikèma.

¹³ Ki mèmè—mèmè kubàndila pa kakùna apu mu nùнку ewu, kukosa, kwasa lwendu, kubànda kakùna aku lubilu. Ki mèmè kuya ànu ngènda nyeemena kumpengampenga aku, mu mùshindù mukèsè, utùyakubiikila ne, museesu wà kabwà. Ki dyàkàmwè, citùpà cyònsò cyà buloba aci kudilaci’s. Kacya ncìvwaku mwanji kuumvwa dikùbàkùbà dyà dikwàcisha bwòwà bu nàнку to! Mwaba awu kuzakala, mabwe kutùuke ènda àbùnguluka. Ki mèmè kudyùmvwa ànu bu ne mvwa—mvwa ne cyà kwikala mutùpike muyè muulu mu butùmbùke bwà mètre umwe ne citùpà kuulu kwà buloba, mùvwàbi bimwèke’s. Cyòci kàdi—kàdi kumpà bwòwà. Mèmè kudyàmbidila ne: “Kaa, ekèlekèle!” Mèmè kudyàmbidila ne bàvwà bangaase cingoma. Ne muntu kampànda. . . Mvwa mwase cifulu cifiike. Mèmè kudyàmbidila ne bàvwà ne cyà kwikala beele meeji ne cìwwa nngulube wa diitu wènda unyeema ùbànda mukùna, muntu mungaase cingoma. Cìwwa cyenze mutooyi mukolè wà dikèma, ànu pàmvwà apu, mùshindù awu. Pashìishe, dyàkàmwè, Cintu kampànda kwamba ne: “Bandisha mèsù.” Ki Cyòci

cyàcyà's. Pashiishe Kungambila Yè ne: "Ndikangula dyà Bitampi Mwandamutekète abi. Alukila kumbèlu." Pa nàнку, ke mémè kwalùkila's.

¹⁴ Mémè kutuutakeena ne Mwanèètù Fred ne Mwanèètù Norman, paanyimà pàà bu dîbà dijimà nàнку awu, pângààkalwà kubàpeta. Bàvwa basalùke bààkula bwà cyôci aci. Ki cyôci cyàcyà. Ne maalu à mamanya adi àmba ne kabyènakù mwà kwenzeka to bwà—bwà di—difwima nànsha dyà mùshindù kaayi anyì ní ncinyì cyônsò kubàndaci mu bwàbwa butùmbùke, dibungi, dibungi dyà màyi. Nwamònu anyì? Neciye ànu... Ncyèna mufwànyine kumanya to. Ndi—ndi...

¹⁵ Twètù, patùtù tuya dyàmwàmwa dyà mbù, tutu tubùuka ne ndèkè mu butùmbùke bwà mètres binunu bibìdi nkàmà mwandamutekète ne makumi àtaanu. Aku nkuulu kwà mvula yà bipupu. Aci cyôci cìdi ntàntà wa wìpacila kilòmèètà yisambòmbò ne citùpà. Nènku twàmbè, twàmbè ne, pàmwàpa mmu kilòmèètà makumi àbìdi ne yìnaayi mùdi kamùyì mùshindù wà kupeta kàbìdi dibungi dyà màyi to. Kàdi eci mmu kilòmèètà makumi ànaayi ne yìbìdi, ne kushààlaci cilembèlele mwaba awu ditùkù dijimà. Nwamònu anyì? Bòbò kî mbamanyè ne Cyôci aci ncinganyi to. Kàdi, twasàkidila kùdi Mukalenge's we, twètù tudi bamanyè.

Twasàkidila, Mwanèètù Hickerson. Nèncilamè pa bìrò byànyì muntu mwàmwa. Ne patwàfùndà mukàndà awu, mòna's, dîbà adi netwikalè mwà kucyangata.

¹⁶ Ndi ne kabèji kakesè kafùnda mwab'ewu kàdibo bampe. Ngeela meeji ne nkwenzèke divulangana dyà bantu munkaci mwètù kubangila pàmvwà mwab'ewu musangu mushààle. Ngeela meeji ne dîna dyendè ùdi—ùdi... dîna dyà tatwèndè, dyòdi, n'David West. Nènku bàdi ne mwànà mukèsè mwab'ewu udibò baswè kulàmbula kùdi Mukalenge. Mmwómò anyì? Cìvwa dilòòlò edi, anyì cìvwa ndilòòlò dyà mu diisàtù? Ncyèna mumanyè to. Ùdi ne... Dilòòlò edi? Mbîmpè. Èè, kàdi bishi bwà... Wèwè's udi David, kî mmwómò anyì? Kì cìmvwà ndyàm̀bidila ne ki dîna dyèbè. Èyo. Nudi mwà kubànda kuneeku ne mwànà mukèsè awu?

Bu mwanèètù wa bakàji mwà kulwaku kuneeku ku cisanji cyà pyàno eku, bwà kutwìmbilakù musambu wà ne *Bwelàayi Naabò Muneemu* awu. Mpaasàtà, bu yèyè mwà kuswà, àbandè kuneeku, nènku netùlambulè mwànà mukèsè wa balùme ewu kùdi Mukalenge. Mpindyewu, tudi tukeba bwà kulama bwalu ebu bilondèshìlàngàne ne Mifùndu.

¹⁷ Ewu mmwikùlwèbè, Mwanèètù West. Mbyenze ànu bu ne kabyèna mwà kwenzeka to, s'mmwómò's? Mwanèètù wa bakàji West, udi wela pèèbè meeji bishi bwà ciine aci? Kabyènakù... Kadi, udi mumanyè cìndi ndyàm̀bidila anyì? Udi mumanyè's, s'ndi kaaku, mémè pàanyi.

Cidi cìmvùlwija Mwanèètù Demos Shakarian. Ùvwa mwimane kumpàla kwà musùmbà munène wà bantu. Ùtu pèndè maalu ònsò amubwelakana ànu bu mèmè kùnu, nudi bamanyè's. Ùvwa mwimàne mwàba awu. Kwambaye ne: "Udi mumanyè's," wàmba ne, "ndi—ndi mwambile Rose ne, ndi mudyùmvwè," mmukàjèndè awu, wàmba ne, "ndi mudyùmvwè mutàmbe kukùlakaja kacya ngaashààla kaakù mukàjì." Yèyè ne: "To. Mvwa nswa kwamba ne, kaakù mulùm- . . ." Nudi bamanyè's, mèmè . . .

¹⁸ Kwèna nkààyeèbè to, Mwanèètù West. Badimu búngì cyanààna mwab'ewu. Ne bìdi ànu bímpè. Ngeela meeji ne twètù tudi bulelèlà mwà kwanyisha biikùlù bèètù. Eci kacýèna. . . Ndi ntèkemena ne eci kacýèna cyùmvwika cibi to. Kàdi tudi mwà kupìcisha naabò dîbà dyàbùngì, ngeela meeji, kupita mutwàkapìcisha ne bèètù—bèètù bânà. Mvwa mukonke mukàjàànyì ciine aci, dîngà ditùkù. Yèyè kwamba ne: "Cyà bushùwà. Udi ubananga bwà katancì kakesè, ubàpingaja kùdi mamwàbò, nènku utùngunuka."

¹⁹ Èè, mèmè's ndi ne kiikùlù kàànyì kàà balùme lwà paanyimà pààpa. Kàvwa kàmba ne: "Papa, yisha. Papa, yisha." Nènku bavwa basangìshe mulàmbù mu dilòòlò dyà dyàlumingu dishààle, ki kulwabo kuwùshiyabò mutèèka pa mèèsà. Kubwelabò nendè, paanyimà pààpa, ki—ki kungumvwaye ngàakula ku cikòlòkolo. Yèyè ne: "Papa, yisha. Papa, yisha."

Ki Billy kwambaye ne: "Èyo, *kwaka* nàka."

Yèyè ne: "To." Ki milàmbù kwicikilayi pànshì pònsò apu. Yèyè—yèyè ùvwa ùkèba kupàtuka kulwa apa, nudi bamanyè's. Kàdi ùtu ànu misangu yònsò ungeela ànu mbila, nudi bamanyè's, pàdiye ùmmòna nì mmu mpungilu kaayi yònsò. Ùdi wela lubila ne: "Papa, yisha." Wela mbila mikolè. Pa nànkù ndi mumanyè ne bóbò bàtu balenga kumòna be.

Ambaayi tǔng, ndi ndikonka ne ndikù mufwànyìne kusomba ndambù wa nsukì ayi anyì? Yèyè kèna naayi dijinga mpindyewu ewu to. Mèmè ngudi naayi dijinga. Dyèndè nganyì? [Mwanèètù wa bakàjì West ùdi wàmba ne: "David Jonathan."—Muf.] David Jonathan. Adi kí ndìnà dilenga anyì? Èè, ndi ntèkemena ne nsòmbelu wèndè neáfwanànganè ne wa beena mènà àdiye mwangàte awu abu. Davidì, mfùmù, Davidì; udi, Kilistò ùdi ne cyà kusòmba pa nkwasa wèndè wa butùmbi; ne Jonathan kàbìdì, mulunda munanga. Ndi—ndi nnwambila ne, mbaanyaana bananga bàà twànàtwànà pàdìbo apa. Tudi tubanyisha, bikolè menemene. Mèmè . . . Yèyè ùdi utàbuluka. Kàbìdì ùdi mwà—ùdi mwà kutwà "amen" wa cikunda ànu mùdi bakwàbò bònsò mwà kutwà amu, nudi bamanyè's, pa nànkù katwèna ànu tulekela bitùtacisha to. Twètù tudi tumulàmbula kùdi Mukalenge.

Ndi ngeela meeji ne mbyà kalolo menemene, bwà kwikala ne babàkà bàà twànàtwànà, bàdì Nzambì mutèèkele bukùbi

bwà mwânà mukesè bu ewu, ne biikale bàlwa bwà kumufila kùdi Mukalenge. Nènku panùdi nwenza nànkù, bìdi bìleeja ne kanwèna. . . ne nudi nupingajila Nzambì cìdi Nzambì munùpe. Nzambì àmubènèshè.

Mpindyewu, paùdi muswè kumwambula, ngeela meeji ne pàmwàpa maamù ngudi mufwànyine kumwambula bimpè ndambù kumpita mémè. Kàdi bishi bu twètù ànu mwà kumutentekela byanza cyanààna? Mbitàmbe bwimpè nànkù anyi? Bwalu, mémè ndi nciina ne nkwèpi kwàlwaye kumbàfuka, anyi kàyì ùmbafuka to, kumucibula anyi cintu kampànda cikwàbò, nudi bamanyè's. Nènku mémè ntu ànu misangu yònsò nciina bwà kubàcibula, nudi bamanyè's. Wanyi—wanyì. . .

Meda ùvwa wàmba, paanyimà pàapa. . .Ngeela meeji ne ewu mmudimu wà pa cibùmbà cyà ku cyambilu eku útuye ungumvwila mukawu, nudi bamanyè's. Yèyè ùtu muswè kwambula. . .

Èè, tàngila kuneeku, ùdi ùkèba kuntàngila. Mmwànà mwimpè. Èyowà's, mukalenge. Pàmwàpa ndi mufwànyine kumwambula. Ndi ndikonka's. Kaa, mwanèètù wa bakàji, kwikadi. . .Ndi ntèkemena ne kàakupòna to. Mònaaku, kì mmulenga kumòna anyi? Kì mmulenga kumòna anyi? Wetwàwu? Èè, mpindyewu, munanga wanyi.

Twinyikàayi mitù yètù.

Mukalenge Yesù, kukaadi bidimu byàbùngì, pàakalediibwà bwena Kilistò mu mmwènekèlu wa Muntu ùbìikidiibwa ne n'Kilistò, Maasiyà moolaaba awu, Dìna Dyèndè ùvwa Yesù. Bantu bààkaMutwadila bânà bààbò batekète balela, bwà Yèyè kubàtentekela byanza Byèndè ne kubàbènesha. Ki Yèyè kwamba ne: “Lekèlaayi bânà bakesè bàlwe Kùndi, ne kanùbàkandiki to, bwalu bàà bu bòbò aba ki beena Bukalenge bwà mu Dyulu.” Babàka bàbìdi balenga aba, baakakwàbò ne bòbò bàtu bayiidi balelèlà bàà Dìyì.

Mukalenge Yesù, nyèwù nKutwàdila, mwambule, dilòlò edi, mpaasàta ne mémè, David Jonathan West mukesè mulenga kumòna ewu. Ndi mmufila Kùdi, mmumusha kùdi mamwèndè ne tatwèndè. Ndi mmulambula kùdi Wèwè, Mukalenge, bwà bukòlè bwà mubidi, dikàndà, mwoyi wà matùkù àbùngì mu mudimu, bwà kutwà Nzambì wa Bukòlè bwònsò musinga, Yèyè udi mumufikishe pa buloba ebu. Swàku bwà mabènesha à Nzambì àshaalè pambidi pèndè. Swàku bwà Nyumà Mwimpè àshaalè pambidi pàà mwànà ewu. Pìikalàbi ne maalabà ùdikù, swàku bwà yèyè kwambula Èvànjeeliyò udi baledi bèndè ne baakakwèndè banange bàmba kufwà leelù ewu ewu. Enzaku nànkù, Mukalenge. Mpindyewu, mu Dìna dyà Yesù Kilistò, nyèwù Nkupà mwànà ewu, bwà dilàmbula dyà nsömbelu wèndè. Amen.

Ngeela meeji ne bàdi bajinga kukwàta mwânà mukesè ewu fòtò. [Cyamù cyà fòtò cidi cidila cyak—Muf.] S'ngázawùkù's, mémè pàànyì.

Nzambi àkubènèshè, mwanèètù wa bakàjì. Swàku unange ne wèngelekè Mukalenge Yesù bwà kashidi, nènku mwânà mukesè ewu àkoleshìibwe mu mibelu yà Nzambì, ne wikale ne mwânà mukesè wa balùme mulenga. Mémè ndi mutwishìibwe. Nzambi ikalè neenù.

Ngeela meeji ne yèyè wàpòneshi kandundu kèndè kakesè kàa dyamwa? Bākàpecì anyì? Kaa, ekèlekèlè!

Mpindyewu twìmbààyi kaamusambu kakesè aku kàa ne, *Bwelààyi Naabò Mùneemu* aku. Bantu bônso, cyàpàmwè mpindyewu, bwà mwânà mukesè ewu. Èyo, mwanèètù wa bakàjì.

Bwelààyi naabò muneemu, bwelààyi naabò
muneemu,

Lwàyi ne bânà bakesè kùdi Yesù.

²⁰ Ncyèna mumanye byanza bìdi bitàmbe bwìmpè byà kubatèèkamù to. Nudi nwènù babìmanyè anyì? Byanza byà Mukalenge Yesù!

²¹ Mpindyewu, ndi mumanyè ne kùdi luuya lukolè muntwamu. Ndi muswè kwambila mulami wa mankendà, mwakunyaànyì wa balùme, Doc, anyì mukwàbò, bwà batàngile bwalu abu. Bàmwè bàà ku bânà beètù bàà bakàjì bàdi banyanga jipè yàbò ne—ne màfutà àdi pa nkwasa. Mbanganyì bàdi bayìnyange ne màfutà awu? Ndi mumanyè, kùdi mukàjàànyì, bânà bàànyì bàà bakàjì bàbìdì, Betty Collins mwânà, Mandamu Beeler, ne bàmwè bàà kùdìbo. Ncintu kampànda, màfutà pa myaba ayi. Bu wèwè mwà kutàpakù dísù mwaba awu, Doc, pawàpetà mùshindù. Cìdi, ngeela meeji, cidi mwaba ùdìbo. . . Mmàfutà anyì mmùkubù, anyì cintu kampànda, ànu menemene mwaba ùdìbo benzela mudimu bàbànda bapweka awu, nkwasa ayi. Nènku kí mmwòmò anyì? [Mwanèètù Edgar “Doc” Branham ùdi wàmba ne: “Kapèèna màfutà to, àà kukùpula.”—Muf.] Èè, ncyèna—ncyèna mumanyè ne ncinyì to, pa nàuku. Cintu kampànda cìndi mfùma ku. . . Ncyangàmbidìbo, ki mémè kwamba ne nè—nèncyàmbilè Doc. Èyo.

Mpindyewu, disangisha dyà milòmbò mu diisàtù dilòòlò. Kùdi bukwàbò bwalu anyì? Nukààdi bamanyìshe anyì? Nukààdi bamàne kufila mamanyìsha ènù anyì, Mwanèètù Neville? Mamanyìsha wònsò àkaadi mafidìibwe.

²² Mpindyewu, bu Nzambì mwà kwanyìsha, mu dyàlumingu dilwalwà edi mu dindà, ndi muswe kwakula pa cyena bwalu cyà difùnda dyà lukòngò elu ku cilumbu bwà dipoopela dyàlù dyà Kilistò pa nkùrusè. Wèwè udi wamba ne: “Kí ng’elu lukòngò lùdi lufwànyìne kwikala lwenze aci to.” Netùjandule ne mbacyènzè, anyì kí mbacyènzè, bilondèshile Dìyi. Mpindyewu,

mu dyàlumingu dilwalwà edi mu dindà, bu Mukalenge mwà kwanyisha. Bu ne, mpindyewu, bu—bu—bu cintu kampànda mwà kwenzeka . . .

²³ Ndi ne cyà kwikala mu Houston lumingu elu, kàbìdì, mu mpungilu kampànda, wikalà mwà kungangata too ne ku dyàlumingu, pa nàнку ncyèna mumanyè ne ngàpeta mùshindù anyì ncyàkupeta. Kàdi tudi ne maadyàlumingu makwàbò àbìdì atùdì mwà kutèekela meeji, kumpàla kwà dyòdì adi, nànsha bìshi. Pashìishe tuyààya ku Chicago bwà mpungilu awu, anyì bwà disangisha mu Chicago, lumingu lwà ndekeelu lwà ngondo ewu. Ne pashìishe nebìnkèngèlè kupingaja fàmiyè ku Arizona, bwalu—bwalu diikisha dyàbò dyàjiki ne bânà bàdi ne cyà kwalukila mu tulaasà.

²⁴ Mpindyewu, mbanganyi bàdi basànke bwà kubala kwà Dìyì, ne bwà mabènesha à Mukalenge? Twètù bônso, bikolè be.

²⁵ Mpindyewu, kùdi luuya lukolè be, ne ndi mumanyè ne bàmwè bàà kunùdì nebàalukile ku màabò dilòlò edi. Ndi mumanyè ne Mwanèètù Rodney ne Charlie, ne bakwàbò, bàdi ne cyà kwendesha màshinyì ntàntà mule. Kàdi anji indilaayi kakesè tũng, s'nudi mu diikisha, kî mmwômò anyì? Èè, ndi ngùmvwà bàmba ne nuyààya ku diloba.

“Mukalenge kàtu ùbadila muntu cikondo pàdiye munkaci mwà kuloba to. Kwèna ukulakajaku to paùdì uloba apu.” Pa nàнку, mpindyewu, nwènù bânà bàà bakàji nwàyaayi kabàfila. Nwamònu anyì? Ne mèmè mwine nèndwe kudisanga kunùdì aku, mèmè mupete mùshindù. Kàbìdì nudi bamanyè ne: “Mukalenge mwìmpè,” mùtùbo bàmba’s, “kàtu ùbadila muntu cikondo pàdiye muyè ku diloba to.” Nulòbè byàbũngì díbà dinùdì—díbà dinùdì nudyùmvwa maalu manùjìngàkaje. Ki cintu citàmbe bwìmpè bwà kwololokelaku, cínkaadiku mèmè musangane mu wanyì nsòmbelu, nkuya ku dilòba.

²⁶ Ngàkapeta karta kakesè, mũngà musangu, kaa kùdì Mukalenge Troutman. Kùdikù muntu muvùlùke Mukalenge Troutman, mwena cyàpu cyà dyenza dyà mabwe à mashika mu New Albany awu anyì? Ùvwa ne karta kakesè kuntwaku, kafundapu ne: “Muyè ku dilòba.” Nènku katũngùnùke, kàmba ne: “Muntu udi ne. . . Muntu yònsò, bânà bàabò bàà balùme, bayè ku dilòba. Ne cyanza cyambulwishi neikalè misangu yònsò ànu ne cyà kucyolola, pàdiye muyè ku dilòba.” Kàvwa ne maalu bu mwandamukùlù anyì dikumi nàнку awu mashìlèshìlàngàne. Kàdi kwìnshi ku ndekeelu aku, kwambaye ne: “Muntu ùdì utàmba kwikala museemène pabwìpì ne Nzambì pàdiye muyè ku dilòba.” Nènku ndi ngeela meeji ne aci nciswè kwikala bu cyà bushùwà. “Babanji ne bapèlè bàdi bônso mwomùmwe, pàdìbo bayè ku dilòba.” Nwamònu anyì? “Cyanza cyambulwishi neikale misangu yònsò ànu ne cyà kucyòlòla,

pàdiye muyè ku dilòba.” Ne byònsò bìvwa ànu pa ne: “Muyè ku dilòba.”

²⁷ Èè, mémè nénwámбилè dilòba dikwàbò dîndi ngenza kùkaadi bidimu bu makumi àsàtù ne bisàtù bìdì bipite ebi, ndi mumònangane ànu ne dilòba dyà misùùkà yà bantu. Mukalenge àswekù àtùkwàcìshè bwà twètù kupeta wònsò utwikalà ne mùshindù wà kupeta awu.

²⁸ Mpindyewu, dilòòlò edi, eci bàdì bàcìkwàta pa mikàbà yà mèyi. Mpindyewu, mu dîndà emu, (Jim yèyè mwikale apa, anyi ùkwàta pa mikàbà yà mèyi), ndi—ndi ngeela meeji, pa mukàbà wà mèyi, muntu mukwàbò kukòkayè ntèmà yàànyì kwòkò aku, mvwa mwambe ne: “Cimwangi ciibìdì.” Ncìvwa ne meeji à kwamba *ciibìdì* to. Cìdì: “Cimwangi ciisàtù.”

Nyumà Mwîmpè mu mmwènekèlu wa Dikunji dyà Kapyà, Nzambì upweka mu dimwènèshiiibwa, wàkatwàla cimwangi cyà kumpàla, ne—ne mwàmwa mu... wàkapàtula Izalèèlà mu Ejiipitù.

Cimwangi ciibìdì cìvwa n’Kilistò ùpàtula Èkèleeziyà mu cyena Yudà.

Nènkù, *Cimwangi Ciisàtù*, mpàdì Dikunji dyà Kapyà dimwèdimwè adi dipàtula Mukàjì—musèla mu èkèleeziyà. Nwamònu anyi? Kupàtula mu cyà mubidi; kupàtula mu cyà nyumà; ne cyà Nyumà cipàtuka mu cyà nyumà. Bisàtù abi, nudi numòna’s, cyà Nyumà cipàtuka mu èkèleeziyà, nànkù’s wè. Dìbà adi tudi tupeta bisàtù abi, bikondo byàci bisàtù.

²⁹ Mpindyewu, dilòòlò edi, mvwa muswè kwenza mukàbà mukwàbò wà mèyi, ùvwà ubiikidiibwa ne: *Nsòmbelu Webè Mmukùmbànyine Èvànjeeliyò Anyi?* Pàmwàpa kì ncifwànyine kwangata mukùngùlù mutàmbe bule to. Èè, ànu ndambù wa Mifundu ne tuntu tufunda tündì naatu mwab’ewu, kàdì kumpàla tudi baswè kubala Dìyi dyà Nzambì. Kumpàla kwà twètù kwenza aci, tudi twinyika cyanààna myoyi yetù kumpàla Kwèndè katanci kakesè.

³⁰ Mukalenge Yesù, muntu mulùme kanà yònsò ewu, mu mubidi emu, anyi mukàjì, anyi mwànà, udi mwà kusaka mabèji à Bible ewu paanyimà, kàdì kakwèna nànsha umwe udi mwà kuWùbuulula to pa kuumusha Wèwè. Ndi ndòmba, Mukalenge, bwà wàngatè cyena-bwalu eci mùdici citèèkiibwe pa mwoyi wanyi ewu emu bwà kucitùma mu matùnga ònsò, bwà bantu, bwà bòbò kumanya ne nnsòmbelu wa mùshindù kaayi udi mulòmbiibwe bwà kwikalabò nendè. Bwalu, bààbùngì bàkaadi bangeelèèlè nkonko eyi ne: “Mwine Nsòmbelu wa bwena Kilistò ewu nnsòmbelu wa kukwacila èkèleeziyà mudimu anyi? Nkukwacisha kwà bapèlè, bàdì mu lukengelu lwà bintu anyi? Anyi ncidimba cyà kashèndèndè? Ndulamatu lwà menemene kùdì èkèleeziyà anyi?” ne nkonko yà mùshindù awu. Taatù, swàku bwà dyandamuna dijaalàme dilwe dilòòlò edi, ku mèyi

aa, patùdi tudyenzeja bwà—bwà kuàtwàdila bantu apa. Mu Dìna dyà Yesù Kilstò, mmutùdi tulòmba nùnkù. Amen.

³¹ Mpindyewu buulùlaayi mu Bibles yènu, mu Mukàndà wà Luuka Munsantu, nènku netùbangile ku nshapitá wa 14 ku mvensa wa 16, bwà kubala Mufùndu kampànda bu ntaku, bwà mwaba wa kushindamijila bitùdi twamba, bwà eci citùdi tukeba bwà kukosela tusunsa etu tutwè ku makumi àsàtù anyì makumi ànaayi. Mpindyewu, mvensà wa 16 wa nshapitá wa 14 wa Luuka Munsantu.

Pashùshe yéyè wàkamwambila ne: Muntu kampànda wàkenza didyà dinène dyà dilòlò, ne wàkabìikila bantu bàábùngì,

Ne wàkatùma basadidi bèndè pa díbà dyà didyà dyà dilòlò bwà kwambilabo bàvwà babìikidìibwe abu ne: Lwàyaaku; bwalu—bwalu bintu byònsò mbilongolola mpindyewu.

Kàdi bónsò ne díyì òmwè bàakabanga kufila tubingilá. Wa kumpàla wàkamwambila ne: Ndi. . . musùmbe citùpà cyà buloba, ne ndi ne cyà kwikala ne dijinga dyà kuya kacimòna: ndi nkuòmba bwà umfwileku luse.

Ne mukwàbò wàkamba ne: Ndi musùmbe ngombe yà bikòkedi bitaanu, nènku nyààya bwà kuyiteeta: ndi nkuòmba bwà umfwileku luse.

. . . mukwàbò wàkamba ne: Ndi musèlèleku mukàjì, . . . ki bwà cinyì ncyèna mwà kulwa to.

Pa nànkù musadidi awu wàkalwa, ne wàkaleeja mukalenge wendè bintu byònsò ebi. Nènku mfùmù wa nzùbu awu mwikale ne ciiji wàkambila musadidi wendè, . . .

Mònaayi ne, kî mbasadidi to. “Musadidi.”

. . . Patuka lùkàsà ubwele mu mìsèèsù ne mu kajila, ne mu bimenga, nènku ùbwejè mwaba ewu bapèlè, ne balèma, ne bilèmèndà, ne bampofò.

Nènku musadidi wàkamba ne: Mukalenge, byènjùbù mùdì mutùme díyì amu, kàdi kùcìdì ànu myaba.

. . . mukalenge wàkambila musadidi ne: Pátuka ùbwele mu bibeeba ne mu mpangu, ùbènzèjè ku bukolè bwà kubwelabò, bwà nzùbu wanyì ikale mùle tètè.

Bwalu ndi nkwambila ne: Nànsha umwe wa ku bantu bàvwà babìikidìibwe abu kàakulabula ku didyà dyànyì dyà dilòlò nànsha.

³² Mpindyewu, nwamònu ne, kùvwa nkokelu yisàtù, anyì bipungu bisàtù, byà cyòci aci anyì? Pàakapàtukàbo, musangu wà kumpàla, ne kubìikilabò aba bàvwà, anyì, bàvwà babìikidìibwe

bwà kulwa, kàdi kabàyi balwè to. Pa nàнку kupàtùkakù kàmpanyè kàà dyondopa, kupàtùka bwà kwangata bampofò ne bilèmèndà. Kàdi kùcìvwa ànu myaba, ki kupàtùkaye kwenzeja bantu bimpè, babì, ne bàvwà kabàyi bacyùka maalu; bìvwa bikèngela bwà kubwelabò.

³³ Mpindyewu, nudi nubala lusumwinu lukwàbò lwà bwalu ebu, cintu kampànda cifwànàngane ne eci, mu Maatàayi 22.1 too ne ku 10, panwàswa kucibala, pashiishe. Kàdi ndi—ndi mupàtùlemù cyena-bwalu eci cyà ne: *Nsòmbelu Webè Mmukumbànyine Èvànjeeliyò Anyi?*

³⁴ Mpindyewu, mwaba ewu Yesù ùdi wàmba...Muntu ùtu misangu yònsò ànu ùkeba kufila tubingilà, bwà kubènga kwakidila Dìyi dya dibìikila dya Nzambi. Nànsha dyòdi dijaadikiibwe bikolè kùdiye, bwà ne cidi—bwà ne n'Didyà Dyèndè dya dilòòlò ne ndibìikila Dyèndè, kàdi muntu ùdi misangu yònsò ànu ufila tubingilà. Nènku nwènù babale Maatàayi Munsantu 22, nenùsangane ne muntwamu kàbìdi, tubingilà ntufidiibwe. Nènku—nènku bàdi bàkèba...

³⁵ Cyàkaalukila mu bikondo byònsò. Cyàkaalukila ne mu cikondo aci, bàmba ne muntu kampànda wàkabàbìikila, ne—ne ùvwa ne budimi bwà mvinyò. Nènku tudi tusangana lusumwinu alu. Ne mwàkatùmàye basadidi bèndè bwà kusangishabò byà mu budimi bwà mvinyò abu. Musadidi wa kumpàla kulwayè, bààkenza cinyi? Bààkamwipata. Musadidi wàkalonda kulwayè, kumwasabò pèndè mabwe. Ki kwipatabò musadidi ne musadidi yònsò; bantu beena lwonji abu. Mfùmù kutùmàyè, ndekeelu wa byònsò, mwanèndè wa balùme. Kàdi pààkalwà mwanèndè ewu, tudi tusangana, ne: “Bààkamba ne: ‘Ki mupyanyi nyèye ewu. Netùmushipe, pashiishe twàngatè bintu byònsò.’” Ki Yesù kubàmbila ne: “Mfùmù kutùmàyè bantu e kushipabò bashipyanganyi abu, ne kwoshabo bimenga byàbò.”

³⁶ Mpindyewu, tudi tumòna ne, pàdi Nzambi upèèsha muntu dibìikila, ne bwà kwenzayè cintu kampànda, anyi bwà kwakidilaye dibìikila didiYe mumupèèshe adi, kàdi yèyè ewu ùdibenga, dîbà adi kakwèna cintu nànsha cìmwè cìdi cishààle to, paanyimà pàà luse lumane kubèngiibwa ku maditambishi, ànu cilumbulwidi. Paùdi usambuka mikàlù yà luse, dîbà adi kùkaadi kushààle cintu ànu cìmwèpelè, ne aci ncilumbulwidi. Nènku tudi tusangana ne muntu mmwenze cyòci aci mu bikondo byònsò. Ncyenzèkènzeke, pabwìpi ne cikondo cyònsò, mu Bible.

³⁷ Pààkatùmà Nzambi Noà, musadidi Wendè awu, ne kusebelaye njila wa dipàndukila bwà bantu bònsò bàvwà baswè bwà ku—kusùngidiibwa abu. Kàdi bantu bààkaseka ne bààkeeluwila Noà. Kàdi Nzambi wàkasebela njila, kàdi bòbò bààkafila kabingilà. Kacivwa bilondèshile ngeelèlù wabò—wabò wa meeji wa cyena leelù awu to. Kacivwa...Kacivwa mùshindù

ùvwàbo bôbò baciswe to, nènku bààkafila tubingilà mu matùkù à Noà.

³⁸ Bààkafila tubingilà mu matùkù à Mòsà. Bààkafila tubingilà mu matùkù à Eliyà. Bààkafila tubingilà mu matùkù à Kilstò. Ne nyèwù bafila tubingilà leelù ewu.

³⁹ Mpindyewu, Yèyè mwikale wàkula buludi ne Izàlèèlà, biine bàvwà babìikidìibwe ku difestò abu, cìndi mufwànyine kwamba leelù ewu bwà bantu, èkéleeziyà, udi mubikidìibwe bwà kulwa ku difestò, kàdi kàyì muswè kulwa to, difestò dyà nyumà dyà Mukalenge. Kàdi kabàyi baswè kucyènza to. Kì mbaswè kucyènza to. Bàdi ne bìngà bintu byà dyaenza. Bàdi bapeta tubingilà.

⁴⁰ Mpindyewu, Izàlèèlà, kùkaadi bidimu binunu bìbìdi, bu ne bààkiitaba dibìikila dyàkabàpàbo adi, nùнку kabèèna mùdìbo leelù ewu emu to. Kùkaadi bidimu binunu bìbìdi, Izàlèèlà wàkabènga dibìikila dyà kulwa ku didyà dyà dibanjì, ne bààkadibènga kàdi kubwelabò mu cilumbulwidi. Kàdi, bu mwàkambà Yesù, bààkasa bapròfetà mabwe ne kushipa bònsò bààkabàtùminàbo abu, mu difila dyà tubingilà, mpindyewu, tubingilà twàkafilàbo mu ditùkù dyònsò.

⁴¹ Tudi tusangana ne, mu matùkù à Yesù, Yèyè—Yèyè kààkaswikàkanakù nànsha ne umwe wa kùdìbo to. Bààkamba ne: “Ewu Muntu mmupetè edi dilonga díbà kaayi? Mmu cilongelu kaayi mùdiYe mupàtùkile? Ewu kì m’Mwàna wa mwenji wa mabaya awu anyi? Mamwèndè dìnà dyèndè kì m’Màriyà anyi? Bânà bààbò bàà balùme, kì n’Josè ne Yakòbò, ne bakwàbò abu anyi? Kàbìdi bânà bààbò bàà bakàji kabenakù munkaci mwètù emu anyi? Kàdi Muntu ewu wàpecì ebu bukòòkeshi bwà kwenza nùнку penyi?” Nwamònu anyi? Mu ngaakwilù mukwàbò, Yèyè kàvwa muswikàkane nààbò to. Kì kwambabò ne: “M’Beelèzèbùlà. Mmwena Sàmaalèyà. Ùdi ne démon, ne Ùdi ne mukupa. Yèyè ùdi—Yèyè ùdi... Yèyè m’Muntu udi ne nyumà mubi, pa bìdi bitàngila ntèndeleelelu, ki udi muMuvwije ne mukupa. Ki cyòci aci. Ùdi pambèlu pààpa bu muntu wa cisuku. KanùMutàngidi bu kùdì bwalu to.” Nènku tudi bamanyè cyàkenzekelà Izàlèèlà. Nènku bôbò bààkeela mbila mikolè. Bàvwà batwishìibwe bikolè ne Muntu awu ùvwa mu ntùpàkànyì, mu mùshindù wa ne, kaa, pààkalwàbo kuMupìisha, kwambayè—kwambayè ne: “Mashi Èndè ikalè pambidi pèètù ne pambidi pàà bânà bèètù balela.” Nènku Akiikala pambidi pààbò kubangila ànu piine apu.

⁴² Yesù ùvwa uteeta kubàmbila ne tubingilà twàbò atu ki twàkashipà bapròfetà, ne ki twàkashipà baakàne bààkalwà abu. Bààkiitaba twitabàayi yàbò yàkabàpàbo kùdì bantu, pamutù pàà kwangatabò Díyì dyà Nzambì. Nènku, mu dyaenza dyà nàнку, bààkavwija Díyì dyà Nzambì kadiyi ne bwenzeji to.

⁴³ Mpindyewu, bidi bikèngela anyi bwà wèwè kwamba, mu bwalu ebu, ne *Eci* ndiswa dyà Nzambi ne dijinga dyà Nzambi, anyi ncintu kampànda cikwàbò cyùdi mwà kuleejangana, cidi cimpè kutàmba *Eci*. Mpindyewu, bikèngela wàngatè anyi eci anyi cikwàbò. Kwèna mwà kukwacila Nzambi mudimu pàmwe ne mamònà to. Nènku bidi bikèngela wàmbè ne: “Eci ki Bulelèlà,” anyi ne “Ncitùpà cyà Bulelèlà,” anyi ne “Cyònsò cijimà kî m’Bulelèlà to,” anyi ne “Kî ncitwàngaja bîmpè to,” anyi ne “Kî ncyumvwija mu cyôci to.”

Kàdi Bible mmwàmbe, ne: “Dìyì dyà Nzambi kî dyà didyùmvwijila dyà muntu dyà nkàâyendè to.” Muntu mukwàbò nànsha umwe kèna ne cyà kusàkidilaKù dyumvwija kampànda nànsha, Dyôdi ndifunda mu mùshindù ùdi Nzambi muswè bwà Dyôdi kumvwijiibwa awu. Ànu cidiDi dyàmba aci, Cyôci aci, ke cidi ne cyà kwikalaku. NuDyàngàtaayi ànu mùshindù ùdiDi dyambiibwe awu, mùdiDi difumdiibwe Apa awu.

⁴⁴ Mpindyewu, bóbò mbiitàbe twitabàayi yàbò ayi. Bàdi bàvwija milayi yà Nzambi kayiyi ne bwenzeji kùdìbo bóbò to. Bàdi baCicinguluka. Nebàsambukè baCishiyè kule.

⁴⁵ Mpindyewu, bu Russie mwitàbe Dibènesha dyà Mpenta adi, kùkaadi bidimu makumi mwandamutekète ne bitaanu, pààkapòna Nyumà Mwîmpè mu Russie apu, nùku kabèèna ba-communistes leelù ewu to. Mpindyewu, kùkaadi bidimu makumi mwandamutekète ne bitaanu, kwàkapetàbo ditabuluja dinène mu Russie. Nzambi kulwa munkaci mwàbò, ne bààkapeta matàbuluja manène, mayè too ne mu Sibérie. Kàdi cyàkenzabo ncinyi? BààkaCibènga. Kàdi leelù ewu, ditùnga’s ndifwè, ne èkèleeziyà kayiciyiku mwà kwenzaku masangisha to, pàdiku kakùyì dyanyisha. Ne bàkaadi bapìishibwe babwele mu cilumbulwidi. Ùkaadi muyè kwà nàka mu cilunji cyà ciji eci cyà communisme; bamana kupàanyisha kùdi dyabulù.

⁴⁶ Kùkaadi bidimu makumi àtaanu, Nyumà Mwîmpè wàkapòna mu Angleterre. Dyàkàmwè paanyimà pàà aci kulwaku George Jeffreys, ne F.F. Bosworth, ne Charles Price, Smith Wigglesworth, balwanganyi banène bàà mvità bàà diitabuuja abu, kùkaadi bidimu makumi ataanu, ki bóbò kupa Angleterre ditabuluja dyà Nyumà Mwîmpè. Kàdi cyàkenzàbo ncinyi? Bààkabàseka, kubèèlabò mu málòkò, kubàbìkilabò ne mbapàle, beela meeji ne bàvwa bajimije lungenyi. Èkèleeziyà kubèngelayi bantu bwà kulwàbò kubàtèeleja. Nènku bààkondopa babèèdi, ne bààkiipata badémons, ne bààkenza byenzedi binène. Kàdi bwalu Angleterre, bu ditùnga, wààkabenga Èvànjeeliyò, mpèkaatù yèndè—yèndè’s ki kumanyikayi buloba bujimà eku. Kakwènakù dîngà ditùnga pa buloba bujimà, nànsha Loomo mwine ne France, didi—didi dipàmbùke kutàmba Angleterre to. Yèyè kàdi’s ki mamwèndè wa dipàmbùka. Ànu myaba mene yivwà Finney ne bantu bààbò

banène abu bayiishile ayi, mu—mu Haymarket, ne Charles G. Finney, ne Wesley, ànu nànkù, kàdi yèyè kubènga Cyôci aci.

47 Kàdi mpindyewu, nànsha lumingu lushààle elu, anyi mbingu yibidi, mu bibèjibeji, nudi nusangana myaba yidi bantu baàbò banène biikale bavwijibe ne butekète bunène mu—mu maalu à masandi ne bakàji, mu mùshindù wa ne batentekedi bàkaadi babwelemu. Ne munène wabò mwine mmulwe kujandula bakwàbò kàbidi. Bikàndàkàndà mbyùle naabi tètè. Wabò mpèkaatù wa cilèndwishi, ànu mu bukalenge bwàbò bwine, mmukune dîna dyàbò dyà bundù adi mu buloba bujimà. Bwà cinyi? Wàkabènga Bulelèlà. Wàkafila kèndè kabingilà, kàdi kwèndè's nkumane kujika. Angleterre ùkaadi yèyè yònsò mushààle cintu cyanààna, bwà Nzambi, kùkaadi ntàntà mule. Bu ne . . .

48 Àmèrikè, kùkaadi bidimu dikumi ne bitaanu, pàakatungùnuka ditabuluja dinène dyà dyondopa kuumukila ku mpenta, dibwayike mu ditùnga, kwenzekaku ditabuluja mu cimenga cikùlù, Washington, DC. Bamfùmù bàà ditùnga, bìndondà byà bamfùmù, bantu banène, banguvèna; bintu binène kwenzekabi, banguvèna ne—ne bantu kwondopiibwabò. Bu mudi, Congressiste Upshaw uvwa mucibùkile panshi munda mwà—mwà bidimu makumi àsambòmbò ne bisambòmbò, ne kabàyi mùshindù wà kukùdimuna mpàla kwamba ne kabìvwa nànkù to. Cìvwa ànu kumpàla kwàbò mene, kàdi bôbò kuCibènga.

49 Nènku, dilòlòlò edi, ki cidi cyenza ne ditùnga edi diikale dishààle. Dikaadi dipiishibe. Kàkùcyenà ditèkemena bwàdi dyòdi to, nànsha dikesè. Dikaadi disambùke mukàlù wà pankaci pàà cilumbulwidi ne ngàsà. Ne dikaadi disungùle cikaadidi naaci eci, bwà kukontonona ditùnga. Ne dikaadi dibolè, too ne penyì. Cidiidi cyàdi cikaadi cibolè. Maalu à mu nsömbelu à ditùnga edi mmashàadile kupita cyònsò cindiku mwà kudicinkila aci. Kàdi ndongolwelu wadi wa ntèdeleelu mmubolè kupita ne maalu miine à nsömbelu awu. Dikaadi dishààle, mu kwenza kwà cyôci eci, dikaadi mpindyewu dikadilamike, èkèleeziyà yònsò eyi, ne yà ditùnga, mu nsangilu wa maèkèleeziyà, ne dikaadi dyangàte cimanyinu cyà nyamà wa lwonji. Cintu kaayipu's wè! Bwà cinyi? Kìlistò wàkabàpa mpùngà ne: "Lwàyi ku difestò Dyànyì," difestò dyà mpenta, didi dyùmvwijà ne "makumi ataanu adi."

50 Pààkapòngoloka Nyumà Mwîmpè mu Russie, bààkabìikidiibwa ku difestò dyà mpenta, difestò dyà nyumà, kàdi bôbò kuMubènga. Angleterre, Nyumà Mwîmpè wàkabàpòngòlokela, kàdi bôbò kuMubènga. Àmèrikè, Nyumà Mwîmpè wàkabàpòngòlokela, kàdi nyèwù bààMubèngi.

51 Wàkabìikila misangu yisàtù. Misangu yisàtù, nyàkatùmaYe, kàdi kabàakatèeleja difestò adi to. Pashiishe kutùmaYe

cyàkàbìdì, kwambaye ne: “Nda wènzejè bantu abu ku bukolé bwà bàlwe. Bikèngela bwà mèèsà àdijiibwè. Mèèsà àkaadi malongolola. Myaba nyèyì yìcìdikù.” Nènku ndi ngeela meeji, ne, pàmwāpa, pàmwāpa mu ngondo mikesè yìlwalwà eyi, anyi cintu kampànda, anyi cidimu, anyi ní ncinyi cyònsò, Nzambì neàtume dinyukusha dikwàbò mu ditùnga dijimà emu, bwalu kucidi ànu muntu mukwàbò pambèlu pààpa, mu mwaba kampànda, mwikale Dimiinu didyànjlila kulongolola, udi Bukènkè ne cyà kupònena, mu mwaba kampànda, mu mwaba kampànda pa buloba. Bwà ditùnga, dyòdì diine, kwadi nkumane kujika.

⁵² Mvwa ntàngila mu cikàndàkàndà cyà *Life* cyà lumingu elu; lwà kwìnshì, èè, mu Little Rock mwàma, ditùkù dikwàbò, anyi, to, mùvwa mmu Hot Springs. Ki mèmè kumòna mwómò amu, ngeela meeji uvwa nnguvènà wa ditùnga dyà New York, mwikale ne kakàjì kaji kàà maja kàà kàvùùla ne bilàmbà kàà mùshindù kampànda mu Honolulu, uja naakù maja. Mpindyewu. . . Ne apa, kwìnshì kwà cyòci aci, kùvwa muntu mukwàbò wa mwende lumù. Kaa, bundù kaayi! Tàngilàayi ditùnga dyètù leelù ewu. Tàngilàayi ngiikadilu wa dyètù—wa dyètù ditùnga diine. Tàngilàayi numòne kùkaadidi dikafikè, mùkaadidi ditùkine dishàale dyà ciipanshì.

⁵³ Tàngilàayi wètù ndongolwelu wa ntèdeleelu leelù ewu. Mmuniyì mùdìbì mwà kwikala ne èkèleeziyà yìkalè mibwele mu ngiikadilu udiyì mpindyewu ewu? S’mbwalu mbodyombòle ne babènge Mukenji wà Nzambì, dibìikila dyà kulwa ku difestò. Nudiku bafwànyine kubiikila nsòmbelu wa mùshindù awu ne mmwakànyine Èvànjeeliyò anyi? Nudiku bafwànyine kubiikila nsòmbelu, udi mufwànyine kusòmbesha ne kwanyishila bantu bààbò—bààbò bwà kwenzabo bintu abi, kunwà mfwankà anyi?

⁵⁴ Dìngà ditùkù, lwà kwìnshì eku, èkèleeziyà kampànda, cisùmbu cikesè cyà banàyi civwà cinàya kwìnshì eku ku cipalu cyalàbale cyà manayi eku, ne mwànà wa balùme mukèsè wa bukonde bwànyì mulùme utu mwedi wa ndundu wa cimwè cyà ku biine bisùmbu abi. Ne pa nànkù ùvwa muyè kanàya ndundu kuntwaku, nènku kùvwa cisùmbu cyà banàyi cyà èkèleeziyà ciikale cinàya. Nènku ki mpaasàtà nyàwù, ne tunsongàalùme etu mu cipalu amu, biikale banàya. Kàdi mpaasàtà awu wenza kukoka mucì wà mfwankà ùtùuka ùpingaja mukwàbò, wa èkèleeziyà mwena mutumba ànu menemene ku luseke lwètù eku. Kàdi nudikù mwà kudifwànyikijila muntu. . . Nànsha mene bantu bàvwà basòmbèle mu batèèleji amu bàvwà bamòne pààbò ciine cintu aci. Kàdi bikaadi byenda bishàala mu mùshindù wà kabàciyi nànsha bóbò biine babìcyùka to.

⁵⁵ Èkèleeziyà kampànda munène, èkèleeziyà wa ba-Baptistes, wùndì mumanyè, ùtu ùlekela beena mu èkèleeziyà bapàtuka mu kàlaasà kàà Dyàlumingu, mu tusunsa dikumi ne tutaanu twà pamutù, bwà mpaasàtà ne bakwàbò bònsò abu kuya kiimanabò pambèlu bànwa mfwankà, kumpàla kwà kumwàlukilabo bwà

kukwacila Mukalenge mudimu. John Smith, mubangi wa mwine èkèleeziyà awu, wàkasambila wàmba kufwilakù, bwà Nzambi kutùma ditabuluja, too ne mùvwa mèsù amuula ashààla mabwite bufùkù, nènku bikèngela bwà mukàjèndè kumulombolaye ku mèèsà ne ùmudiishila byàkudyà mu nkutu. Bu ne... Muntu awu's mmufwànyine kukudimuka mu majambu bu yèyè mwà kumanya ne èkèleeziyà awu ukaadi mufike mu ngiikàdìlù wa mùshindù awu. Ncinyi ciine aci? Bàvwa babiikidiibwe bwà kulwa, kàdi kucibèngabò. Ki cintu cimwepelè ncyàci. Ne nudi bavùlùke, Yesù wàkamba, mwômò emu, ne aba bàakabiikilabò, kàdi kucibèngabò abu, kabàakulabulakù ku didyà Dyèndè dyà dilòòlò nànsha.

⁵⁶ Pàdi Nzambi ùtùma Nyumà Mwîmpè ne ukookola ku ciibi cyà muntu, kàdi yèyè ùMubènga ne budiswilè bwónsò, musangu mukwàbò wàdyàkuMubènga bwà musangu wèndè wà ndekeelu, ne wèwè kwakwikalaku muntu wa dyèsè to. Udi mwà kusòmba mu èkèleeziyà utèeleja Èvànjeelìyò, ne witaba bìdì Èvànjeelìyò wàmba abi. Udi mufwànyine kwenza bintu byàbùngì bu kwamba ne: “Ndi mumanyè n’Cyà bushùwà,” kàdi kùyikù mwà kukungamangana Nèndè, bwà kuMuleeja ku bantu to, wèwè mwine. Nwamònu anyi? Udi ànu uMutèeleja cyanàànà, bwalu wèwè udi wamba ne: “Ndi muMwitabuuje ne ngwa cyà bushùwà.” Aci’s cidi ànu kudya Nèndè bulunda cyanàànà.

Ndi mufwànyine kwamba ne: “Ndi mwitabùuje ne aci ndola binunu dikumi.” Kì mbwena kwamba ne ndi muyipetè to. Nwamònu anyi? Ndi mufwànyine kwamba ne: “Aci mmâyì mîmpè matalàlè,” kàdi kubènga kuànwa. Nudi bamanyè cîndì muswè kwamba aci anyi?

Kàdi eci m’Mwoyi wà Cyendèlèlè. Ne kubènga kucyènza, dîngà ditùkù nèusambuke mukàlù ùdì pankaci pàà cilumbulwidi ne ngàsà, ne dîbà adi kwàkupeta kàbìdì dyèsè dyà kulwa kuMupeta to.

⁵⁷ Bwènù nwènù bàdì bàlwa mwab’ewu. Mèmè ncyèna mwambule bujitu bwà bàdì... anyi—anyi bwà bàdì bakwàbò bambi bambila nànsha. Kàdi, piikalàCi cilelèlè, s’udi mwena dibànzà dyà kufilaKu mwoyi wèbè. Ncinganyi cikwàbò ciwàdyàkusanganakù, cidi cifwànyine kwikala ne dikwàcisha kùdì, kutàmba kumanya kwà ne udi mwà kwikala ne Mwoyi wà Cyendèlèlè?

⁵⁸ Ambaayi tǔng bu ne mvwa ngààbanyinangana tumuma twà bwanga mwab’ewu, twà ne, bijaadikiibwe kùdì maalu à mamanya, bijaadikiibwe kùdì maalu à mamanya ne kamuma aka nkafwànyine kukushiya ne mwoyi munda mwà bidimu cinunu? Èè, nùnkù’s mbifwànyine kun—kunkèngela bwà kwikala ne cisumbù cyà bampùlushi pambèlu apa, bwà kusàkila bantu mwaba awu. Nùnkù kì mbifwànyine kukèngela wèwè kwenza nànsha dibiikila dyà ku cyoshelu bwà bwalu abu to. Bikèngela

ànu wêwè kubatuuta bwà kubùpatapù, bwà kwikala ne mwoyi bidimu cinunu.

Kàdi, nànsha nànkù, bijaadikùibwe kùdi maalu à mamanya ne Nzambi wa Cyendèlèlè, bukolè Bwèndè bwònsò bwà dibìikà Dyèndè dyà ku lufù, bùdi bukulaya Mwoyi wà Cyendèlèlè abu, kàdi Sàtaanà's neàteeke bisumbù byèndè pambèlu pàapa bwà kukulama kule naaWu. Nwamònu anyi? Nànsha nànkù, udi mwà kutàngila, ne mwikale ne meeji mùshindù mukùmbàne bwà kuWùtàngila mumpàla ne kumòna ne ng'Wà cyà bushùwà, kàdi pashùshe kuWùbènga. Nwamònu anyi?

⁵⁹ Cintu kampànda, kabingilà kàà mùshindù kampànda. “Luuya ndupite bukolè. Ndi mucyòke be. Nèndwe, mààlabà.” Cidi ànu kabingilà kàà mùshindù kampànda, ki cyònsò cidibo bènza. Mu kubènga kwà ditùkù dyà disambiibwa, cidi cikutàpulula ne Nzambi.

⁶⁰ Mpindyewu, tudi tumòna. Nènku, mu Dipungila Dikùlùkulu, bàvwa ne cìvwàbo babìikila ne ncidimu cyà budìshikaminyi. Apu mpàvwa bantu bònsò, bàvwà bapika abu, bafwànyine kuya badìshikàmine pàvwà mpungi wa cibìlù cyà budìshikaminyi wèdiibwa. Kàdi dìbà adi pàvwà muntu kàyì ùpàtuka uya to, pàvwàku kabingilà kampànda kàvwaye mufwànyine kufila, bwà ne kàvwa muswè kwalukila mu buloba bwèndè to, dìbà adi bàvwa ne cyà kumwenza cimanyinu ku dicì, ne mulonda, ku dikunji dyà mu ntempèlù. Nènku pa dìbà adi bibilù byà budìshikaminyi nànsha bilwè bilondangane misangu bùngì munyì, muntu awu ukaavwa mumana kusumbisha kashidi. Kàvwa mwà kwalukila kàbìdi bu mwena mwàbò wa mu Izàlèlèlè to, cyàkàbìdi nkwardi. Ùvwa mwenze cinyi? Mubènge dibìikila dyèndè. Kabìvwa bikèngela bwà kufutayè cintu nànsha cimwè to. Dibànzà dyà bupika bwèndè òvwa dijikè. Famiye wèndè ùvwa mudìshikàmine. Yèyè ùvwa mufwànyine kwalukila buludi mu buloba bwàbò ne kwangatulula bintu byèndè sungasunga abi. Kàdi yèyè mubènge kucyènza, dìbà adi kàvwa kàbìdi mwà kupeta bumpyànyì mu Izàlèlèlè to, ne bintu bìvwà byèndè yèyè abi bàvwa bàbìpèèsha muntu mukwàbò.

⁶¹ Mpindyewu, cintu cimwècimwè aci mu mubidi cidi cyàngaciibwa mu nyumà. Bwà ne, byòbi byenzèke ne twètù aba, bu bapyànyì bàà Mwoyi wà Cyendèlèlè, bumvwe Èvànjeeliyò ne bamanye ne ng'Wà cyà bushùwà, kàdi tuMubènga, kàdi tubènga bwà kucyènza anyi kuMutèèleja, tudi twangata cimanyinu cyà nyama wa lwonji.

⁶² Mpindyewu, muntu wàm̀b̀i ne: “Mpindyewu, nekùlwe ci—cimanyinu cyà nyama wa lwonji, necilwe matùkù kumpàla eku.” Lekaayi nnupè bwalu. Cikaadi cimane kulwa. Nwamònu anyi? Pàkaadi ànu Nyumà Mwìmpè ubanga kupona, cimanyinu cyà nyama wa lwonji cidi cibanga kwenzeka. Nwamònu anyi?

63 Wêwè udi ne bintu ànu bìbìdì cyanààna. Cìmwè cyà ku byôbì, ncyà ne, kuMwitaba, nkwangata Cítampì cyà Nzambì. KuMubènga, nkwangata kwà cimanyinu cyà nyama wa lwonji. Kubènga Cítampì cyà Nzambì nkwangata kwà cimanyinu cyà nyama wa lwonji. Bantu bônso mbùmve anyi? Kubènga Cítampì cyà Nzambì nkwangata kwà cimanyinu cyà nyama wa lwonji. Bwalu, Bible mmwambe ne: “Bônso bàvwà kabàyi batwibwe Cítampì cyà Nzambì bàakangata cimanyinu cyà nyama wa lwonji.”

64 Pàvwàbo bèèla mpungi, bônso bàvwà baswè kuya badìshikàmìne bàwa mwà kuya. Bàvwà kabàyi baswè abu, bàvwà bàtwibwa cimanyinu.

Mpindyewu, nudi numòna's, cimanyinu cyà nyama wa lwonji, twètù tucyàmbe ne ncyà matùkù acilwalwà, mpikaalàci mwà kumwènèshiiibwa, pawàmányà ne ki cyùkaadi mumane kwenza. Nwamònu anyi? Ki mùdì kàbìdì Nyumà Mwímpè, Ùdi ne cyà kumwènèshiiibwa. Patwàmòna Mukalenge Yesù ùlwa mu butùmbi, ne patùumvwà bukolè bushintuludi abu, ne patwàmòna bafwè babìika bàpàtuka mu nkita, ne tumanya ne mu katanci kàà kasùnsùkila kàà kasunsa, netùshintulukè ne netùpetè mubidi mufwànàngàne ne Wèndè. NeÀmwèneshiiibwè. Dìbà adi, pa kumòna ne aba bàakaMubèngà abu, nebàbàshiye panshi apa, pambèlu.

65 Yesù kàakambaku ne virgo yàkapatuka bwà kutwilangana ne Kilistò anyi? Bàmwè bàà kùdìbo bàakalààla tulù, cilù cyà kumpàla, ciibìdì, ciisàtù, ciinàyi, ciitànù, cisambòmbò, too ne ku cilù cyà mwandamutekète. Kàdi, mu cilù cyà mwandamutekète, dìbà adi ki dyàkalwà díyi ne: “Mònaayi, Mubàki nyàwù ulwa. Pàtùkaayi nùkatwilàngàne Nèndè.” Nènku aba bàvwà balàale tulù abu, bààkabìika. Cikondo cyònsò cyà paanyimà aci, too ne ku Mpenta, bààkabìika. Nwamònu anyi? Kuumukila ku cikondo cyà mwandamutekète, cikondo cyà mwandamutekète cyà èkèleeziyà, kuntwàdijilu too ne kundekeelu, bààkabìika. Kàdi aba bàvwà mu eci cikondo cyà èkèleeziyà, biikale ne mwoyi abu, bààkashintuluka. Nènku bààkabwela.

Pa dìbà mene pààkabwelàbo apu, virgo mikùtākàne yàkalwa ne yàkamba ne: “Tudi baswè kusumbakù ndambù wa Maanyi enu awu.”

66 Kàdi abu kwambàbo ne: “Tudi naawu makùmbàne ànu bwètù twètù biine. Ndaayi kùdì bàdì bàÀsùmbishà.”

“Nènku pàvwàbo bàteeta bwà kupeta Maanyi aa, Mubàki wàkalwa.” Kakùtu kwanji kwikalakù cikondo kàmpànda mu maalù-malonda à buloba ebu, cikaadiku ba-Èpiscopalians, ba-Baptistes, ba-Méthodistes, ba-Presbytériens... Bibèjibeji mbyùle tètè. Bibèjibeji byà ntèndeleeleu bìdì bitùmbisha Nzambì, mùdì virgo mikùtākàne ayi yiteeta bwà kupeta mpenta, yiteeta bwà kupeta Nyumà Mwímpè. Kàdi bantu kabèenakù

bafika ku dyumvwa ne aci kacya kwenzekaku, bilondeshile Diyì dyà Nzambi anyi? “Pàvwàbo bateeta bwà kwalukila apu, Mubàki wàkalwa ne wàkangata Mukàjì-musèla. Ne bààkeediibwa mu mîdimà yà pambèlu, bwà cilumbulwidi,” bwalu bààkabenga dibìikila dyàbò.

⁶⁷ Bantu bônso mbabiikidiibwe bwà kulwa. Nzambi, mu cikondo cyônso, ùtu mutùme Bukênkè Bwendè, kàdi Bwòbò bwàkabengiibwa.

⁶⁸ Nènku, mpindyewu, leelù ewu kî mmushiilàngànekù ne ditùkù dikwàbò dyônso adi nànsha, bwà kubènga ditùkù dyà disàmbiibwa. Pàdi Nzambi munkaci mwà dikumbula Èkèleeziyà ne bantu apa, Mwakidilà pa dîbà adi. Kulaadikiji too ne ku cidimu cyàlwà, ku ditabuluja dilwalwà to. Dîbà ki dyòdi adi ne: “Leelù ewu ki ditùkù dyà lupàndù.”

⁶⁹ Nènku vùlukàayi ne, kacya Nzambi kàtùkù mwanji kutùma Mukenji, nànsha mu ditùkù kaayi, ÙdiYe kàyì mushindike ne citàmbe-mfukilu to. Yesù wákamba, Yèyè mwine ne: “Mémè ncìyi ngènta byenzedi byà Taatù Wanyì to, nànkù kanùNgiitàbùùjì to. Kàdi Mémè ngenza byenzedi, itàbùùjaayi byenzedi panwikalà kanùyì mwà kungii tabuuja Mémè,” kàdi panùdi nubimòna patòòke tòò ne—ne bimwènèshìibwe.

⁷⁰ Mpindyewu dîbà dyalu didiye uWùbènga, pa dîbà adi mmutùbùdiibwe dicit ne mulonda, pashìishe kàakuWùmvwakù to. Mpindyewu nyèwù wàyì kadifila mu nsangilu wa maèkèleeziyà, bwà kumubwela buludi bwà kwangata cimanyinu cyà nyama wa lwonji.

⁷¹ “Kàmwè kàà ku twipàcilà tunène,” muntu kampànda mmumpe cibèjibeji aci ànu mpindyewu ewu, mùdi paapa mupyamùpyà ewu mwambe ne, “nkàà kusangisha pàmwè maèkèleeziyà.” Bòbò’s nebacyènzè bulelèlè ànu mùndi mémè mwimane kaaba aka emu. Ne beena Mishònyì pààbò mbaseswishìibwekù. Nwamònu anyi? Bwalu, èkèleeziyà... Bible mmwàmbe, Pòlò, mupròfeta wa Mukalenge awu, mmwàmbe ne: “Ditùkù adi kadyàkulwa to pàdi dipàmbuka kadiyì dyanji kulwa, dyàmbedi, ne pashìishe... kumpàla kwà muntu wa mpèkaatù awu kàyì mwanji kubuuludiibwa. Yèyè udi musómbe mu ntempèlù wa Nzambi awu, ùdibàndisha yèyè mwine, kumutù kwà cyônso cidì Nzambi aci; yèyè, bu Nzambi,” ufwilangana luse ku mpèkaatù pa buloba, ne bikwàbò. Mùshindù mwine ùdi bwalu ebu bwenzèke’s wè! Kàdi kabùvwa mwà kwenzeka to too ne pàvwà dipàmbuka, too ne pàvwà èkèleeziyà ubanga kuseesuka ku difestò dyà nyumà, udisaka paanyimà ne ùdyènza bulongolodi. Ne dîbà adi dibuulula kadyàkashààla ne èkèleeziyà to.

⁷² Vùlukàayi ne, Izàlèlèlè wàkenda, muunya ne bufùkù, ku Dikunji dyà Kapyà. Pàvwà Dikunji dyà Kapyà adi ditentemuka, bàvwa batentemuka naaDì. Nènku vùlukàayi ne, Divwa Kapyà

bufùkù, ne Ditutu mundaamuunyà. Pa nàнку nDifwànyine kulwa, mundaamuunyà anyi bufùkù, pa díbà kanà dyònsò. Kàdi, mwaba wònsò ùvwàDi disanganyibwa, kùvwa kwenjiibwa difuta dyà cibawu, bwà kabàpangi kuDimòna to. Divwa Bukênkè bufùkù, ne Ditutu mundaamuunyà, ne bòbò bàvwa bènda baDilonda. Èyowà's, mukalenge. Cintu cimwècimwè aci!

⁷³ Martin Luther wàkaDimòna. Cyàkenzàye ncinyi? Wàkapàtuka mu cyena Kàtòlikè. Kàdi bòbò bààkenza cinyi? Bààkiibaka kaalupangu kakesè kacinyungulukile, kwambabò ne: “Tudi ba-Luthériens. Eci ki cyònsò cìdiku.”

⁷⁴ Pashiishe ki Wesley kuDimòna dipàtuka dyùmukamù. Yèyè kuya. Cyàkenzàbo ncinyi? Bààkiibaka kaalupangu kakesè kacinyungulukile, kwambabò ne: “Eci ki cyònsò cidiku.” Cyàkenzà Bukênkè abu ncinyi? Bwàkatentemuka kuya ànu kumpàla, cyàkàbìdì.

⁷⁵ Mpenta kuCimònaye. Cyàkenzàbo ncinyi? Bààkapàtuka mu ba-Wesléyens ne ba-Nazaréens, ne bikwàbò. Cìdìbo benza ncinyi? Bàdi bìibaka kaalupangu kakesè kacinyungulukile, badìbìikile ne: “Tudi ba-unitaires,” ne “Tudi ba-trinitaires,” ne “Tudi Basanga,” ne byònsò ebi. CyàkenzàYe ncinyi? Nzambi wàkatentemuka ne wàkapàtukamù e kuya kumpàla. Nwamònu anyi?

⁷⁶ Twètù katwèna mwà kwenza aci to. Bikèngela twikalè twenda tulonda, ditùkù dyònsò, díbà dyònsò dyà ditùkù, cidya cyònsò cyà njila. Bikèngela twikalè balombòdiibwe kùdì Mukalenge Yesù Kilistò. Katùyi benzè nàнку to, tudi twangata nsòmbelu wa cyena bulongolodi. Ne nsòmbelu udi kàyì ùlonda Kilistò, ku ditùkù ne ku ditùkù, kí mmukùmbànyine to.

⁷⁷ Muntu udi mwena Kilistò mu dyàlumingu, uya mu èkèleeziyà, ùsòmbela paanyimà pààpa ne wèlà meji ne èkèleeziyà ng'wendè yèyè bwalu ùdi wènzà *cikampànda*, *cikansanga*, anyi *cikankènga*, kàdi mu dimwè mwikalè wiba ne ùshima. Ne bakàjì bàdi baya ku myaba yà ciibúngì yà mu lusenga lwà kumpengà kwà màyi, ne—ne bapàtuka mu misèèsù, bavwàle tulàmbà tùdi tusalulangana masandi!

⁷⁸ Mwva ngeela meeji bwà—bwà inàbànzà mukàj' à mfùmù wa ditùnga, kàvwakù muswè kudilaaba nànsha bilaabu kwisù to, bwà kuya kumpàla kwà paapà; kàdi mmwenzè ànu wàlukila, kùdìtèekayè bu ntùngaamùlòngo wa bisuba byà nsuki bwà bakàjì mu ditùnga emu. Ne nkanzu yònsò eyi, myenze ne, pààkalwàye maamù, mukàjì yònsò mu ditùnga emu ujinga kuvwàla umwe wa ku nkanzu yà mùshindù wa baamaamù ayi mpindyewu. Ncyà bushùwà. Abi mbilejilu. Ne bòbò mbamanyè ne bantu abu mbafwànyine kwenza cyòci aci. Bàdi bavwàla nyumà wa pa buloba. Kàdi aci kí ncyà mu Èkèleeziyà wa Nzambi udi ne mwoyi nànsha.

⁷⁹ Bivwa bikèngela bakàji kwikalabò batàngija mèsù àbò kùdi Yesù Kilistò. Bivwa bikèngela nwènù kwikala kutàngija mèsù ènù kùdi Sarah ne kùdi bakwàbò bàà mu Dipungila Dikùlùkulu abu.

⁸⁰ Mpindyewu, bàkaadi bashààle too ne mu mùshindù wà ne. . . Mvwa nyiisha dilòòlò dikwàbò, mu mwaba kampànda, ngamba bwà bakàji kwikalabò batùmikila baabàyaabò. Kutùmikila? Èyo. Aci cikaadi cyumukè mu mushingà wà dibàbà, kùkaadi ntàntà mule. Kàdi bóbò kabààkwenzakù aci to. To, mukalenge. Bóbò mbasòmbèle mu Àmèrikè, ne ki cidìbò bàkwambila bwà wèwè kumanya. Kabààkutùmikilakù to. Kàdi, paùdi ànu kùyì ucyènza to, kùdidingikù bwà kuteeta kudibìikila mùdi mwena Kilistò to, bwalu kì ncyùdi to. Nànsha wèwè ujà maja ne wakula mu myakulu bùngì munyì, pawikalà kùyì utùmikila bàyeebè to, udi pambèlu pàà diswa dyà Nzambì.

⁸¹ Mukàji udi uvwàla tùpùtulu ne wènza bintu bìdiye wènza mu mùsèèsù abi, kùdibìikidikù wèwè mùdi mwena Kilistò to. Udi ujinga kwikala ne maalu à pa buloba kàdi mwikàle ànu kacya wakwàta ku bujaadiki bwèbè. Kwèna mwà kwenzaku aci mu Bwikadi bwà Nzambì to, paùdi mumanyè cidi cimpè citàmbe dyenza dyà aci.

⁸² Mònaayi ne, “mutùbula dici,” mutwà cimanyinu, pa dîbà adi kwàdyàkuumvwakù to. Vùlukàayi ne, aci ncimanyinu cyà dijìkà dyà wà maci. KwàdyàkuCyùmvwà kabìdi to. Kwàkutèeleja to. Kwàkupetakù mùshindù kabìdi to, bwà kucyènza kabìdi.

⁸³ Kaa! “Yèyè kàtu wìtabuuja Aci to.” Kaa, ekèlekèle! “Wèwè kumwambidiku to. Mmucitàbùuje.” To. “Yèyè udi ùkwambila ànu. . .” Kì mmuCimanyè to. Mmunyì mùdi inǎ—inǎbànzà mufwànyine. . . Ndi ngànji ànu kunùkonka pàànyì cyanààna ne, mmunyì mùdi inǎbànzà mufwànyine. . .

Mùmvwà ngàakula mu dyàlumingu, dilòòlò dyà dyàlumingu dishààle edi, kùkaadi lumingu lujimà too ne dilòòlò edi, pa “bukènkè bukùnze bùdi bupòdya,” mùshindù ùkaadi nkwaka wa—wa—wa bakàji mushààle wa balenga kwìsù kupita mùvwabi kwònsò eku. Mpindyewu, aci kì—kì ndilwisha dyà mukàji to, mpindyewu, cidi ànu. . . kàdi mùshindù ùdiye ùkòntonona ciine aci. Nwamònu anyi? Kùdi. . . Ukaadi mushààle mùshindù awu, bwà kumutèèka mu diteeciibwa, mùvwà Evà mutèèkìibwe kumpàla kwà mucì awu.

⁸⁴ Mulùme yònsò, mwànà wa balùme yònsò udi ulwa kùdi Nzambì, bikèngela àpicile mu dîbà dyà diteeta adi. Eci ncikondo cyà bakàji, ditungà edi pààdi, mùdi mùkèngela bwà mukàji àpicilè mu diteeta adi. Bu yèyè mwà kwikala mukàji mulenga kwìsù, kàdi mwikàle wènza maalu bu mwanèètù wa bakàji, mabènesha à Mukalenge àdi pambidi pèndè. Kàdi pàkaadiye mwà kudifila ku—ku dimanya eci, kàdi kudizànjika, kakùyì mpàta to aci cidi cileeja ànu ne ùdi ne—ne nyumà mubì pambidi

pèndè. Kêna ne meeji à kwikala mùshindù awu to, ncyêna ngeela meeji nàнку to, bààbùngi bàà kùdìbo kabèèna ne meeji awu to. Kàdi kabèèna bafika ku dyumvwa cyòci aci to.

⁸⁵ Nudikù bafwànyine kungambila ne mukàji udi udineemeka, ne wa wèla meeji ewu, mmufwànyine kuvwàla, tulàmbà tukesè tùdìbo bàvwàla pambèlu apa mu mìsèèsù etu anyi?

⁸⁶ Ndi ne bânà bàà bakàji batekète bàbìdi basòmbe mwab'ewu. Ncyêna mumanyè ne cyàvwilà bânà abu kundekèelu ncinyi to. Mémè ndi ànu mbasambidila. Bânà, leelù wa Ndaaya ewu, ncyêna . . . Kamwèna mùshindù wà kubyàmba to. Ncyêna mumanyè to. Kí mbatwìbwe cisàlù cyà kubèngabì kubènzékela to. Bikèngela bìikale batwè makàsà àbo àbìdi panshì, kumpàla kwà Yesù Kilistò, bwà kulumbululabò. Kabèèna mwà kubwela biimànyine pa cidi . . . pa—pa cìndi mémè ngiitabuujà, ne pa cidi mamwàbò witàbuujà to. Mémè ncitu mumanyè bitùbo benza to. Kàdi mu bushùwà bwà bwalu ndi ngiitabuujà ne, mu dìbà edi, bu bânà bàà bakàji abu mwà kupàtuka mu mùsèèsù, bavwàle bilàmbà byà mùshindù awu, ne muntu mulùme kubàpendayè, biikale bavwàle bilàmbà byà mùshindù awu, ncyêna ngiitabuujà ne, bu mémè ne mpùngà, ne ndiku mufwànyine kupiisha muntu awu to. Aci's ncyà bushùwà. Ndi mémè mpiisha bânà bàà bakàji abu. Kabàvwa ne cyà kwenza nàнку to.

⁸⁷ Tèelejàayi. Piikalà muntu wèla meeji, ne bòbò balongesha ne: “Muntu kàtu mupite nyamà to. Mmufùmìne ku bukwànyama.” Kàdi tàngilàayi, dìbà adi, mutèèkaayi pambèlu pààpa bu . . .

⁸⁸ Nutangilaayi mbwa pàdi kabwà kàkàji mu bikondo kampànda, ùdi mwa kusambuka mpangu ne bikwàbò byònsò, s'mbwalu kabwà kàkàji aku kàdi mu ngiikàdilù awu; ngulube, ngombe, nyama mukwàbò kanà yònsò ewu. Nènku patwikala twètù mwoyi wà bukwànyama; bwalu, s'ki citùdi, bwà luseke lwà mubidi. Kàdi pàdi mukàji ùdizanjika mùshindù awu, s'ùdi ùjaadika ne ùdi cintu ànu cimwècimwè cidi kabwa aci, anyi cintu cimwècimwè aci, menemene, bwalu kàvwa mufwànyine kwenza nàнку nànsha. Yèyè's mmumanyè. Bufùki's bùdi bumulongesha ne muntu mulùme neàmùtàngile. Ne Bible ùtu mwambe ne: “Ewu yònsò udi utàngila mukàji bwà kumwalakana ùkaadi mumane kwenda nendè masandi munda mwà mwoyi wèndè.”

⁸⁹ Aci cidi citèèka cikondo cyà diteeta. Kàdi dyabùlù ùdi ùvwija bakàji abu balenga kwisù, ne ùbàvùùla bilàmbà, kadi kubàtèeka pambèlu pààpa, bwà kunwela nwènù diteeta. Nwènù balùme, tùmàayi mpàlà mu cisuku. Ikàlaayi bânà bàà balùme bàà Nzambì. Nwènù bakàji, vwàlaayi bilàmbà bu bânà bàà bakàji bàà Nzambì. Kanùlu kalumbulula bwà dyenda dyà masandi mu Ditùkù adi to.

⁹⁰ Piikalà mukàji awu, nànsha mwikàle kàyì mwenze bwalu to. . . Mmufwànyine kwikala kàyì mwenze bwalu bubì to, kàyikù mene ne meeji à kwenza bwalu bubì to. Kàdi ngènzàmpèkààtu

uvwa mutàngile mbungakeenu wa mubidi wà mukàji udi ukòka ntèmà awu awu (mumanye ne yéyè mmuntu mulùme, ne mubidi wà bukàji pààwù ùdi mu ewu. . . tujilu twà masandi mu ewu, ne byà bulùme mu mukwàbò), ne nebikèngele bwà ngènzàmpèkààtù awu kulumbululayè mu Ditùkù dyà Cilumbulwidi: Udi mucyènzè nganyi? Udi mupiile nganyi? Kí nyéyè awu to. Ngwèwè. S'ki bwalu mbwàbù, mwena nsòmbelu wa masandi.

⁹¹ Tàngilàayi ditunga edi. Bivwa pa ciibidilu ne, bôbò—bôbò pavwàbo ne nkanzu yà mishiikidile mu binù yivwa bakàji bāv̀wàla ayi, bivwa bikèngela twètù kuyilombesha ku Paris bwà kuyipeta. Leelu ewu, Paris ngukaadi uyilombesha muneemu bwà kuyipeta. Bikaadi bikooyike bikolè mu mùshindù wà ne Paris mwine ùkadi mushààle paanyimà. Ncyà bushùwà. Dyònsò dijimà. . . Bwà cinyi? Dibènga dyà Èvànjeeliyò. Bwà cinyi?

Paris kàvwa Nendè to. Yéyè mmwena Kàtòlikè lukàmà pa lukàmà. Beena Mishòònyì kabèèna nànsha mwà kubwelamu to. Tàngilàayi Billy Graham. Ngeela meeji ne kùdi beena Kilistò ànu nkàmà yisambòmbò mu Paris mujimà, pa miliyò, beena Kilistò nkàmà yisambòmbò, beena Mishòònyì. Biine abu kabàyi bùle tètè ne Nyumà Mwimpè to. Bàdi ànu beena Mishòònyì bèètù bàà pàtupù aba, nkàmà yisambòmbò, pa miliyò ne miliyò. Kabààkapeta mpungà wa kuMubènga to.

⁹² Kàdi aba bàdi ne Èvànjeeliyò. Kàdi pàdìbo bàsesuka ku Mukenji ne Èvànjeeliyò ùdibò bamòne muleejiibwe patòòke, bàdi bàMuseka ànu bwalu dilongesha kampànda dyà ndumba kampànda wa kale ndibàtàtākàje; ne mpaasàtā kampànda mwimane mu cyambilu, utàmba kwela meeji ku ndola ne kwèndè kùdiye ùdilla kupita ku musùukà, wà bantu biine bàdiye ùyiisha abu, ncyà bushùwà, ki cidi cicyènzè ncyòci aci. Mpindyewu ditunga edi ki dikaadi dileeja bàà pa buloba dikàsà.

⁹³ Nudi bavùlùke, àbìdì adi panshì aa, mu tabernacle emu. Mvwa muyiishe pa cyena-bwalu kampànda, kùkaadi bidimu bitwè ku makumi àbìdì ne: “Nènnùleejè nzambi mukàji wa Àmèrikè,” kùvwa kakàji kakesè kàà mvwadilu mubi mwab'ewu, kasòmbe kakàvwale mwaba awu. Ki cidiku ncyòci aci. Mpindyewu mene, bàkaadi naakù's. Bàdi munkaci mwà kupeta citùbo balòmbèlòmbè. Ne bôbò's nebàcipete. Kwàjiki.

⁹⁴ To. Kabààkuciitabuujā to. To, mukalenge. Bàkwambila mùdìbo beena mwàbò bàà Àmèrikè, ne mùdìbo ne bukenji bwà—bwà kwenza maalu mwònsò mùdìbo baswè amu. Mémè ndi ànu njinga. . .

⁹⁵ Lekaayi nnupe mwanda. Ndi nnwàmbila mpindyewu. To, mukalenge, cidiidì kacýàdyàkwenzakù bwalu bwà nsongo to. To, mukalenge, mungàlààtā kawàkwenzakù bwalu bwà nsongo to. Mungàlààtā ùkaadi mubolè, too ne mu mifùbà. Bu biikàle bàwènza munkaci mwà musùmbà wà beena Kilistò, bivwa mwà

kwikala bîmpè. Kàdi panùdi nuwùtèeka pambèlu pààpa mu bàà pa buloba, ùdi ùlwa ànu bilàmbà byà ku màzuwà à màyi pa byòbi kakùyì lwongò to. Cyà bushùwà menemene.

⁹⁶ Tàngilàayi muneemu emu, leelù ewu. Cintu kanà cyònsò cìdi mwà kwenzeka, kàdi bôbò nebùikale ànu... Cintu kanà cyònsò, kukoka ndambù wa beena cidiidi, kàdi nebàshaale kabàyi bànyookiibwa to nànsha bôbò bashipàngana.

⁹⁷ Pàngààkayiishà kuntu kwàka, dilòlò adi bwà kuteeta bwà kusungila mwoyi wà bânà bàbìdi abu. Mbapiile bapange ne mwà kupiila. Nànsha mwine ndumbùlùlà awu wàkajuuka e kwimana paanyimà pàanyi, kwamba ne: “Ncyà bushùwà.” Yèyè ne: “Ncyèna ngiitabuujà dishipa dyà bantu to.” Yèyè ne: “Nwènu baswè kumòna mu milubu yènu yà benzàvi, mbanganyi bàtùbo bashipa mu nkwasà mitwà ku nzembu ne bikwàbò? Kì mbabanji to. Mubanji yèyè ùdi mwà kupeta mùshindù wà kudyàngacila mumwakwidi wa bwenzeji kampànda, kwenza tuumàyèle kampànda twà bukooyà, ne ndambù wa tuntu tukòdyàkàne *apa*, ne ndambù lwà *apa*, ne kukosa cintàkanyi mishìku.” Yèyè ne: “Mbànà bapele bu bôbò abu, bàdi kabàyi ne mfranga mikumbàne bwà kudisumbilaku dilòngò dyà byàkudyà bilenga edi, bàà mùshindù awu abu bàdìbo bashipa ku nzembu, muntu bu wa bàdìbo babiikila ne mmusumbà wa bapangi, biikale ànu kacya bààkwàta ku dìnà dyàbò dyà dinyooka dyà lufù.”

⁹⁸ Mèmè kwamba ne: “Dishipangana dyà kumpàla dikààdikù dyenzeke pa buloba, mmuntu mushipè mwanààbò, kàdi Nzambì kààkamushipa bwà bwalu abu to. Wàkamutwà cimanyinu, bwà muntu nànsha umwe kàmushipi to. Cyà bushùwà. S’ki Nzuji Wa kumutù kwà bònsò nyawu.”

Ndi mmòna ne bààkabùumushila cibawu aci. Mpindyewu nebàsambè cilumbu cikwàbò. Mu bushùwà bwà bwalu, bôbò nebàbàkosele bùlokò bwà kashidi mpindyewu, ciikalà bidimu dikumi ne cimwè, ne pàmwàpa babiitabila bwà budishikaminyi bwà munu ku dísù. Mbapiile. Cyà bushùwà. Mbapiile. Bivwa bikèngela kubàtùmabò mu bùlokò, bwà kashidi, kàdi kí mbàbàshipa to. Muntu nànsha umwe kèna ne bukenji bwà kushipa mukwàbò muntu to. To, mukalenge. Ncitu ngiitabuujà aci to. To, nànsha kakesè.

⁹⁹ Kaa! Bàdi bàmba... Mòna’s, kabèèna biitabuujà ne bàdi pambèlu pàà diswa dyà Mukalenge to, bwalu aci ki cyònsò cidiibo bamanye, cyònsò cidiibo baswè kuumvwa bàbàmbila’s. Bàkaadi batume maci ku luseke bwà kabùmvu Bulelèlà to, mwómò amu.

¹⁰⁰ Nànsha Ejiipitu kàvwa muswè kumanya ne musumbà wa bansantu babùnguluki bàà mu malaba kuntu kwàka abu ùvwa ndiswà dyà Mukalenge to. Mmunyi mùvwàbo bafwànyine kukèba bwà kumanya ne muntu mupàle kampànda ùvwa mulwè muntwamu, ùfùmina mu cipeèlà, ne mwedi cipambà

to. Mòna's, Wendè tatwendè's n'Yòzefù, kàdi Màriyà wàkapeta difù dyà Mwânà mwine ewu kumpàla mene kwà kabàyi nànsha. . . Mulediibwe, mòna's, s'ngwa mu masandi. Ne Yêyè ùdi cinyi? Mupàle ànu wetù ewu. Ngumwe wa ku bantu bàà mùshindù wa mukùtākàne abu. Kanùyì kaMutèeleja to." Bàvwa benza cinyi? Bàvwa munkaci mwà kutùma misùùkà yàbò mu iferno. Bàvwa bàngata. . .

¹⁰⁶ Yesù kwamba ne: "Bàlekèlaayi. Mpofo yêyè ulombola mpofo, bùbìdì bwàbò kabàākupòna mu mùkìdì anyi?" S'ncyà bushùwà. Bòbò kabàvwa bacimanyèku to. Kabàvwa baswè kuCìitabuuja to. Kabàvwakù mwà kwitabuuja to.

¹⁰⁷ Kabàvwa mwà kumòna ne mmunyi mùvwà bantu bapwekèle biikale ne Mukenji mupwekèle, mwà kubengiibwa, bafwànyine kufikisha ditùnga dijimà ku kabùtù to. Mpindyewu tèelejàayi. Kabàvwakù mwà kuumvwa aci to: musumbà wa bantu bapwekèle, bàà ciibidilu aba, bàà ciipanshì aba. Nudi bamanyè, Bible mmwàmbe ne: "Bantu bàà ciipanshì bàvwa batèeleja Yesù ne disànka."

¹⁰⁸ Ngàkamona kaacintu kampànda kenzeke mu Mexique, ànu àbìdì aa. Kalààlà kàà māsàlaayi Valderna, musungula wa Nzambì, Bukènkè e kuteemena mu njila wendè musangu kampànda, mu òmwè dyà ku masangisha. Mulwanganyi wa mvità munène wa cyena Kàtòlikè awu, umwe wa ku tulààlà twà māsàlaayi twà kuulu menemene mu Mexique, wàkalwa ne didipwekesha dyònsò ku cyoshelu ne wàkapeta dibàtiiza dyà Nyumà Mwìmpè. Kupinganaye ku Mexique. Ki kwikalaye ànu ungeela mbila, bwà mèmè kuya kuntwaku. Ndekeelu wa byònsò, mèmè kwangata dipàngadika dyà kupwekakù. Mukalenge nguwu mundombole; mvwa mupetè cìkèèna-kumòna. Mèmè kwambila mukajàanyi. Mèmè kukùpweka.

Nènku pààkenzayè nàнку, yêyè mwikale umwe wa ku bamfùmù bàà tulààlà twàbò twà māsàlaayi, kalààlà kàà māsàlaayi kàà mìtootò yinaayi, kuyayè ku ciimamwèndè wa bukalenge, ku bukalenge. Kàdi, bòbò, bàtu balwishangana ne beena Mishòonyi muntwamu bikolè, nudi bamanyè's. Pa nàнку bàvwa bamanyè ne bwà eci necìkale disangisha dyà tuyaayi tukamòne, ki kuyaye kuntwaku e kwangata bampùlushi bàtu balama bantu abu. Pààkenzàbo nàнку, bàvwa bangàte cipalu cinène aci. Nènku bàvwa ne cyà kumfikishamù mùshindù awu. Bukalenge mbùvwà bùmfikishamù.

Nènku, pààkenzàbo nàнку, mwè—mwèpiskòpò, umwe wa ku bèèpiskòpò banène bàà èkèleeziyà wa Kàtòlikè, kuyaye kùdiye, kùdì nguvènà, kwambayè ne: "Mukalenga, ndi ngumvwa bàmba ne nudi nufikisha muneemu muntu udi kàyì mwena Kàtòlikè."

Awu ne: "Èyo. Kùdì bwalu anyi?"

“Mòna’s,” mwàkambàye, “kanwena mwà kufikisha muntu bu nàнку awu muneemu to. Kacya katùtukù banji kuumvwa bukalenge ebu bwenza cintu bu nàнку to.”

¹⁰⁹ “Kàdi,” mwakàmba awu nàнку, “twacyènji bwà mpindyewu’s.” Yèyè ne: “Mòna’s,” ne, “muntu awu mmuntu mumanya ne ngwa kweyemenyiibwa. Ndi ngùmvwa bàmba ne binunu byà bantu bàtu bàkamutèèleja. Kalààlà kàà màsàlaayi Valdèna awu, mmulunda wanyi wa katàpùlà-katèèkà.” Yèyè ne. . . Kàbìdì ùvwa ne. . . Mfùmù wa ditùnga mwine mmwena Mishòònyì, nudi bamanyè’s, Méthodiste. Ki kwambayè—kwambayè ne: “Muntu awu mmuntu mumanya ne ngwa kweyemenyiibwa, ku dyànyì pàànyì dimanya.” Yèyè ne: “Kalààlà kàà màsàlaayi Valdèna ewu, mmukudimwisha mucima kùdì mwine muntu ewu.” Yèyè ne: “Mòna’s, yèyè ewu, ku dyànyì pàànyì dimanya, mmuntu mumanya ne ngwa kweyemenyiibwa.” Yèyè ne: “Binunu byà bantu, mùdìbò bàmba, nebàlwe bwà kumutèèleja.”

Ki mwèpiskòpò ewu ne: “Mbantu bàà mùshindù kaayi biine abu’s, mukalenge? S’ànù binyòngà byètù ebi. Bàà nàнку awu’s ki bàtù baya, bàkatèèleja muntu wa mùshindù awu.”

¹¹⁰ Mfùmù awu kwamba ne: “Mukalenge, nwènù aba’s mbàdì naabo kukaadi bidimu nkàmà yìtaanu mijimà, mbinyòngà bwà cinyi?” Bwalu kumba kutùka’s. Aci kàdi kukòsa bwalu. Kaa, ekèlekèle! Aci kàdi kubàpwekeshaci milongo. Èyowà’s, mukalenge. Èyowà.

¹¹¹ Pashìshe pàakabiìshiiibwa mwànà wa mu dibòko awu ku bafwè, mèmè kutùma muntu ne mukenji bwà kulondaye muntu awu. Inàbànzà awu ùvwa wàmba, mu ci-Espagnol ne: “Mwànà ewu mmufwè mu dindà emu, pa dìbà citèèmà jaajaaja.” Kàdi kuvwa kuloka mvùla wa yèbèyèbè, mvùla’s. Tukudimwisha mucima bantu batwè ku binunu dikumi balwè kùdì Kilistò, dilòòlò dyònsò.

Dilòòlò divwà didyànjlè, mpofo kampànda mukulàkàjì ùvwa mutàbàle pa cibùmbà cyà ku cyambilu apu. Kaa, cyà bunène bwà tabernacle ewu misangu yisàtù anyì yinaayi, citumbuke bule *ebu*, pasanganyiibwa bitàmbalà byà mu nshìngù ne bifulu byà kale panshì apu. Ki mèmè ànu. . .

¹¹² Bàvwa bàmpwekeshilemù ku myonji, mu cyalu àmu, bwà kumbwejamù. Mèmè kuya ànu kumpàla aku e kubanga kuyiisha, ku diitabuuja.

Billy kulwaye, wàmba ne: “Papa, nebikèngele bwà wèwè kwenzakù cintu kampànda, bwà mukàjì wàwa.” Yèyè ne: “Ndi ne baawisiyè nkàmà yisatu biimane kwàka. Mbapange bukolè bwà kwimanyika kakàjì kakesè kàà menemene, kàà bujitu bwà kilò makumi ànaayi ne yitaanu, bu nàнку.” Kàbìdì kainàbànzà kalenga kwisù, kípì kàà bule *ebu*, byenze bu ne, kàà, pàmwàpa ùvwa mmwanèndè wa kumpàla’s. Ndi mufwànyine kwamba ne

ùwva ne bidimu makumì àbìdì ne bisàtù anyì makumì àbìdì ne bitaanu.

113 Nènkù ùwva mwimane mwaba awu, ne nsukì mipweke, mwambule mwànà mukesè wa mu dibòko. Nènkù ùwva mwà kudìnana e kutùpika mulongo awu. Bantu balùme abu bàwva mwà kumusakà paanyimà. Yèyè ùwva mwà kubàbàndila pambidi, ne mwànà awu mwambula ku lubèsè, mùshindù wònsò nàka, ùbàbwelela mu mantàntà, anyì cintu kampànda. Bàwva ànu bafwànyine kumubàndisha kwàka, kàdi bòbò bamuumusha ku cibùmbà aku.

114 Bàà bwalu kabàyi ne karta kàà disambila kàà kumupa to. Yèyè ne: “Mémè mudìdinge ànu mumulekèle mubwelemù, Papa, ne mwànà mufwè wàwa, kàyi ne karta kàà disambila to, ne . . .” Yèyè ne: “Pàdìbi ne bakwàbò mbiimane kwàka, bindile mwab’ewu kùkaadi matùkù àbìdì anyì àsàtù, mu mvùla wàwa ne muunya. Kàdi kumulekela yèyè ùpita kumpàla kwàbò bòbò,” yèyè ne, “aci’s necijuule ci—cimvundù lwà kwìnshì kwàka.”

115 Mémè ne: “Mbìmpè.” Mwanèètù Moore ùwva mwaba awu, ne yèyè ùtu ne dibalà dyanzè ànu bu mùdì dyànyì edi emu. Ki mémè kwamba ne: “Mukàjì awu kí mmumanyè ne ng’ewu anyì ng’ewu to, bantu mbapite bùngì.” Mémè ne: “Tuma . . .” Nènkù—nènkù bânà bèètù bàà balùme bàbìdì, umwe wa ku bânà bèètù bàà balùme ùwva wa muneemu mu tabernacle ewu, ukàadi muyè mu Butùmbì mpindyewu, ncyèna mwà kuvùluka dìnà dyèndè bwà mpidyewu to, kàdi, ùwva mwimàne lwà paanyimà apu. Pa nànkù mémè kwamba ne: “Mwanèètù Moore, pweka wèwè, usambidile mwànà awu. Mukàjì awu kàakumanya ne nganyì to, bwà ne mmémè anyì ngwèwè. Pweka ànu cyanààna. Ne yèyè mwine kèna mwà kwakula Anglais to.”

Ki pa nànkù Mwanèètù Moore ne: “Mbìmpè, Mwanèètù Branham.”

116 Kwasaye Iwendu wènda ùpweka. Mémè kwamba ne: “Bu mùmvwà ngàmba, fa- . . .” Ki mémè kumòna mwànà mukesè wa mu dibòko, mwànà mukesè wa beena Mexique musòme kumpàla kwànyì, mwikale ànu ùseka’s. Mémè kwamba ne: “Anji indila kakesè.” Ki mémè ne: “Shìilaayi kainàbànà aku njila.”

Billy ne: “Ncyèna mwà kwenzaku aci to, Papa. Yèyè . . .”

Mémè ne: “Ndi mumòne cikèenà-kumòna, Billy.”

Yèyè ne: “Kaa, aci kaayi mbùngà bwalu’s.”

117 Ki twètù kukàngula njila mu musùmbà wa bantu awu mùshindù awu ne kumupìcishilamù. Ki yèyè ulwàlwà ewu, kupònaye ku binù, ne lùnzaadi mu cyanza. Mémè ne: “Juuka.”

Pa nànkù mémè kwamba ne: “Taàtù wa mu Dyulu, bwà mpindyewu kaayi ncyèna mumanyè ciwènza Wèwè to. Ncyèna mumanyè ne Wèwè udi ukeba ànu bwà mémè kusankisha mukàjì ewu pa kusambidila mwanèndè, anyì ne ncinỳi. Kàdi,” mémè

ne, “nyèwù nntekela mwânà mukesè ewu byanza, mu Dîna dyà Mukalenge Yesù.” Cintu ànu cimwècimwè cingààkenzà bwà Mwanèètù Way aci, pàvwàye mulààle panshì mwaba awu apu, mufwè, dîngà ditùkù. Ki mikòlò kudisubayi mu mbulankète amu, ne mwânà mukesè awu kubangayè kwela mbila mikolè. Nènku cìvwa mbwà dipetulula dyèndè dyà mwoyi. Pàvwa . . .

¹¹⁸ Mémè kutùma muntu ne mukenji, Mwanèètù Espinosa, bwà kuyaye nèndè kwà ngàngàbukà, bwà apete kabèji kàà didìcipa kàà dijaadika kàà kùdì ngàngàbukà kàà ne: “Mwânà awu ùvwa mufwè.” Tukààvwa bu pa dîbà dikumi jaajaaja wa bufùku nàнку awu. “Ùvwa mufwè mu dîndà amu pa dîbà citèèmà, mu birò byèndè, mufwè dîsaamà dyà bisùlùsulu.” Kupetaye kabèji kàà didìcipa kàà dijaadika kàà kùdì ngàngàbukà.

Bafùndi bàà bibèjibeji kabàvwa mwà kulama bwalu abu to, nùdi bamanyè's, ki kukèngelabi bwà kulwabo kùndi. Kungeelabo nkonko. Ki kungambilabo, awu kunkonkaye ne: “Udi welakù pèèbè meeji ne bèètù bansantu mbafwànyine kwenza pààbù aci anyi, bôbò?”

Mémè ne: “Pìikalàbi ne bàdi ne mwoyi's.”

“Kaa,” mwàkambaye, “kwèna mwà kwikala munsantu paùdi kùyi mwanji kufwà to.” Ki bwalu abu's. Nwamònu anyi? Nènku bantu . . .

¹¹⁹ Nudi numòna's, dikwàbò ditùkù, mmwaba kaayi ùvwàbo ne mansèrè ùvwàbò basùmishile bwalu ewu, mu cibèjibeji? Pa nàнку, munsantu mupyamùpyà ùvwa mufwè, kaa, kùkaavwa bidimu lukàmà, anyi cintu bu nàнку awu, ki kwenzabo . . . mbamuvwije munsantu mpindyewu, bamuvwije munsantu's. Nènku bàvwa bàmba ne—ne mmufume ku bafwè ne musambidile mubèèdi kampànda uvwa ne disaamà dyà kànsèrè kàà mu mashi. Kì mmuvwàbi anyi? Cìvwa mmu cimwè cyà ku bikàndàkàndà. Anji elàayi ànu meeji mùdibo bàteeta kusùmisha bwine bwalu abu, kàdi pàdiku nkàmà ne nkàmà yà maalu ànu mwìsù mwà bantu mwab'ewu. Ki cintu kaayi ciinè aci? Bwà cintu bu dinàya's bwà kwelamu èkèleeziyà wa Mishòònyi, nwamònu's, bwà kumwelesha meeji ne kùdi bwalu bwà nsongo.

Kàdi byenzedi bilelèlè byà Mukalenge, mwaba ùdibi bishìndikìibwe ànu byà menemene ebi, bijaadikìibwe, kabèèna bàpeta dikima dyà kulengaku cibèjibeji bwà kubifùnda to. S'ki bwalu abu. Mbapètè dibìikila kàdi kudibèngabo. Èyowà's, mukalenge.

¹²⁰ Kabèèna mwà kuumvwa mùdì Mukenji mupwekele, cisàmbà cipwekèle, ne kubènga cintu bu nàнку nkufwànyine kubèèla mu cimvundù cinène to.

¹²¹ Mukàji mukwàbò ùvwa ùngambila, mu Grants Pass, mu Oregon, kùkaadi cikondo kampànda, nsongààkàji mukwàbò wa cyena Kàtòlikè mupàtùke mwaba awu bwà kumpiisha ne kumfùnda mu cibèjibeji. Ùvwa kamòna-kàmba wa cibèjibeji

kampànda, ne dibùki dyà mfwankà mu cyanza. Ki yéyè ne: “Ndi njinga kuyiikilanganakù neebè.”

Mémè ne: “Ciine cyùdì ujinga kwamba ncinyi?”

Yéyè ne: “Mvwa njinga kukwelaku nkonko pa ntèdeleelu webè wèwè ewu.”

Ki mémè ne: “Udi ujinga kukonka cinyi?”

Ki yéyè ne: “Nku bukòkeshi kaayi kùdì wenza ebi?”

¹²² Mémè ne: “Mu Dìna dyà Yesù Kilistò, ku dibìikila dyà kùdì Nzambi.” Ki kutùngùnukayè, wàkula ne dipèètu. Mémè ne: “Indilabi kakesè.”

Yéyè ne: “Bu ne bìvwa bikèngela mémè kuswikakana ne musumbà wa binyonga wàwa,” yéyè ne, “ncivwakù mene mwà kujinga bwà kwikala mwena Kilistò to.” Yéyè ne: “Ne piikalabo . . . Bàdi bamba ne bantu abu ki bààkòkeshi buloba kumpàla eku.” Yéyè ne: “Ndi ntèkemena ne ncyàkwikalakù mémè apa to.”

Mémè ne: “Kùditacishi to. Kwàkwikalapù to.” Mémè ne: “Udi . . . bikèngela kuditàcisha bwà aci’s.”

“Mòna’s,” mwàkambàye, “lukutukutu lwònsò alu ne mbila yònsò ayi!”

Mémè ne: “Kàdi pèèbè’s udi ulàka mukana wamba mùdì mwena Kàtòlikè?”

Yéyè ne: “S’ki cìndì.”

¹²³ Mémè ne: “Utu mumanyèku ne byàkakèngela bwà virgo Màriyà àpete Nyumà Mwímpè ne àkule mu myakulu, ne àje maja mu Nyumà, mùshindù ùmwèùmwè wàkenzàbo awu, kumpàla kwà Nzambi kumwakidilayè anyi? S’nutu numubiikila mùdiye maamù wa Mvidi Mukùlù’s.”

Yéyè ne: “Aci’s ndukutukutu.”

Mémè ne: “Anji indila kakesè. Mémè. . .”

“Ncyèna ne cyà kutàngila mu Bible to.”

¹²⁴ Mémè ne: “Kàdi mmunyi muwàmanyà cìdì Bulelèlà anyi cìdì kaciyi Bulelèlà?”

Yéyè ne: “Mémè ndi ngàngata díyi dyà èkèleeziyà wanyi.”

¹²⁵ Mémè ne: “Eci ki Díyi dyà Nzambi. Ki Dyòdi edi apa mene. Ndi nkwela kadyòmbò bwà kuDitàngila. Ne Màriyà ùvwa naabò kwàka mu nzùbu wa kuulu, ne wàkapeta dibàtiiza dyà Nyumà Mwímpè ànu mwàkapeta bakwàbò abu. Cibi nudi numubiikila mùdiye maamù wa Mvidi Mukùlù.” Mémè ne: “Pashiishe kubìikila aci ne: ‘Musumbà wa bisòte, màyi à manyaanu?’” Mémè ne: “Kùditacishi to. Kwàkwikala Kwàka to. Kabyèna bikèngela bwà wèwè kutàmba kuditàcisha bwà aci to, piikalabi ne ki cyònsò cyùdì uditàcishila. Mbipiciùbwe ne wèwè muditàcishe

bwà musùùkà wèbè wà mpèkaatù awu, nsongàakàjì wa yààya.”
Ki mèmè kumulekela kuyayè.

¹²⁶ Mpindyewu elànganaayaaku meeji bwà byònsò ebi, bipwekèle ebi. Nzambi ùdi ùbivwija bipwekèle menemene.

Mmunyi mùvwà Aakàbà, mmunyi mùvwà Izàbèlè, mmunyi mùvwà bantu bònsò bàvwà beela meeji ne Eliyà ùvwa muloji abu, bàvwà beela meeji ne mmwena lubùku abu? Nànsha Aakàbà's wàkamba ne: “Mufidi wa cimvundù cyònsò eci mu Izalèèlà's nyèyè ewu.”

Yèyè ne: “Wèwè's ngudi mufile bimvundù mu Izalèèlà.”

¹²⁷ Mmunyi mùvwà ditùnga adi difwànyine kwela meeji, ne, kubènga mukenji wà muntu wa kwísù kubwikàkàne bu yèyè awu, kàyì muvwàle bilàmbà byà bwakwidi, ne bikwàbò, ne nkufwànyine kwikala dipiila dyà ditùnga adi?

Mmunyi mùvwà Ejiipitu mufwànyine kucimanya, mukòokeshi wa buloba awu, baapàlò, ne kasùmbù kèndè ne bantu bèndè bàà kuneemekiibwa abu. . . ? Kacya buloba kabùtu bwanji kufikakù cyàkàbìdì pa kaaba aku to, mu maalu à mamanya ne bikwàbò. Mmunyi mùvwàbò bafwànyine kwela meeji ne, kubènga mupròfetà mukùlàkàjì wa bidimu makumi mwandamukùlù awu, ne mwedi cipambà mulembelèle, ne mvyà ku mutù, ùpàtuka wènda ùtwa mikùmà, wàkanyeema awu? Kàdi kupàtuka kwàka ne mukenji ne: “Anyi neùbàlekèlè bàye, anyi Nzambi neàbùtule ditùnga.” Pàlò ùvwa mufwànyine kwela meeji awu munyi? “Neuntùmikile mèmè, Pàlò.”

¹²⁸ Pàlò kwambaye ne: “Kutùmikilà?” Kaa, yèyè, Pàlò! “Ne muntu mukùlàkàjì, mwine awu muntu mukùlàkàjì wa cimfikàmùndà,” mùvwàbò bàdyàm̀bidila, “kubènga muntu bu nànkù, ne nkubùtula ditùnga?” Kàdi's cyàkadibùtula. Kaa, ekèlekèle!

Twànji twìmanàayi, bapùwe ndambù wa tusunsa twènzè disambila, ne kwelangana kwà meeji. Tudi ne mwoyi mu ditùkù kaayi? Tukàadi penyì? Cikwàbò cikondo cyà cyena leelù, cyà maalu à mamanya. Mbìmpè twètù kwelangana meeji. Pàmwàpa, wimana, bantu biimana ne basambila ndambù, ne bèèlanganakù meeji ndambù, udi mufwànyinekù kudyùm̀vwa bìmpè menemene paanyimà pàà wèwè mujikije kucyènza. Ncyà bushùwà.

¹²⁹ Mwena Kilistò kí ncyamù cyà mudimu, anyi nsapì yà cyamù yà mùshindù kampànda yà kwikala kukànga ne kukàngula naayi bulongolodi bunène bwà ntèndeleele to. Ncyà bushuwà. Mwena Kilistò kí ncyamù cyà mudimu kampànda cidì cyendesha ndongolwelu kampànda wa ntèndeleele to. Mwena Kilistò, awu kí mmwena Kilistò to. Mwena Kilistò nkwikala mufwànàngane ne Kilistò. Ne mwena Kilistò kèna mwà kwikala mwena Kilistò pàdì Kilistò kàyì mubwele mu muntu awu to, Mwoyi wà Kilistò munda mwèndè. Dìbà adi ndidì cyòci aci cìtwàla Mwoyi

wàkaleeja Kilistò mu nsòmbelu awu, nènku wêwè mwikale wenza bintu byàkenza Kilistò abi.

¹³⁰ Cìndi munkaci mwà kwamba ncinyi? Malanda à sungasunga à wêwè ne Kilistò. Ncinyi ciine aci? Nsòmbelu wèbè mmukumbànyine Èvànjeeliyò anyi?

Mpindyewu ndi nteeta bwà kwadija mwaba wa kujaadikila bitùdi twamba abi mwaba awu, bwà kunùleeja cyôci aci, balùme ne bakàji bàvwà bakàji, ne balùme bàà luumù.

¹³¹ Bible ngudi mwambe. Nukààvwakù bamòne anyi? Dilòlòlò dyà dyàlumingu dishààle, cintu kampànda cìmvwà mupwè mwoyi bwà kwelamù, Genèsè nshapità mwi6 ku mvensà mwi4. “Balùme bàakadyàngacilà bakàji abu, bu bakàji bàà nzùbu, bàakadi balùme bàà kale, bàà luumù.” Balùme bàà luumù, bàakadyànjlàbo kwamba ne nebàlwe cyàkàbìdi abo. “Ànu mwàkadìbi mu matùkù à Noà, ki mwikalàbi kàbìdi ku Dilwa dyà Mwàna wa muntu.” “Balùme bàà luumù bàngata bakàji,” kabayi bakàji bàà nzùbu to, “bakàji; bàlonda mubidi wà cyanààmà.”

¹³² Tàngilààyì mu Angleterre, kùkaadi mbingu yìbìdi. Tàngilààyì mu États-Unis. Tàngilààyì myaba yònsò, mmyùle tètè ne bundumbà. Bantu banène, banène, bàà myànzu mitùmbùke, bàfwisha ditùnga bundù, bènda bàlondangana shikùshikù ne bakàji. Muntu munène awu mu Angleterre mwàmwa, munène wa bàsàlaayi wa mùshindù kampànda, nàнку awu, mòna’s, ne nukààvwakù bamòne, ùvwa ne mukàji mulenga kumòna. Fòtò wendè ùvwa mwaba awu, bamuleeje pèndè. Tàngilààyì ndumbà wa beena Russie awu, kàdi ùvwa muvwàle mvwadilu ànu wa ùsalulangana masandi, ulwa udikupa kuntwaku, bwà kuleeja patòòke mubidi wèndè wà bukàji. Mulùme awu kàdi fwàku bwà cyôci aci’s wè.

¹³³ Bàdi bàtùkèngelà leelù ewu mbànà bàà balùme bàà Nzambì. Tudi dijinga ne balùme mu bukalenge, biikale bânà bàà Nzambì. Ncyà bushùwà. Ki bwà cinyi, mfùmù mwìmpè, wa difwànà dyà Nzambì, mmufwànyine kwimanyika lukutukutu lwònsò elu. Nùнку byà mabwejila byònsò ebi kì mbifwànyine kwikalakù to. Bu mwàkenza Davìdi, wàkabiimanyika’s. Yéyè’s wàkacyènzà bushùwà, s’mbwalu ùvwa mfùmù. Ne kùvwa ànu . . .

¹³⁴ Mùshindù mulelèlè, ngwà ne, Nzambì mwikale Mfùmù, ne Nzambì ùdi ùtùma mupròfetà. Samwèlè kààkabàmbilakù kumpàla kwà kupetabo mfùmù anyi? Wàkamba ne: “Nzambì ki wènú Mfùmù. Kacya nkààdikù munwàmbìle bwalu kampànda mu Dìnà dyà Mukalenge kabùyì bwenzèke anyi?”

Bòbò kwamba ne: “To. Bwà aci kaayi ncyà bushùwà.”

“Kacya nkààdikù mulwè ne kanza koolola kunùdi bwà kunùlòmba cyàkudyà cyènú anyi?”

“To. Kacya kùtu mulwèku ne kanza koolola kutùdi bwà kutùlòmba cyàkudyà to.”

“Kacya ncitukù munwǎmbile cintu kampànda cìdi kaciyi cilelèlè to, kumpàla kwà Mukalenge.” Yèyè ne: “Nzambi ki wenu Mfùmù.”

¹³⁵ “Kaa, tudi bamanye aci. Ne tudi bamanyè ne wèwè udi muntu mwîmpè, Samwèlè. Tudi twitabuuja ne Dîyì dyà Mukalenge didi dilwa kùdi, kàdi tudi tukeba mfùmù, nànsha byà munyi.” Nwamònu anyi? Ki cidìbo bàpeta ncyòci aci.

¹³⁶ Mpenta wàkakeba bulongolodi, nànsha byà munyi. Kubùpetaye. Ncyà bushùwà. Bààkakèba bwà kwikala bafwànàngane ne èkèleeziyà mikwàbò yònsò eyi. S’ki munùkaadi. Ndàayi kumpàla, aci, aci ki cìdi cikèngediibwa. Kàdi Nzambi ki wetù Mfùmù. Nzambi ki wetù Mfùmù. Èyowà’s, mukalenge.

¹³⁷ Ncinyi aci? Mbwalu bantu, ànu mwàkenzàbo mu matùkù à Kilistò, ànu mwàkenzàbo mu cikondo ne cikondo cyònsò amu, bàdi bàpeta ànu kabingilà. Bàdi ne twitabàayi yàbò bòbò. Udi mufwànyine kwikala kùyi muswè kwamba ne: “Ndi—ndi musùmbe ngombe, ne ndi muswe kuya kamòna ní ùdi—ùdi wenza mudimu anyi kèna wenza, anyi ùdi ufla mabèèlè, anyi—anyi ne ngwa dimiinu kaayi.” Udi mufwànyine kwikala kùyi ne kabingilà kàà nànkù to.

Kàdi mùshindù wà kabingilà kàdi bantu mwà kufila ngwòwò ewu: “Mémè ndi Presbytérien. Katùtu twètù twitabuuja Aci to. Mémè ndi Baptiste. Katùtu twitabuuja cintàkanyì bu Aci to. Èè, mémè ndi Luthérien.” Èè, aci kaciyèna ne dipetangana ne Cyòci aci to. Aci kî mbwena kwamba ne udi mwena Kilistò to. Aci nciswè kwamba ne udi wa ku musumbà wà bantu kampànda bàdi badyènzè bulongolodi. Nènku udi wa mu diswa dyà ba-Luthériens, diswa dyà ba-Baptistes, diswa dyà beena Mpenta. Kakùtu cintu pààci ne ng’Èkèleeziyà wa beena Mpenta to. Kakùtu cintu pààci ne ng’Èkèleeziyà wa ba-Baptistes to. Ndiswa dyà ba-Baptistes, diswa dyà beena Mpenta, diswa dyà ba-Presbytériens.

Kàdi kùdi Èkèleeziyà ànu ùmwèpelè. Ne kùdi mùshindù ànu ùmwèpelè wùdi mwà kubwelaMù, nku Dilediibwa. Udi mulediibwe mu Èkèleeziyà wa Yesù Kilistò, mwikale cidimba cyà Mubidi Wèndè, wa mu baaminyàmpalà bàà mu nyumà bàà ku Dyulu. Dìbà adi bimanyinu, byà ne Kilistò udi neebè abi, bìdi ne mwoyi ku wèwè.

¹³⁸ Nwènu beena Kilistò, kaa, bikèngela nwikalè ne malanda à sungasunga ne Nzambi. Bwà wèwè kwikala mwànà wa Nzambi, udi ne cyà kulwa mu bulongo ne Nzambi. Yèyè ùdi ne cyà kwikala Tatwèbè, bwà wèwè kwikala mwan’Endè wa balùme. Nènku ànu bânà Bèndè bàà balùme ne bàà bakàjì ki bàdi basùngidiibwe, kî mbidimba byà èkèleeziyà kampànda to, kàdi bânà bàà balùme ne bàà bakàjì. Kudi cintu ànu cìmwèpelè cyàpàtulà ciine aci, n’Dilediibwa dipyadiyà. Dilediibwa dipyadiyà ki

cintu cimwèpelè cyàpàtulà bulongo ne Nzambi. Ncyà bushùwà anyi? Bàna bàà balùme ne bàà bakàji. Pashiishe pàdi cyôci eci cyenzeka, ki pàdi balùme . . .

¹³⁹ Lukonko lûndi njinga kunwèla ndwôlo elu. Muntu awu ùdi wàmba ne: “Citùdi twenza pashiishe ncinyi paanyimà pàà twètù bamanè kulediibwa cyàkàbìdi?” Bààbûngi bàtu bangeela lukonko alu. “Ncinyi cidi cikèngela mèmè kwenza pa dîbà adi, Mwanètù Branham?” Wèwè mulediibwe cyàkàbìdi, ngiikàdilù webè yônsò nkòong mmushintùlùke. Udi mufwè ku bintu byúvwà welela meeji kale wàwa abi.

¹⁴⁰ “Èè,” mùdi wamba, “Mwanètù Branham, pângààkashààlà mwena èkèleeziyà, cyôci aci ncîngààkapetà.”

Èè, nènku, pa dîbà adi, Nzambi mmwàmbe ne: “Yesù Kilistò udi umweumwe awu makèèlèlè, leelù, too ne kashidi. Yèyè ùcidi ànu wondopa babèedi. Ùcidi ànu uleeja bikèènà-kumòna.”

“Kàdi, Mwanètù Branham, èkèleeziyà wanyì’s!” Mpindyewu, kwèna mulediibwe cyàkàbìdi to. Wamònu anyi? Kamwena mùshindù to; bwalu, piikala Nzambi mwine awu, piikala Mwoyi Wèndè munda mwèbè, bu mùdi . . . mùdi mu . . . mwoyi wà tatwèbè amu, nènku, piikalà Mwoyi mwine wà Nzambi awu mwikale munda mwèbè, Nyumà mwine ùvwa munda mwà Kilistò awu, munda mwèbè, mmunyi mùdi Nyumà awu mwà kwikalayè ne mwoyi munda mwà Yesù Kilistò ne kufùnda *Eci*, kàdi pashiishe kwalukila munda mwèbè wèwè kàdi kuvila *Acì*? Wamònu anyi? Kèna mwà kucyènza to. Yèyè’s nèitabè ne Dìyi dyònsò didi nàнку.

¹⁴¹ Pashiishe, wèwè wamba ne: “Èè, ndi cidimba cîmpè cyà èkèleeziyà,” aci kacýènakù ne dipetangana ne Cyôci aci to.

Mèmè ndi mumanyè bampàngàànu. Mu Àfriké mwàmwa, munkaci mwà bàna bèètù bàà bafiike mwàmwa, ntu nsangana maalu mîmpè à nsömbelu wa bantu abu miikale matumbùke kupita—kupita à beena Àmèrikè makumi citèemà pa lukàmà. Mòna’s, mu bîmwè byà ku bifuku kuntwaku, nsongààkàji yèyè kàyì ànu musèdiibwe too ne pàkaadiyè ne bidimu kampànda, anyi mufikè bule kampànda muntu kàyì mwanji kumusèla to, bàdi bàmanya ne kùdi katanyì. Bàdi bàmwipata. Udi uumusha budintà bwà cifuku aci, uya mu cimenga, dîbà adi ùdi ushààla muntu udi mupidiibwe kùdi cifuku cyàbò. Kàdi pàdiye ùsèdiibwa, bàvwa bamuteeta bwà kumòna buvirgo bwèndè. Piikala lutàndatanda lukesè lwà buvirgo alu lutùbùke, dîbà adi bìdi bikèngela bwà kwambaye ne mmuntu kaayi mwine awu udi mumumanyishe maalu. Nàнку bàdi babàshipa bònsò bàbìdi, cyàpàmwè. Kî nkufwànyineku kwenzeka dishipa dyà bantu bûngi cyanàànà mu Àmèrikè bu ciine aci mwà kwenzeka anyi? Nwamònu anyi? Kàdi nujuuka pèènu nubàbìikila mùdìbo bampàngaanù? Kaa, èkèlekèlè! Bòbò’s bàdi mwà kulwa kulongesha bantu, bàdi bàdyàmba

ne mbidimba byà èkèleeziyà aba, mùshindù wa kwikala ne nsòmbelu mukezùke. S'ncyà bushùwà.

¹⁴² Kacya ncitu mwanji kupetakù bwalu bwà màsaamà à màsàsà mu lwendu lwanyì lwònsò lwà mu Àfrikè wa ku Sud mujimà to. Kabàtu ne cintu cyà mùshindù awu to. S'ki bwalu mbwòbù abu. Nwamònu anyi? Bidi ànu biibidilu byètù twètù byà bukooya ne manyaanu, byètù twètù batòòke ebi. S'ncyà bushùwà. Baye kule ne Nzambi.

¹⁴³ Pàdi bwalu ebu bwenzeka, cintu ciwenzà dībà adi, neùjandule ne Nyumà udi ulwa munda mwèbè awu, ku Dilediibwa dipyadìpyà, newitabuuje ne newènzè cyònsò cidi Nzambi wamba mu Dìyì Dyèndè ne ncyà wèwè kwenza aci. Ne cyònsò cidi Bible uteela bwà wèwè kwenza aci, neùcitwè “amen.” Ne kwàkwimanakù to, muunya ne bufùku, ànu too ne pawàcìpetà. Ncyà bushùwà. Ncyà bushùwà. Ne mu ciine cikondo cyònsò eci, bulelèlè, kumutù kwà byònsò, neùkwame mamuma à Nyumà.

¹⁴⁴ Wèwè udi wamba ne: “Nèngààkulè mu myakulu anyi?” Udi mufwànyine kwenza cyòci aci, kàbidì udi mufwànyine kubènga kucyènza. “Nèngèlè mbilà anyi?” Udi mufwànyine kwenza cyòci aci. Udi mufwànyine kubènga kucyènza.

Kàdi kùdi cintu cilelèlè cìmwèpelè ciwènza. Neùkwame mamuma à Nyumà. Ne mamuma à Nyumà àdi dinanga, disànkà, ditalala, diitabuujà, mwoyi mule, bupòle, kalolo, lutuùlù. Cilunji cyèbè kacýàkwikala ne, “Wuuh to!” Wavùluka ànu ne, paùdi ne aci, cidi cyùmusha Nyumà Mwìmpè munda mwèbè ku mulungù awu. Wamònu anyi? Paùdi ufika mu mùshindù wà muswè kwikala kukokangana ne bònsò baùdi wenda naabò, kùdi cintu cipampàlámùke. Paùdi ufika mu mùshindù wà. . . mwambi ubala mu Bible, ne mbibì bwà kwenza cintu kampànda, ne, newìkalè. . . Wavùluka ànu ne, kakwèna bwena Kilistò mwaba awu to nànsha bwà kànà. Aci mpindyewu, cidi ne: “Ku mamuma àbò nkuwàbàmanyinà.” Ki cyàkamba Yesù ncyòci aci. Nwamònu anyi?

¹⁴⁵ Piikalàci ne n'Dìyì, ne Nzambi ngudi mwambe nànkù, Nyumà udi munda mwèbè awu neàkumbanangane ne Dìyì adi, musangu wònsò. Bwalu, Nyumà Mwìmpè mushùwashùwàlè neàkumbanangane ne Dìyì, bwalu Dìyì ki Mwoyi ne Nyumà. Yesù wàkamba ne: “Méyì Àanyi àdi Mwoyi.” Nènku pawikalà ne Mwoyi wà Cyendèlèlè, ne Yèyè mwikale Dìyì, mmunyi mùdi Dìyì mwà kuvila Dìyì? Nwamònu anyi? Neùvwije Nzambi muntu wa mùshindù kaayi? Ki cintu cìmwèpelè cyà kumanya ncyaci, cyà ne udi mwena Kilistò, pawìkalà mwà kwitabangana ne Dìyì dyònsò dyà Nzambi.

¹⁴⁶ Nènku udi udisangana wèwè mwine mu dinanga ne beena lukuna bèbè. Muntu wamba ne: “Èè, yèyè's kèna cìngà cintu to ànu munsantu mubunguluki wa mu malaba ewu.” Nènku ubanga

kushààla . . . Kaa! Wadimuka. Uh-hum. Wadimuka. Kàdi paùdi bulelèlè usangana ne, wèwè mwine, udi mumunangè! Nànsha yèyè mwenze cinyi, wèwè ànu kacya wâmunanga. Wamònu anyi?

¹⁴⁷ Dìbà adi ubanga kusangana ne, lutùlùlù lwèbè lushààla *mona* bule, mu mùshindù wà kalùciyì ne ndekeelu to. Muntu yònsò nàka mutungunuke ànu ne kukwamba maalu ne: “Èè, ncyèna ncyùkakù cyùdi wèwè wamba to!” Kubìndulukukù to. Wèwè mubange kubìnduluka, mbimpè wǎnji ùkasambilè dyàmbedi, kumpàla kwà wèwè kwakulangana nendè cyàkàbìdi. Èyowà. Èyowà.

Kùbwedikù mu makòkyanganyi to. Kùsù bwà kwikala kubwela mu makòkyanganyi to; paùdi muswè kumòna muntu ujuuka mu èkèleeziyà, wamba ne: “Nudi bamanyè mùdi bwalu anyi? Nyǎwù nnwambila’s, *Kampànda* mmwenze *cikansanga*.”

Amba ne: “Mpindyewu, mwanèètù, bundù bwèbè.”

¹⁴⁸ Wèwè mwambe ne: “Akàà, ki mùdibi nàнку anyi?” Utèya maci ku cilendwishi aci? Watàpa ntààlà wadimuka.

Nyumà Mwímpè kì nciinà cyà bùcyafù nànsha. Nwamònu anyi? To, to. To, to. Mwoyi ùkaadi basòmbèlemù kùdi Nyumà Mwímpè, mmùle tètè ne cijila, ne bukezùke. “Kawèna wèla meeji mabì to, kawèna wenza cintu cibì to; ùdi wìtabuuja maalu ònsò; ùdi ùnànkila, ne mwoyi mule.” Wamònu anyi?

¹⁴⁹ Kwikadi ukòkàngana to. Pàdi famiyè ùbwela mu makòkyanganyi, kùkòkyanganyi naabò to. Pàmba mamwèbè ne: “Ncikupeci cyàkàbìdi ne, udi muyè kuntu kwàka, ku èkèleeziyà wa kalé wàwa nànsha. Èè, wèwè, cyònsò cyùkaadi welela meeji mpindyewu, cikaadi ànu kulekela nsuki yèbè yileepa. Wàlu mufwànàngane ne ciikaakù kampànda cyà cikùlákàji.” Kwikadi wakòkàngana nendè nànsha.

Amba ne: “Èyowà, maamù. Bìdi ànu bìmpè. Mèmè ndi mukusange, ànu bu kwònsò eku. Nènku nèngìikalé ànu nkusambidila pàncidi ne mwoyi apa.” Wamònu anyi?

¹⁵⁰ Mpindyewu, kùkòkyanganyi to. Wamònu anyi? Cilunji cibì citu cilela ànu cilunji cibì. Katancì aka, udi ubungamija Nyumà Mwímpè bwà àkushiyè aye, newikale ukàadi pèèbè ànu ukòkàngana. Dìbà adi Nyumà Mwímpè ùdi wàsa masàlà n’Yèyè uyààya wàwa. Cilunji cibì citu cilela ànu cilunji cibì.

Kàdi dinanga ditu dilela dinanga. Ikala mùle tètè ne dinanga. Yesù wàkamba ne: “Ku cyòci eci nkwàmanyina bantu bònsò ne nudi bayiidi Bàanyi, panwikalà ne dinanga, muntu bwà mukwèndè.” Ki dimuma dyà Nyumà Mwímpè ndyòdi adi, dinanga.

¹⁵¹ Kàbìdi utu mumanyèku ne, udi mufùki wa kànàkànà, wèwè mwine awu anyi? Utu mumanyèku aci anyi? S’ncyà bushùwà. Ukàadi mumònemòne bantu baùdi ànu munange bwà bìikalé mu nyùngùlukilu webè. Kwèna mumanye ne mbwà cinyi to.

Ànu muntu wa dinanga dyà mùshindù awu awu. Nukààdikù bamòne aci anyi? Mwikale ànu ne musàngeelu, mwaba awu, wèwè munange kwikala pàmwè nendè. Aci cidi. . . Yèyè awu ùdi ujuula cyuyüya aci, ku nsòmbelu udiye nendè, ku mùshindù ùdiye uyiikila, ku yèndè miyiiki.

Pashiishe, ukàadi mumòne aba bàdi, misangu yònsò, udi— udi ubèèpuka. Dìbà dyònsò, bòbò mbaswè kwakula ànu pa cintu kampànda cyà cibi, ne kwakula bwà muntu kampànda. Bàmba ne: “Kaa, ekèlekèle! Nyàwù ùkaadi ùlwa’s. Neàbange kujaana muntu kampànda mwaba awu. Nyèwù wàbwèdi muneemu mpindyewu, neàkulè bwà muntu *kampànda*. Cyèndè pèndè cyònsò ciikalàye ne cyà kwamba cidi ànu kwenza kwà minèkù yà bundù, anyi cikampànda cyà citàngila bakàji, anyi cintu kampànda cyà mùshindù awu.” Udi umvwa ànu bikwenza bibi bwà kwikala pàmwè nendè. Wamònu anyi? Bàdi bacijuula. Pa kubàtàngila, mbantu bìmpè bàà dikèma’s, kàdi biikàle bajuula cyuyüya aci.

Kàdi bintu byùdi wèwè welela meeji abi, bintu byùdi wèwè wenza, byenzedi, bintu byùdi wakula, bidi bijuula cyuyüya kampànda.

¹⁵² Ngàkabwela mu bìrò byà muntu kampànda, muneemu mu cimenga emu. Muntu awu mmulubuludì, anyi mulami, èyo, mu èkèleeziyà kampànda wa mwìmpè. Mvwa mubwelemu bwà kumònangana ne muntu awu bwà bwalu kampànda. Ki cisanji aci mwaba awu, cìmba mijiki yà bidùndadùnda anyi yà maja à dijekeja dyà nyimà, cyònsò cìvwaku aci, dìyi dinangula ne penyì. Ne ndi ngeela meeji ne kùvwa fòtò makumi ànaayi milamika ku bimanu mu bìrò byèndè amu, yà bakàji butakà. Mpindyewu, kwèna mwà kungambila mùdi mulami, anyi ní ncinyi cikwàbò to. Undeeje wèwè ànu byùtù ubandila, ne byùtù ubala, ne mùshindù wà mijiki yùtù uteeleja, musùmbà wà bantu wùtù muswikàkane naawù, nènku mèmè nènkwambilè ne nnyumà kaayi udi munda mwèbè. Nwamònu anyi? Èyo.

¹⁵³ Umvwa muntu wàmba ne: “Mèmè ngenza *cikampànda*? Musùmbà awu. . .” Vùlukàayi ànu ne, ncyèna mèmè ncyùka bidìye wàmba abi to. Myàkù yèndè yidi yàkula ne dìyi dikolè kupita. Byenzedi byèndè bìdi byàkula ne dìyi dikolè kupita byònsò bìdi ní ncinyi cyònsò cìfwànyine kwamba. Mmufwànyine kufila majaadiki, kwamba mùdiye mwena Kilistò, cyà bushùwà, ne pàmwàpa kwenza ní ncinyi ní ncinyi. Kàdi tàngilàayi ànu mùshindù wà nsòmbelu udiye nendè. Aci ncidi cyàmba cidiye.

¹⁵⁴ Mpindyewu, udiku mwà kudìfwànyikijila ne, muntu ne nsòmbelu wa nàнку mmufwànine kwamba ne: “Kwitabuujà dyondopa dyà kùdi Nzambi, aci’s ncintu kampànda bwà nyuunyi’s. Aci cìvwaku kale kùkaadi bidimu. Cintu bu nàнку kaciyènakù leelù ewu anyi?” Awu nnsòmbelu mukùmbànyine Èvànjeeliyò anyi, wa ne: “Kilistò wàkatàpiibwa mpùtá bwà

kushipa kwètù kwà mikenji, ne ku mibùndàbùndà Yèndè tudì bondòpìibwè”? Wèwè udi wamba ne: “Kàdi mèmè’s ndi mulami.” Kí mbwalu to. S’udi mufwànyìne mene kwikala mwèpiskòpò.

¹⁵⁵ Pàngààkumvwà Mwèpiskòpò Sheen wàmba, kùkaadi bidimu bitwè ku bìbìdì, pààkapwekàye; ncyàkakàngulakù kàbìdì cisanji bwà kumutèèleja to. Pààkambàye ne: “Muntu udi mufwànyìne kwitabuuja ne kwikala ne nsòmbelu wa Bible awu, ùwva mufwànàngàne ne muntu udi uteeta kwenda upicila mu màyi à bitoci.” S’ m’Mwèpiskòpò Sheen, kàdi kukudimuka, kwamba ne: “Pàngààya mèmè mu Dyulu, nudi bamanyè mwikalà bwalu anyi? Pàngààtwilanganà mèmè ànu ne Yesù mwine awu, nèmMwambilè ne: ‘Kì mèmè Mwèpiskòpò Sheen ewu,’ ne Yèyè neàmbè ne: ‘Kaa, èyowà’s, mvwa ànu ngumvwa maamù Wanyi ukutèèla.’” Bumpàngaanu’s, bantu bàdi bafwànyìne kupenda Dìyi adi. Nzambi afweku luse. Mèmè ncyèna nzuji to. Nwamònu anyi?

Dìyi adi didi Bulelèlà. Cyà bushùwà. Ne Nyumà wa Nzambi neàjingulule Mufùndu Wèndè Yèyè mwine. Yèyè ùdi ùjaadikiibwa ku Mufùndu Wèndè. Ùdi—Ùdi—Ùdi wàkula ùMwamba Yèyè. Ne wèwè udi ujaadikiibwa pa kuWitabuuja, ne Wòwò ngùdì ùkupà mikànda yèbè yà dijaadikiibwa.

¹⁵⁶ Kukòkyanganyi ne bakwàbò to. Ne kanwì—nèku kanwikadi ne makòkyanganyi à mu famiye aa to, múngàmbì amu. Dinanga dùtu dilela dinanga. Ne cilunji cibi citu cilela ànu cilunji cibi.

¹⁵⁷ Mpindyewu, mpindyewu tütàngilèbi. Tàngila Yesù, bwà katanci kakesè cyanààna. Yèyè nguvwa cileejilu cyèbè. Ndi ntèkemenà ne kanwèna babange kutàmba kucyòka to. Tàngilàayi. Tutàngilàayi Yesù, bwà katanci kakesè cyanààna. Yèyè nguvwa cileejilu cyètù. Yèyè nguvwa mwambe aci. “Bwalu Ngànùpi cileejilu, bwà nwènzele bakwàbò múngánwènzèdì Mèmè emu.”

¹⁵⁸ Mpindyewu tàngilàayi. PààkalwàYe pa buloba, pàvwàku bupidyà bupitèpité, bwàbùngì pa buloba mwine musangu awu kupita mùvwàbu kacya, kacయాMutekeshakù nànsha lwendu to. Wàkatungunuka ànu ne kuyiisha byenze bu ne kakùvwa bwalu, ne wondopangana ànu bu ne kakùvwa bwalu. KacయాMutàcishakù to. Kùvwa badyùdi. Muntu awu wàkadyùdiibwa kubangila ànu ucidì Mwànà wa mu dibòko too ne pààkalwàYe kufwà ku nkùrusè. CyàkaMwimanyikakù anyi? To, mukalenge. Kiipàcilà Kèndè kàvwa cinyi? “Kwenza misangu yònsò ànu cidì Taatu mufunde. Kwenza misangu yònsò ànu civwà cìMusànkisha.”

¹⁵⁹ Tàngilàayi Yesù. Twamba pètù mutùtù tudipwekesha? Pààkashààla Nzambi Yèyè mwine Mwànà wa mu dibòko, pamutù pàà kulwila mu—mu kalààlu kakesè mu mwaba kampànda mu nzùbu wa ùfilakù kaneemu, wàkalediibwa mwàmwa pa mushiki wà tùmvi twà ngombe mu cikùmbì, munkaci mwà twànà

twà ngombe twikale tudila. Ki bôbò kuMujiingila mu mikùsù, yàkakùtululàbo ku cikokedi cyà pa nshingù pàà ngombe. Mupèlè mutambe ne bàdi batambe kwikala bapèlè, kàdi, pààbi, Mufùki wa mauu ne buloba.

¹⁶⁰ Dilòlò dikwàbò, dyà mashika ne mvùla, bôbò kwamba ne: “Mulongeshi, netùye Nèèbè Kwèbè kumbèlu.”

¹⁶¹ Yèyè ne: “Mikènge yitukù ne meenà, ne nyuunyi yitukù ne maswa, kàdi Mémè ncyèna nànsha ne kaaba kàà Mémè kutèeka mutù to.”

Nzambì, Yèhowàh, kuDipwekesha è kushààla Muntu; muleejibwe mu mubidi wà mpèkaatù, bwà kutùpikula wèwè ne mèmè. Tudi baanganyi dībà adi? Yèyè uvwa cileejilu cyètù. Ndi nganyi mèmè? Cintu cyanààna.

¹⁶² Mvwa ngàmbila muntu kampànda, mu mapingaja emu, mu kaacisangilu kakesè. Mémè kwamba ne: “Mwànà wa balùme yònsò udi mulela kùdi Nzambì bikèngela àteeciibwè, dyàmbedi, anyookiibwè.” Ndi mvùluka pàngàakapetà dyànyi, anyi dyànyi dībà dyà bwalu bukòlè. Pàdi—pàdi muntu ùlediibwa cyàkàbidi, kùdi kaaba kakesè, kenze bunène bu bwà luzàdi lwà ku munu wèndè alu, kàdi Nzambì wèla munda mwèndè, ndongolwelu, nènku kàdi kàpòna mu mwoyi wèndè ne kèèlamù lwongo. Pashìshe Sàtaanà ùdi ùmufikisha ku dikàjaadika. Kàdi kòkò aku kakàyimù to, kwèbè nkujike.

¹⁶³ Ndi mvùluka mu lupitaadi mwàmwa, mvwa ne bidimu bu makumi àbidi ne bìbidi, makumi àbidi ne bisàtù, pàmwàpa, bu nàнку awu, mvwa nsongàalùme. Ne taatù wanyì, ùpunga ne lufù mu mabòkò àanyi, kàdi pàanyi ngàakula ne Nzambì bu mwondopi. Ne taatù wanyì mundedi ne disaamà dyà mwoyi mwimane, mutèèkè mutù wèndè mu dibòkò dyànyi, ne mèmè mwikale mmusambidila; ne mmumòna ùkudimuna mèsù awu ùntàngila, utòkola dikoshi, bwà kuya kasangila ne Nzambì. Mémè kumwangata e kuya kamujiika ku luseke lwà mwakunyaanyi wa balùme, bilòngò byà bwalu bicikàle ànu bibishi pa lukità lwèndè, kàdi pàanyi mwikale nyiishangana Nzambì udi wondopa babèedi. Ngenza mudimu mu Kumpànyi wa Midimu yà Mbùlàmatadi, bàmfuta meeya makumi àbidi ku dībà dimwè, ne mukàjànyi wenza mudimu ku cyàpu cyà ditela dyà mitèèlù eku; bwà kudyàmbulwishaku bwà kumòna mwà kudiisha kànà kèètù kàà balùme kàà ngondo dikumi ne mwandamukùlù, Billy Paul, ne kànà kàà ngondo mwandamukùlù kàvwàye mwambùle pambidi.

Ngàmònu Mwanèètù wa bakàji Wilson ushikula mutù. Yèyè mmuvùlùke bwalu abu; Roy Slaughter ne bakwàbò bàà bikondo byà kale abu.

¹⁶⁴ Mvwa ngenza cinyi? Ngendakana mu mìsèèsù, ne dyàmpà dyela minyiinyi munda adi mu cyanza, ntùuluka ku dikunji, ngènda mfilà majaadiki kùdi muntu yònsò uvwa upicila mwaba

awu, bwà dinanga dyà Yesù Kilstò. Nya ku bilongolwedi byàbò byà màshinyi mbàlòmba ne mwawa mwà kubwelamù, bwà kwakula ne balongolodi bàà màshinyi. Mbwelamù, ngàmbe ne: “Balùmyànà, nwènù aba nukààdikù basùngidiibwe anyi? Mémè ndi mupete cintu kampànda munda mwà mwoyi wànyì.” Nya mbwela mu màkàjiiinyi àà byàkudya mu mēbà àà bufùku. Ngàalukila kumbèlu pa dībà ibidì anyi isàtù wa bufùkù, mfùma ku dikumbùla dyà babèèdi bufùkù bujimà. Nciyikù mwà. . . Ànu kusòmba, kushintulula bilàmbà ne kuvwàlà byà mudimu. Ne kusòmba mwaba awu mu nkwasà bwà kwikishaku too ne pàvwàbu bùcya, kukàtamuka kàdi kuya. Ne wa bwalu munyaane bikolè, bifùmìne ku dijila dyà byàkudya ne masambila, mu mùshindù wà ne bikèngela kusambila bwà mémè kuvwàla bikànù byà ku bisàbaatà, bwà kubànda ku dikunji. Nyiisha, ànu nyiisha bantu mùvwà Nzambi mwikale munène, mùvwà Nzambi ne luse, mùvwà Nzambi mwikale dinanga.

Kàdi, mwaba ewu, taatù wanyì munkaci mwà kupùnga ne lufù mu mabòkò àànyì. Ne mwakùnyàànyì wa balùme mufwè, mushipiibwè pàmvwà mēmè mwimane mu cyambilu muneemu emu, mu kaèkèleeziyà kakesè kàà beena Mpenta bàà bafiike aka, mwikale nyiisha. Bàlwa bàngambila ne: “Mwanèenù wa balùme bààmushipi mu cibeeba mwàmwa. Màshinyi mmamutuute ne kumushipa.” Mashi à mwanààbò sungasunga àmutùnkùmukila ku mutèèlù, pàakayàye kamwambula mu cibeeba amu. Ndi mwenze ànu mmujiika, taatù pèndè ùmba ùfwa. Pashiishe, ki mukàjàànyì udi mulaadika pààpa nàka wàwa.

¹⁶⁵ Ki mémè kuya, kulwila apa ku tabernacle eku. Ànu mwaba ewu mene, mwaba ùdi cyambilu eci cisanganyiiibwa ewu, mémè kwambila bantu, ngondo yisambòmbò kumpàla kwà bwalu abu kwenzekabù ne: “Nekùlwe dipààsalala dyà màyi. Ne ndi mumòne Mwanjèlò wàngata dilèngè, upima wàmbe ne: ‘Mètres àsambòmbò ne byà dikumi mwandamutekète kumutù kwà Mùsèèsù wà Spring.’”

Sandy Davis ne bakwàbò bàvwa basòmbè mwaba ewu, kusekabo, bàmba ne: “Mu cidimu cyà 1884 s’bivwa ànu centimètres bu makumi àbìdì anyi makumi àbìdì ne itaanu nànkù awu, mwànà wetù. Cidi cyàkula neebè ncinganyi?”

¹⁶⁶ Mémè kwamba ne: “Ki mwikalàbi. Bwalu, ngàmònu ùmwè wa ku mìshindù yà dibwela dyà mu nyumà adi, ne Cyòci ncidi cingambile nànkù. Nènku ki ciikalàku.” Nènku kùdi cimanyinu mu Mùsèèsù wa Spring, leelù ewu, pa bule bwà mètres àsambòmbò ne byà dikumi mwandamutekète pàvwà màyi mafikè. Mémè kwamba ne: “Mvwa ngenda mpicila mu bwàtù kuulu kwà tabernacle ewu.” Ne ngàkapicilakù.

¹⁶⁷ Mu ciine cikondo aci, mukàjàànyì kusaamayè. Mémè kumusambidila. Nènku mémè kulwa ku tabernacle, ne bantu

biikale bamwindile. Mémè kwamba ne: “Ùdi munkaci mwà kupùnga ne lufù.”

“Kaa, ùdi ànu mukàjèèbè, awu.”

¹⁶⁸ Mémè ne: “Ùdi munkaci mwà kupùnga ne lufù.”

Mémè kuyaku e kusambila kusambila kusambila. Ki mémè kwolola byanza. Kunkwàtayè ku cyanza. Kwambayè ne: “Billy, nèntwilanganè nèèbè mu dindà, mwimànyìne lwà Kwàka.” Yèyè ne: “Wàkungwija bàna bwà nwàtwilangana nàanyi ku Ciibi.”

¹⁶⁹ Mémè kwamba ne: “Ubange ànu kwela mbilà ne: ‘Bill.’ NèngikalèKu.” Nwamònu anyi? Ki kupàtùkayè. Mémè kuya kamutèeka mu nzùbu wa bitàlu kwinshi kwàka.

Mémè kwalukila kumbèlu, bwà kudyòlolakù. Nènkù mémè mumane kuya. . . Billy Paul mwàna ùvwa mushààle ne Mandamu Broy ne bakwàbò, ùsaama bikolè. Ngàngàbukà ùvwa mutekèmene ne neàfwe nànsha pa dībà kanà dyònsò. Pàanyi mwikale nsambidila Billy. Kàdi ki Mwanèètù Frank ulwàlwa ewu bwà kungangata. Yèyè ne: “Mwanèèbè wa mu dibòko ùkaadi ùpùnga ne lufù, kànà kèèbè kàa bakàji aku.”

¹⁷⁰ Mémè kupàtuka mu lùpitaadi. Ngàngàbukà Adair kàyì mwà kungitabilakù bwà mémè kubwelamù to, wàmba ne: “Ùdi ùsaama nshìngù wa kabààlà. Neùmutampakajile Billy Paul.” Kwambilaye mungàngà mukàji bwà kumpaye kaacintu kakwàbò kakùnze kàa mùshindù kampànda kàa kwangata, kàa bwanga bwà mùshindù kampànda bwà dilààdikangana citànàtànà, kaacintu kampànda bwà kuntuuyishakù naakù cilunji. Ki mémè kubàlòmba bwà kupàtùkabò mu cibambalu amu, mémè kukiimanshila pa dididiishi. Mémè kudifinda kupàtùkila ku ciibi cyà kumfundu, e kupweka mu nzùbu wa mwinshi mwà buloba.

Ki mwànàanyi wa mu dibòko awu udi mulàadika pàapa wàwa, kumpàlà kwà lùpitaadi, mu cibambalu cyà pa bule cyà lùpitaadi, ne njiiji mu mèsù mwònsò emu mùshindù awu. Mémè kwangata mushètekelè wà kale, kuyiipata, ne kumutèekawu pambidi. Mémè kutwa binù, kwamba ne: “Nzambi, ki tatwanyi ne mwakunyaanyi wa balume bàdi balààle muntu mwàmwa bàba, kwàka nàka, ne bilòngò bicikàle pa nkità yàbò. Ki Hope udi mulààle pàapa wàwa, mulààle kwàka nàka. Nènkù ki mwànàanyi wa mu dibòko nyéyè ewu, ùpùnga ne lufù. Kumwangaci kwòkò to, Mukalenge.”

¹⁷¹ Yèyè kàdi kumbà kupwekesha ne cilambà cikùdika, byenze bu udi wàmba ne: “Bwikila mukana. Ncyèna muswè kukutèeleja to, nànsha kakesè.” Kàyì muswèku nànsha bwà kungaakwisha to.

¹⁷² Dībà adi, piikalàbi ne Yèyè kàvwa muswè kungaakwisha to, ki dībà dilèla Sàtaanà ndyòdi adi. Yèyè ne: “Kàdi pàanyi's mvwa ndyambidila ne wèwè ewu uvwa wamba ne Yèyè ùtu

Nzambì mwîmpè. Byònsò byúvwà welela mbila ebi mbinganyi? Pèèbè mucíkàlè ànu nsongààlùme. Anji kenzakana ùmonè, mu cimenga cijimà. Nsongààkàjì yònsò ne nsongààlùme yònsò yúvwà muswikàkane naayi yìkaadi yèla meeji ne wèwè wájìmiji lungenyi. S'wàlùjìmiji.” Mpindyewu, kàvwakù mwà kungambila ne Nzambì kàtukù to, bwalu mèmè nkaavwa mumane kuCimone. Kàdi kungambilaye ne Yèyè kàvwa ùncyùka to.

¹⁷³ Nsòmba bufùkù bujimà, mundaamuunyà mujimà. Mèmè kucyàmbila Nzambì ne: “Cìndì mèmè ewu mwenze ncinyi? Anji kundleejaaku, Mukalenge. Kwitabi bwà ewu udi kàyi ne cidìye mwenze àkengè pa mwaba wànyì mèmè to, piikalàbi ne mèmè ngudi mwenze bubì.” Ncìvwa mumanye ne Yèyè ùvwa munkacì mwà kunteeta to. Kàdi mwànà wa balùme yònsò udi ulwa kùdì Nzambì bikèngela àteeciibwè. Mèmè kwamba ne: “Ungambile ànu cìndì mwenze. Nèncìlongòlòlè. Cìndì mwenze ncinyi pa kuumusha diyìsha mundaamuunyà mujimà, bufùkù bujimà, ne kuMupa ànu kwà mwoyi wànyì, díbà dyònsò? Cìndì mwenze mèmè ewu ncinyi?”

Sàtaanà kwambaye ne: “S'ncyà bushùwà. Wamònu's, mpindyewu, pàkaadibi ne ngwèwè, pèèbè mumane kwambila bònsò abu mùdì watabuuja ne Yèyè mmwondopi munène, kàdi's ki mwànèèbè wa mu dibòko awu mulààdika apu, ùpunga ne lufù. Wa bwalu Yèyè ùbènga ne kutèèleja. Mukàjèèbè mufwè disaamà dyà cyàdì dyà bisulusulu. Pèèbè uvwa ànu wamba ne Yèyè ùvwa mwà kwondopa tunsèrè, kàdi's ki Yèyè awu. Tèntè suu, wamba pèèbè mùdìYe mwîmpè, ne mùdìYe mwîmpè kùdì bantu. Kàdi kùdì wèwè?”

¹⁷⁴ Ki mèmè kubanga kumutèèleja's. Ki dilukakaja dyà lungenyi ndyòdì adi. Ndyambidila ne: “S'ncyà bushùwà's.”

Yèyè ne: “Yèyè's ùdì mwà kwamba. . . kabyèna bìkèngela bwà wèwè kwamba Dìyì to, *kutangila* ànu mwànèèbè awu cyanàànà, yèyè's mmufwanyine kwikala ne mwoyi.”

Mèmè ne: “Aci's ncyà bushùwà.”

“Ne búngì bwònsò bwà byúdi wèwè ewu muMwenzele ebi, nànsa nàнку aci ki cidìYe ukwenzela's.”

¹⁷⁵ Mèmè ne: “Ncyà bushùwà's.” Mèmè kubanga kwela meeji ne: “Èè, cinyi?” Nwamònu anyi? Byònsò kubanga kushààla binguumuka, pààkafikàbi ku dilukakaja dyà ngenyi. Kàdi, mbyenze ànu bikafika ku Aci anyi, Aci kukulama's. Kushààlacì mwaba awu. Nkaavwa ànu pabwîpì ne kwamba ne: “Nàнку ndi mbilekela.”

Kàdi pààkafikàbi panshì mu mùshindù wà makolè ònsò à dilukakaja dyà ngenyi manguumùke, ki kufikabi ku Mwoyi wà Cyendèlèèlè awu, Dilediibwa dipyadìpyà adi. Ambààyìbì tǔng bu ne kaWùvwamù? Ambààyìbì tǔng bu ne kaWùvwamù? Nùнку katùvwakù bafwànyìne kwikala bamanyangàne mutùdì bamanyangàne mpindyewu emu to. Nùнку èkèleeziyà ewu

kàvwa mufwànyine kwikala mwaba ewu mùshindù ewu to, binunu ne miliyò bidi mu nyungulukilu mujimà wa buloba ebi. Kàdi, Nzambi twasàkidila, Yèyè awu ùvwakù.

¹⁷⁶ Kàdi ndi mwenze ànu ndyàmbridila ne: “Cinyi? Mémè ewu ndi nganyi’s, twamb’eku twamb’eku? Ndi nganyi, bwà kwela bunène Bwèndè mpatà? Ndi nganyi, bwà kwela Mufùki wàkampa wànyì mwoyi mwine pa buloba apa mpatà? Mwine mwànà awu mwawa mumupetèle penyì? Uvwa mumumpèeshe mwine awu ùvwa nganyi? Kèna nànsha wanyi to, twamb’eku twamb’eku. Yèyè nguvwa ànu mumunsombèshe cyanààna, bwà cikondo cikesè.”

Mémè kwamba ne: “Sàtaanà, nguumukila apa.” Mémè kuya, kutenteka cyanza pambidi pà mwànà. Mémè kwamba ne: “Nzambi àkubènèshè, munanga wanyi. Mu kasunsa kàmwè emu, papa neàkwambule apweke neebè, àkutèeke mu mabòkò à maman. Banjèlò nebàngate kaamusùukà kèèbè kakesè aku bàye nààkù. Ne mémè nèntwilanganè nènù mu dindà adi.”

Mémè ne: “Mukalenge, Wèwè nguvwa mumupèeshe. Wèwè nyèwù ukàadi umwangata bwà kuya nendè. Nànsha bu Wèwè mwà kunshipa mémè, bu mwàkambà Yobò, nànsha nànkù, mémè ndi ànu muKunange ne muKwitàbùùje. Wèwè muntume mu iferno, nènKunangè, nànsha nànkù. Ncyèna mwà kutàpulukaku ne cyòci aci nànsha.” Ki bwalu mbwòbò abu’s.

Bu biikàle ànu byà meeji à mu mutù, nùnkù byònsò mbinguumuke. Kàdi bikèngela wikalè ne malanda à sungansunga. Bidi bikèngela wikalè mulediibwe cyàkàbidi.

¹⁷⁷ Ki cidi cyèenza ne bambi biikalè bàseesuka, majitu manène ne bikwàbò. Bàmba ne: “Cintu pààci ne ndyondopa dyà kùdi Nzambi kacitukù to. Bintu byà mùshindù awu kabitukù to.” Kabàtu banji kufika mu buloba bunsantu amu to, bu mùmvwà ngàmba mu dindà emu amu. Kí mbamanyè cintu pa bidi biCitàngila to. Mmunyi mùdìbo mwà kwamba mùdìbo bânà bàà Nzambi, kàdi kuvila Dìyì dyà Nzambi? Mmunyi mùdì mwà kucyèenza, uvila Nyumà Mwimpè mwine utu mukusùmbe?

¹⁷⁸ Kaa, ùvùlukè ànu ne, Yesù wàkaDìpwekesha, too ne ku lufù, bwèbè wèwè. Yèyè kàvwa ne makòkyanganyi to. PààkaMutwilàbo matè mwísù, Kààkatwilàngana pèndè matè to. PààkaMutùlàbo myedi, Yèyè kààkabàtùùla yàbò ayi to. PààkaMutàpàbo dipi ku ditàmà, ne ku dikwàbò, Yèyè kààkabàtàpakù pààbò dipi to. Wàkabàsambidila, kutùngunuka ne kuya, mu didipwekesha dyònsò. Yèyè ùvwa cileejilu cyà didipwekesha.

¹⁷⁹ Yèyè ùvwa mùle tètè ne diitabuujà. Bwà cinyi? Ùvwa mumanyè ne Méyì Èndè kaàvwa mwà kupangila to. Ùvwa Yèyè menemene ne nsòmbelu wà Dìyì mu mùshindù wà ne Wàkashààla Dìyì.

Éyi Nzambi wa yààya! Ndekelaku ngiikalè mwolole byanza byanyi byònsò bibidì kùdi Nzambi, kumpàla kwà batèèleji aba. Ngiikalèku ne nsombelu wa nàнку. Díyi edi divwijiibwè mu mùshindù wa ne, mémè ne Díyi edi twikalè cintu cimwè: méyi àanyi ikalè Díyi edi; dyelangana dyanyi dyà meeji mu mwoyi wanyi; Yèyè ikalè mu mwoyi wanyi, mu meeji àanyi; nswike mikenji Yèndè ku dikunji dyà meeji àanyi; ùyiswikè ku dikunji dyà mwoyi wanyi; ngiikalè mMumòna ànu Yèyè; pàajukà diteeciibwa, mmonè Kilstò; pàanyanguka maalu, mMumòna ànu Yèyè; pàngiikalè mudilongòlòle, kàdi mwena lukuna ùkèba bwà kumfikisha ku difika dyà munda, mmonè Yesù, cidìYe mufwanyi kwenza ncinyi?

¹⁸⁰ Yèyè ùvwa mutàmbe kwikala mu Díyi, mu mùshindù wa ne Yèyè ne Díyi byàkashàala cintu cimwè. Tàngilàayi.

¹⁸¹ Kabivwa bikèngela bwà kukòkànganaYè to. Yèyè ùvwa mumanyè ne Yèyè ne Díyi bìvwa cintu cimwè. Ùvwa mumanyè ne Yèyè ùvwa Díyi dyà Nzambi dimwèneshiibwe, ne ndekeelu wa byònsò díyi dituma dyà Nzambi nedikwatè buloba ku bukòokeshi bwàdi. Ùvwa mumanyè aci, Díyi Dyèndè. Ùvwa ne diitabuuja. Ùvwa mumanyè mwaba ùvwaYe. Kabivwa bikèngela kwelanganaYè mpatà to, wamba ne: “Mòna, nudi mwà kulwa *apa*.”

¹⁸² Dyabùlù kwambayè ne: “Mpindyewu, tàngilà, Wèwè’s udi mwà kwenza bishimà. Udi mumanyè ne Udi ne diitabuuja dinène. Udi mwà kwenza bishimà. Mémè nènKwibàkilè nzùbu, mupite wa Oral Roberts misangu yìbidì ku bunène. Bwalu, bantu bònsò... Ci—cintu cimwèpelè cidì cikèngela Wèwè kwenza, s’nkubàleeja. Tùpikà ku nzùbu ewu, udyèlè ànu panshi cyanààna, bwalu udi umòna’s, bàakafùnda ne: ‘Banjèlò nebàKwambùlè, bwà nànsha díba kaayi kùlù kutuuta dikàsà ku dibwe to.’” Nwamònu anyi?

Yèyè’s ùvwa mumanyè ne Ùvwa ne bukolè. Ùvwa mumanyè ne Ùvwa mwà kucyènza. Ùvwa mumanyè ne civwa munda Mwèndè, kàdi Kàvwa muswè kukwàta naaci mudimu to ànu pàvwà Nzambi mwà kuMwambila bwà kucyènza. Nwamònu anyi? Mmuswè ne ciikalè Nzambi munda Mwèndè, ciikalè Díyi mu byònsò. Ne Yèyè ùvwa mumanyè ne, pàvwàYe wamba cintu kampànda, civwa n’Díyi dyà Nzambi; ne nànsha bu maulu ne buloba mwà kujimina, Díyi adi nedikòokeshè dīngà ditùkù.

¹⁸³ Yèyè kàvwa ne makòkyanganyi ne dibìnduluka to. Ùvwa wamba ànu Méyi à Nzambi. Díyi dyònsò dyàkapàtukà ku Yèndè mishiku divwa Díyi dilaaba dyà Nzambi.

Kì mbifwanyi neku kwikala bilenga byà menemene bu twètù mwà kwamba ne: “Díyi dyanyi ne Díyi dyà Nzambi bìdi cintu cimwè. Cìndi mémè ngàmba, Yèyè ùdi ùcìtwa mushinga, bwalu ncyèna ngènza cintu to pàdiYe kàyi mucingambilè

dyàmbedi”? Kaa, s’ki cileejilu cyèbè ncyôci aci. S’ki nsòmbelu mukùmbànyine Èvànjeeliyò nyèyè awu.

¹⁸⁴ Kî mbaakwidi bàvwa balonge túlaasà bikolè bashààle bàà kapelu abu to, ne biikale ne ngiikàdilu yònsò minène yà kuneemekiibwa ayi, biimana bènza masambila maleemàlè, kàdi banyangakaja nzùbu yà bakàji bakàmbà, ne biikale bazùkila nkwasà mitùmbùke mu—mu disangisha, bintu byònsò ebi muntwamu. Bàvwa...Awu kàvwa nsòmbelu mukùmbànyine Èvànjeeliyò to.

Kàdi Yèyè ùvwa mukùmbànyine Èvànjeeliyò, bikolè menemene, mu mùshindù wa ne Nzambi wàkamba ne: “Ewu m’Mwan’Àanyi munanga, mu Yèyè mmùndi nsankila bìmpè. Mutèèlèjaayi Yèyè. Dìyì Dyanyi n’Yèyè. Yèyè ki Dìyì Dyanyi. Yèyè ne Mèmè tudi cintu cìmwè.”

¹⁸⁵ Manyàayi, tàngilàayi eci mpindyewu. Yèyè ùvwa mumanye ne ndekeelu wa byònsò Dìyì Dyèndè nedikwate buloba ku bukòokeshi bwàdì. Ùvwa mumanyè kùvwa Dìyì Dyèndè difùme. Ùvwa mumanyè ne Dyòdi kadivwakù mwà kupangila to, ki bwà cinyi Wàkamba ne: “Maulu ne buloba byònsò bìbìdì nebijimine, kàdi Dìyì Dyanyi kadyàkupangilakù to.” Nwamònu anyi? Ùvwa mwà kwamba nàнку. Awu ùvwa Muntu Ùvwa Yèyè ne Dìyì dyà Nzambi bishààle cintu cìmwè. Wàkabàmbila . . .

“Bìvwa bikèngela wènzè *cikampànda* ne *cikansanga*.”

¹⁸⁶ Yèyè kwamba ne: “Nganyi udi mwà kumpiisha Mèmè bwà mpèkaatù? Udi mwà kumfùnda Mèmè nganyi?” *Mpèkaatù* ùtu “bupidyà.” “Pìikalàbi ne Mèmè, ku munu wà Nzambi, Ndi ngiipata badémons, bàna bèènu balela bàdi bayiipata ku nganyi?” Nwamònu anyi? Kacivwa aci to, nàнку bìvwa bikèngela kwikalaci cintu kampànda cikwàbò. Nwamònu anyi? “Pìikalàbi ne Mèmè . . .”

Bòbò ne: “Èè, twètù’s tukàadi biipate badémons.”

¹⁸⁷ Yèyè kwamba ne: “Pìikalàbi ne Mèmè ndi ncyènza ku munu wà Nzambi, Dìyì dyà Nzambi dishindikiiibwe, mwaba awu bàna bèènu balela bàdi bayiipata ku nganyi? Nènku nwènù nwikale balumbulwishi’s.”

¹⁸⁸ Bantu bàà mu matùkù Èndè awu, bantu abu mbàvwa bàMuseka, bàMwamba Yèyè. Kadi, Yèyè, bààkaMupwekesha milongo, mu mùshindù wònsò ùvwàbo bafwànyine kwenza awu. BàMwamba maalu mabì à mishindù yònsò, bwà kuMulwisha, kàdi Yèyè ànu mutùngùnùke.

Mpindyewu ndi muswè kujikija mu katanci kakesè emu, mwikale ngàmba bwalu ebu.

¹⁸⁹ Bantu bàà matùkù aa mmusùmbà wà bantu banyùngùluke mitù. Bantu bàà ditùkù edi mmusùmbà wà bantu banyùngùluke mitù. Bàdi ne bwòwà bwà kwangata milayi yà Nzambi. Bantu beena èkèleeziyà, bulongolodi bwà èkèleeziyà, malongolodi à

èkèleeziyà àdi ne bwôwà bwà kwangata kadyòmbò kàà Mufùndu wà Nzambi bwà ditùkù edi. Mbamanyè. Mbamanyè ne ngiikàdilù yàbò yà cyena leelù ne èvànjeeliyò wabò wa nsömbelu mulenga udibò bàyiisha awu kabyàkupetangana ne kadyòmbò kàà dîbà edi to, ànu mùvwàbì ne Shimishòònà kàvwa mwà kupetangana naakù mu wendè ngiikàdilù to. Bìvwa bìkèngela Nzambi.

Nènku ndongamu udi mucilayè nyèyè ewu. Nèmfikè ku cyòci aci mu katanci kakesè emu.

¹⁹⁰ Ndi muswè kushààla mulame dîyi adi, katanci kakesè. Nànsha mùdìbò badìbìikila ne mbeena Kilistò amu, bàdi bìitaba twitabàayi, twitabàayi mikwàtakaja kùdì bantu, bwà kwangatayi kaaba kàà Dîyi dyà Nzambi. Pa nànkù, badi mwà kwangata twitabàayi awu, bwalu bantu mbàdi bamukwàtakaje. Kàdi bàdi ne bwôwà bwà kutèekela diitabuuja dyàbò mu Nzambi udibo bàlaka mukana mùdìbò baMunange awu. Ncyà bushùwà. Ki pashiishe nwènù kwamba ne nsömbelu awu mmukùmbànyine Èvànjeeliyò anyi? Kabyèna mwà kwenzekakù to, nànsha mùdìbò bidimba byà èkèleeziyà amu. Kàdi aci kî ncikùmbànyine Èvànjeeliyò to. To, nànsha kakesè.

¹⁹¹ Èvànjeeliyò! Yesù wàkamba ne: “Ndaayi pa buloba bujimà nukayiishè Èvànjeeliyò kùdì cifùkiibwà cyònsò. Bimanyinu ebi nebìfilè beena kwitabuuja.”

Kàdi paùdi uvila ne aci kacyèna cilonda beena kwitabuuja, mmunyi mùdì mwà kwikala ne nsömbelu. . . Nànsha nànkù, udi mùfwànyine kwikala kùyikù mwambe dîyi dibì to, udi mùfwànyine kulama mikenji yònsò dikumi, aci kacyàkwikala ne dipetangana nànsha dimwè ne cyòci aci to. Kacyèna ànu cikùmbànyine Èvànjeeliyò to. Nwamònu anyi? Kî ncifwànyinekù kwikala cikùmbànyine to.

Baakwidi abu's bàvwa balamè cyòci aci, kàdi kabàvwa ànu bakùmbànyine to. Yèyè wàkamba ne: “Nwènù nudi bàà tatwènù, dyabùlù.” Nganyi uvwakù mùfwànyine kutwà munu pa umwe wa ku biine bantu abu? Katòba kàmwè kàà dipiila, muntu ùvwa wàshiibwa mabwe kakùyi luse to. Bantu bàà cijila! Kàdi Yesù wàkamba ne: “Nwènù nudi bàà tatwènù, dyabùlù,” pàkafika Èvànjeeliyò.

¹⁹² Nànsha bòbò bàdìbìikila ne mbeena Kilistò, mbanange kwikala bakwàte ku twitabàayi, twitabàayi yàbò bòbò. Kaa! Twitabàayi yidi yìbweja ne yikumbaja ngeelèlù wa meeji wa bantu bàà cyena leelù bàà ditùkù edi. Kàdi muntu wìkala mwà kutuuta dyàkalenga mu ditùkù edi, bìkèngela àlonde mmwenenu wa ngeelèlù wa meeji wa cyena leelù ewu. Lekèlàayi ngàmbe bwalu abu mu mùshindù mwìmpè ne mutòòke. Nwamònu anyi? Muntu, pawikalà muswè kutuuta dyàkalenga, bìkèngela ulonde ngeelèlù wa meeji wa cyena leelù wa ditùkù edi. Cìdi. . . Bàdi bàya eku ne eku, bàmba ne: “Kaa, kî ngwa musàngeelu anyi? Kî mmulenga wa dikèma anyi? Yèyè ùdi mwà kushààla ànu mwaba

awu kacya wàsulama, kàyì mwà kutùlamaku tusunsa tupite pa dikumi ne tùtaanu to. Ne wetù mpaasàtà kàtu ùtùkùmakù bisùsu byà mēyì mashilè bwà miine maalu aa to.”

Bundù bwà mwine mpaasàtà awu. Muntu nànsha bàmwamba ne nganyì wadìdinga kwimana mu cyambilu mutàngile mpèkaatù wa ditùkù edi, kàdi kàyì umwelela mbila to, kùdi cintu kampànda cipampàlamùke mu muntu awu. Kì mmukùmbànyine Èvànjeeliyò udiyè ùlaka mukana ne ùdi ùyiisha awu to. Ncyà bushùwà. Pa nànkù, mu kwenza kwà nànkù, bàdi bàdìfidila tubingilà, mu kwamba ne: “Mpindyewu, tàngilàayi, nwènu disangisha dyànyì!”

¹⁹³ Mu—muntu mukwàb kulwa apa, ànu àbìdì àdì panshì aa, wa mu èkèleeziyà kampànda wa munène, mwikale ùfunda mukàndà wà cibungu. Ki yèyè ne: “Ndi mfùnda pa dyondopa dyà kùdi Nzambì.” Yèyè ne: “Mwanèètù Branham, tudi bakunange, mu dīgumba dyètù.” Dìmwè dyà ku màngumba à matàmbe bunène, òmwè dyà ku àdì matàmbe bunène à mu ditungu edi, anyì à pa buloba. Ki yèyè ne: “Tudi bakunange, mu dīgumba edi.” Ùvwa mwaba ewu mene ku Villa wa Jefferson eku. Kàdi, yèyè ne: “Ndi mulwè bwà kujandula pa bìdi bitàngila diine dyondopa dyà kùdi Nzambì edi.” Yèyè ne: “Mu bushùwà bwà bwalu kùdi cilema ànu cìmwèpelè cìdì wanyì èkèleeziyà mupetè.” Nwamònu anyì? Yèyè ne: “Wèwè udi muswikàkane ne beena Mpenta bapitèpitè búngì.”

Mémè ne: “Èè, mpindyewu, udi mumanyè’s, bwà aci’s ncyà bushùwà.” Mémè ne: “Aci ncilelèlè. Udi mumanyè’s, mémè nkaadikù ànu mukèbèkèbè mpungà wa kubèèpuka’s.” Mémè ne: “Nènkwabìlè cìdì bwalu. Nèndwe mu cimenga cyènu nwènu amu, wàmBILE èkèleeziyà wenù bwà àntùùdile mfranga.”

“Akàà,” ki yèyè awu, “kì mbafwànyine kwitaba to.”

Mémè kwamba ne: “S’ki cìmvwà ndyàmBìdila aci. S’ki cìmvwà ndyàmBìdila ncyòcì aci.”

¹⁹⁴ Yèyè kwamba ne: “Udi umòna’s, dyànyì dīgumba kadyàkutwàla aci to.” Aci’s cìdì ànu kabingilà menemene, bu kàà ne: “Ndi mfùma ku disèla mukàjì,” anyì “ku disumba ngombe yà cikòkedi.” Bwànyì mémè nànsha wèwè ne màpòlomè à bu-docteur búngì munyì, nànsha bakwangàta ne musinga wà bishi, kùdi dīgumba dyèbè. Mudimu wà bwambi wà mùshindù awu kì mmukùmbànyine Èvànjeeliyò udi mufùndiibwe mu Mukàndà ewu awu to. Bushùwà’s.

¹⁹⁵ Cidimba cyà èkèleeziyà kanà cyònsò cyàsungula bwà kwikala ku luseke lwà cintu bu nànkù awu, kàdi kudibìkila mwena Kilistò! Ne kupàtuka apa kàdi kwikala ne nsòmbelu. . . Ne bakàjì babebula nsukì, ne bàvwàla bilàmbà bìdì Bible wàmBA bwà kabàvwàdi abi. Balùme bènza maalu à lukutukutu mùdìbo bènza mpindyewu emu, “cìmwènèkelu cyà difwànà dyà Nzambì,” bànwà maala ne bànwà bifwankà, ne basèla bakàjì

misangu yàbúngì kàdi biikale bàshààla balami mu èkèleeziyà ne mene bampaasàtà, ne bikwàbò. Ne bantu biine bàdi biitaba bintu byà mùshindù awu abu, nsòmbelu wa mùshindù awu kî mmukùmbànyine Èvànjeeliyò nànsha.

¹⁹⁶ Mukàjì wa wèndàkana, kàdi kutwà cianza pa telèfonè ne kubanga kabwabwa, kàdi kubanga makòkyanganyi mu èkèleeziyà, ne bintu byà mùshindù awu, awu kî nnsòmbelu mukùmbànyine Èvànjeeliyò utwikala mwà kwimanyina to. Muntu nànsha bàmwamba ne nganyi wadìdinga kukosolola èkèleeziyà, ne kubanga makòkyanganyi à biiji pankaci pàa bantu, ne bintu byà mùshindù awu, kî mmukùmbànyine Èvànjeeliyò utùdi tuyiisha to. Menemene's. "Ncimwènekelu cyà difwànà dyà Nzambì, biikàle bavila bukolè bwàdì," bwine bukolè bwà Nzambì bùdi bìnùlamà ku byà nàнку awu abu.

¹⁹⁷ Mònaayi, mpindyewu, bôbò kabèèna babyènza to. Kabààkuswa bwà kubyènzakù to. Bàdi ne kabingilà, kàà ne, èkèleeziyà wabò bôbò kàtu wìtabuuja Aci to. Bàdi . . .

Èè, kàdi, Yesù's mmufwànyine kwambila—kwambila muntu, dilòòlò edì, kwakula ne mwoyi wèndè wàmba ne: "Ndi muswè ùye, ùkayiishe Èvànjeeliyò mu kaabujimà."

"Wanyi èkèleeziyà kàtu ùtwàla Aci to, Mukalenge. Wamfwilakù luse, bu Wèwè mwà kuswà. Mémè ndi ne bujitu bwìmpè be bungoomekela. Ndi—ndi—ndi, Udi mumanyè's, ndi mpaasàtà, wa umwe wa ku èkèleeziyà yà mitámbe bunène yà mu cimenga eci, Mukalenge. Kaa, twètù's tutu tutùmbisha Dìna Dyèbè mwómò amu! Èyowà's, Mukalenge. S'ncitùtù twenza bushùwà. Ncyènà mwà kucyènza to." Kabingilà kàmwèkàmwè aku, cintu ànu cyôci cimwècimwè aci. Pa nàнку kabèèna bàlwa ku difestò dyà nyumà dyà mulayi Wèndè to, Dìyi dishìndika.

¹⁹⁸ Yesù kààkambakù ne: "Mwaba ùdi citalu awu, ki wàdisangishila mikankù" anyi? "Mikankù," kadi, kî ntubangu nyuunyi to. Mikankù! Mwaba udi bishààdilà awu, ne—ne—munyiinyi mubolè, dìbà adi kaayi tubangu nyuunyi tùdi tùdisanga. Kàdi mwaba udi Munyiinyi mubishi, mukezùke, ki wàdisanga mikankù. Nwamònu anyi? Cyà bushùwà. Mwaba ùdi Dìyi, Cyakudyà cyà mikankù, ki wàdisangayi.

¹⁹⁹ Pa nàнку kabèèna balwa ku difestò dyà nyumà kùdìbo babàbiikilè to. Nudi nwtabuujà ne Nzambì mmupè Àmèrikè dìbiikila, bidimu dikumi ne bitaanu bishààle ebi, ku ditàbuluujà dinène, ku difestò dyà nyumà anyi? Mbalwè anyi? To, mukalenge. To, mukalenge. Nènku, kubenga bwà kulwa, awu nnsòmbelu mukùmbànyine Èvànjeeliyò, nànsha mùdìbo bôbò biine bàmbiikila nàнку awu anyi?

²⁰⁰ Pàvwà muntu kampànda mulwè kùndì, àbìdì àdì panshì aa, kusòmbayè ku mèèsà, wàmba ne: "Mwanèètù Branham, ndi muswè bwà kwelaku cianza dyàmwàmwà dyà mèèsà adi," muntu munène's, "ndi muswè nkukwàtèku ku cianza. Ndi

mukunange.” Mvwa mu èkèleeziyà kampànda mumutèèlèje pàvwàye ùyiisha. Yèyè ne: “Ndi mukunange. Ndi ngiitabuuja ne udi musadidi wa Nzambi.”

Mémè ne: “Twasàkidila’s, docteur. Ndi mukunange, mémè pàànyì.”

Yèyè ne: “Ndi muswè nkwambilè búngì bwà dinanga dīndi mukunange naadi, bu mwanèètù.” Ki yèyè ne: “Udi umòna kaamukalenge-mukàji kàànyì kàdi kasòmbe mwab’ewu aka, mukàjàànyì ewu? Udi mumuvùlùkekù anyì?”

Mémè ne: “Ndi mumuvùlùke.”

Yèyè ne: “Ngàngàbukà ùvwa mumupè mbingu yìbìdi ne ki yìvwaye mwà kwikala ne mwoyi, bwà kansèrè kàà mapondo-mapondo. Kàdi wèwè kulwa mu cimenga e kumusambidila. Utàngila muulu, wèwè kumòna cikèènà-kumòna. Ukùdimuka nùku wèwè kungambila ne: ‘EMU MMÙDÌ MUKALENGE WÀMBA, yèyè neòndopiibwè.’” Dikeji dinène paanyimà pèndè, pabùyike mùshindù ewu, cyenze bu mùdi cintu cinène menemene... bu citùpà cyà dibèèle dyà mukàji bacikòkèle lwà munda, paanyimà pèndè apu, ànu lwà pa mwongo wèndè menemene apu. Kapàcyena dikeji nànsha òmwè dyà cyòci aci to, leelù ewu. Yèyè ne: “Ki mukalenge-mukàji wanyì udi musòmbe wàwa, mwikale ne mwoyi leelù ewu.” Yèyè ne: “Mmunyi mùndi mwà kwenza cingà cintu pìikalàci kaciyì dikunanga, bwà disambila dyà dītabuuja diwàkasambilà adi? Mmunyi mùndi mwà kubènga kwitabuuja mùdi mu—musadidi wa Mukalenge, pawàkammòna, ne kungambila ànu menemene cìvwà mwà kwenzeka?” Yèyè ne: “Mpindyewu nyèwù ndikù ne kaacintu kampànda bwèbè wèwè, Mwanèètù Branham.” Yèyè ne: “Ntu mwena nsangilu udi mutàmbe bunène wa beena Mpenta udikù awu.”

Mémè ne: “Èyowà’s, mukalenge. Ndi mumanyè aci.”

Yèyè ne: “Ndi muyiikilàngàne ne bānà bèètù, àbìdi àdi panshì aa, ki kungambilabò bwà mémè kumònanngana nèèbè, bwà nkwambile ne ncintu cyà bundù paùdi mwangate mudimu wà bwambi mufila kùdi Nzambi awu muyè naawu kùdi musùmbà wà binyònga ne bàà mu nyungulukilu amu mùshindù awu.”

Mémè ne: “Bushùwà anyì?”

Yèyè ne: “Èyo.” Yèyè ne: “Nzambi mmutùme mudimu wà bwambi awu bwà kulenga myaba ya bukolè, myaba minène, myaba mitùmbùke.”

²⁰¹ Mémè kumòna dyabùlù wàkula pa dībà adi mene. Mémè kudyàmbidila ne: “Èyo. ‘Tupika kuulu kwà mukùnà eku ùdyèlè panshì, nènku uleeje, udi mumanyè’s, kuulu kwà nzùbu eku.’” Nwamònu anyì? Nwamònu anyì?

Mémè kudya mbidila ne: “Mmufikisheku ànu kule ndambù.” Maamù wanyì mukulàkàjì awu ùvwa ne ciibidilu cyà kwamba ne: “Pèèsha ngombe mwonji mule mukumbàne, neàkadyòwè ànu yèyè mwine.”

Mémè kwamba ne: “Aci ncyà bushùwà anyi?”

“Èyowà’s.” Yèyè ne: “S’mbundù, ku byùdi wenza abi?” Yèyè ne: “Cyùdi ncinyi? Leelù ewu nyàwù udi mwà kusumba cyèbè cyakudyà ànu ne lutàtù.” Ki yèyè ne: “Anji tàngilà umòne Oral Roberts ne bakwàbò, mbeelemu ànu cidya, kàdi bapàtùkemu ne cyà pa lukàmà cimwè cyà mudimu wà bwambi wùdi wèwè naawu ewu. Tàngilà umòne mùkaadìbo.”

Mémè ne: “Èyo. Aci ncyà bushùwà.” Nwamònu anyi?

Ki yèyè ne: “Cisumbù cyànyì mémè necikwangàte. Twètù netùkubweje munkaci mwètù, bu—bu umwe wa ku bàna bèètù. Bònsò nebàkwele mwoyi ku cyanza wa buunyaana, nènku netùfucilè ndèkè, ne netùkùpè difutu dyèbè dyà ndola nkàmà yitaanu ku lumingu, anyì mipite apu pawikalà muswè nànkù. Nènku netùkutùmè mu cimenga cinène cyònsò cyà ditunga.” Eci cyàkenzekela ànu mu Phoenix, Arizona, mémè dyàmunu yèyè dyàmwàmwà dyà mèèsà. Ki yèyè ne: “Nènku netùkufute yèbè. . .” Yèyè ne: “Dìbà adi tubiikila bàà pa buloba bujimà, bàà ku baabèndè, tubiikila banène bàà kuneemekiibwa, bantu bàà bujitu, bàà myànzu mitumbùke. . .” Yèyè ne: “Wèwè utu wakula misangu yònsò ànu bwà bàdi kabàyi dikuta. Twètù tudi ne beena tètè—mu—nzubu tètè—pambèlu.” Yèyè ne: “Netùbapeteshe mùshindù wà kumònabò cyanza cyà Mukalenge. Dìbà adi mémè nèmbitàbilè bwà kuyabò ne mukàjàànyì, ne bakwàbò, bàdi mwà kujaadika ne bintu byùdi wamba bìdi byènzeka.”

²⁰² Mémè ne: “Èyowà’s, mukalenge. Abi’s mbifwànyine kwikala binène.”

Mpindyewu, mōnaayi ne, mwine muntu awu, mwikale ne mapòlomè à D.L., L.L.D., mufùndi wa mikàndà, nwamònu’s, docteur mu difùndà dyà mikàndà yà kubala, mufùndi wa kalàndaàmùsèngà, muntu wa maalù mimpè. Nwamònu anyi? Kàvwa mumanyè Mifùndu to.

Nukààvkwàkù bamanyè ne Mwanjèlò wàkenza byenzi byà mùshindù awu awu kàakayaku mu Sodoma anyi? Wàkashàala ne kasumbù kàà babiikidibwè bwà kupàtuka aku, Abraham.

Yèyè kàvwa ànu mucimanyè to. Mémè kumulekela ànu cyanàànà, musòmbe ànu mwaba awu kakesè. Mvwa mémè njinga ànu kumòna civwà butèyi. Mémè ne: “Èè, cidì cifwànyine kukèngela bwà mémè kwenza ncinyi?”

Yèyè ne: “Èè, Mwanèètù Branham, cintu cimwèpelè cyanàànà cidìbo bàmbe. . .Tudi bayiikilàngàne pa cyòci aci,

tuntu ndambù, tuntu tukesè menemene tûdi ulongesha, bwà wamòna ànu mwà kutùtèèkakù ku luseke cyanààna.”

Mémè ne: “Cileejilu, bu cinganyi, mwanèètù?”

“Kaa,” mwàkambàye, “dibàtiiza dyèbè adi, udi mumanyè’s. Udi mumanyè’s, utu ubàtiiza ànu bu unitaire, cintu bu nàнку awu.” Yèyè ne: “Tuntu tukesè twà mùshindù awu atu’s.”

Mémè ne: “Kaa?” Mémè kutùngunuka.

Ki yèyè ne: “Cileeeji cyà mbangilu aci; ne bayiishi bakàji; ne tuntu tukesè ndambù cyanààna twà mùshindù awu.”

²⁰³ Mémè ne: “Uh-huh?” Mémè ne: “Udi mumanyè’s, mbipapùle bwà kumòna musadidi wa Nzambi ulòmba musadidi mukwàbò wa Nzambi, paanyimà pàa muname kumpa bunèmè muwènjì emu, umbiikila mûndi mupròfetà, ne mumanyè ne Dìyì dyà Mukalenge, anyi dibuulula dyà Dìyì, dùtu dilwa kùdi mupròfetà. Kàdi dyà ukùdimuka, Docteur Pope, (kacyèna cileeja meeji èbè mimpè to), ne uswa kwamba ne ulòmba, wèwè bu musadidi wa Nzambi, ulòmba musadidi mukwàbò wa Nzambi bwà kudyà cibàngà pa cintu cidi...?.?.?.cidi bwèndè yèyè ne mushinga kutàmba ne mwoyi mwine.” Mémè ne: “To, mukalenge, Mwanèètù Pope. Nànsha byà kumòna lufù ncyèna mufwànyineku kucyènza to. To, mukalenge.”

Ncinyi ciine aci? Kùdi lutete lwà Mwoyi wà Cyendèlèlèlè; kwikala ne mwoyi anyi kufwà, nànsha wèwè mwikale muntu munène anyi kuùyì muntu munène to.

²⁰⁴ Mémè kupicila, ditùkù dikwàbò...Kí mbwà kudyombola bantu bàbìdì aba to. Mémè kutàngila kuntwaku, nènku kùvwa cimfwànyì cinène kwaka ku Tulsa, Oklahoma; mwaba mupyamùpyà wa Oral Roberts ùcivwàbo bààsa, seminère bwà kwikala kulongeshilamù bambi. Neikale mwà kuyiila mushinga wà (Ne mémè ndi mumanyè Demos Shakarian, Mwanèètù Carl Williams, ne bakwàbò bàdi mu kasumbu kàà balombodi kàà ciine aci abu.) miliyò yà ndola makumi àtaanu, ne nzùbu wa uyiila miliyò yisàtù yà ndola; nsongààlùmè wa beena Mpenta ewu, abi’s mbintu byàbùngì menemene bìdì Nzambi mumwenzèle.

²⁰⁵ Ntu mémè ndyambidila ne: “Mémè ewu, kwikala ne seminère? Aci’s mémè ntu ncilwisha, twamb’eku twamb’eku.”

²⁰⁶ Nènku bàvwa bafùnde ne: “Cisòmbedi cìcilwalwà cyà seminère munène wa Oral Roberts.” Mémè kupweka ne njila, kùvwa cintu cinène cyà bwena leelù. Pèndè’s Oral Roberts mwine awu, mu kantenta kakesè kasùnsùke, wàkalwa mu disangisha dyànyì mu Kansas City, Kansas.

Bàvwa bafùnde ne: “Cisòmbedi cìcilwalwà cyà Tommy Osborn,” kaa, balùmyàna wa yààya, nzùbu wa ndola mitwè ku miliyò yisàtù anyi yinaayi munkaci mwà kujuudiibwa mùshindù awu.

Nènku mwaba awu, Tommy Osborn, umwe wa ku beena Kilistò bàdì batàmbe kwikala bàà maalu mimpè. Yèyè's mmuntu wa bushùwà, muntu wa busùwà mutùma kùdì Nzambì. Ùvwa mwimànyine dìnsambù dyà mùsèèsù dyàdya; nsongààlùmè mukèsè, mubìndùluke, mwànà mukèsè wa balùme ne mwànà mukèsè wa bakàji mu kàshinyi; kunyùngulukaye lubilu, e kupàtuka. Yèyè ne: "Mwanèètù Branham, mvwapù pàngàakamònà mubùlùke awu ùpàtuka lubilu. Ki mèmè kukumòna umufunkuna munu mumpàla, wamba ne: 'Mu Dîna dyà Yesù Kilistò, pàtukà munda mwèndè.' Mèmè kumumòna ùdìshinda ku makàsà èbè; paanyimà pàà yèyè mumanè kwamba cipròfetà cyèndè, mwambe ne: 'Dilòòlò edi, nènkyubànkùlè panshì munkacì mwà batèèleji binunu bisambòmbò ne nkàmà itaanu aba.'" Ki yèyè ne: "Mèmè kukumòna kacya ànu wìmana mwaba awu, kùyì ubàndishaku nànsha díyì to, wèwè kwamba ne: 'Mu Dîna dyà Mukalenge, bu muwèdì Nyumà wa Nzambì kadyòmbò, dilòòlò edi, neùponè ku makàsà àànyì eku.' Yèyè ne: 'Kàdi nènkyulejè ne nku makàsà à nganyì kungààpònà.'"

²⁰⁷ Ki mèmè kwamba ne: "Pàtukà munda mwèndè, Sàtaanà." Kupònayè cyànyimànyimà kàdi kushààla mushimikile makàsà àànyì panshì.

Yèyè kwamba ne: "Nzambì ùdì ànu Nzambì, Mwanèètù Branham. Kwàjikì." Yèyè ne: "Ndi muyè kadikangila mu nzùbu munda mwà matùkù àbìdì anyì àsàtù." Yèyè kàtu udyà cibàngà to. Neàlonde bwalu ànu mùdìbu. Kàtu ùmvwa bundù bwà bwalu abu to. Yèyè ne: "Udi welakù meeji ne mèmè ewu ndi ne dipà dyà dyondopa anyì?"

²⁰⁸ Mèmè ne: "Pwà aci mwoyi, Tommy. Udi mutùmìibwe mbwà kuyiisha Èvànjeeliyò. Ndààku, ùkaMuyiishe. Ndààku ne Mwanèètù Bosworth ewu kuntu kwàka."

²⁰⁹ Mèmè kutàngila kwine aku, ki mèmè kumòna. Mvwa mèmè mubàdyànjàdile bônso bàbìdì mu buyiishi.

Mèmè kudyàmbidila ne: "Ki Oral Roberts nyèyè wàwa ne màshinyi à mikàndà kì mmàngì kì mmàngì nkàmà yìtaanu yà Kabàmbà, àdì nànsha cyanza cyà muntu kaciyiku cilenga mikàndà to; ndola mìliyò yìnaayi mitùma mu mikàndà, cidimu cishààle eci." Mìliyò yìnaayi's; cyà binaayi cìmwè cyà mfranga yònsò yìvwa misangishìibwe, mu bwena Kilistò bwà buloba bujimà. Cyà binaayi cìmwè cyà mfranga yà beena Kilistò bônso nkòòng yìlwa kùdì muntu umwèpelè. Mwaba wa dikèma's! Mèmè kupàtuka mwaba awu bwà kuya kuwùmòna.

²¹⁰ Nènku, mpindyewu, Oral mmwanèètù. Ekèlekèle! Ntu mumunange. Mmuntu ànu wa cyà bushùwà ewu, mulùmýàànà wa cyà bushùwà, ne mèmè ntu mumunange. Ne yèyè utu ungeelela meeji manène, ne mèmè, mmwelelawu pàànyì. Bwalu bùdì ànu ne katwènakù tupetangana pa—pa Mifundu to.

Ne, Tommy Osborn, kakwèna udi mwîmpè kumutamba to. Mémè ntu ànu mmwelela meeji manène. Yèyè útú umwe wa ku bantu bàtù batàmbe kwikala bàà maalu mîmpè bânkaadîku pàànyì mutwîlàngane naabò, Tommy Osborn awu.

“Kàdi biine bantu bàba,” mûngàkadyàmbidilà, pàngààkabwelà mu bìrò byàbò ne kumòna bivwàbò naabi, “ngeela meeji ne ndi mufwànyine kuumvwa bundù bwà bóbò kulwabò, ne kumònabò byànyì mémè”: kàshinyì kakesè kàà mikàndà, ne mutùdì tudyènzeja bwà kutùma mikàndà mifùndilangana. Kàdi eci’s ncintu cyà dikèma! Pàmvwà musòmbè mundekeelu mwà ditempu dyà màshinyì, mwine musangu awu. Mémè kudyàmbidila ne: “Ciine cyàcyà ncifwànyine kwikala cinyì?”

Pashîshe mémè kupàtuka. Mémè kudyàmbidila ne: “Èè, ‘Cisòmbèdi cìcilwalwà cyà Oral Roberts.’ ‘Cisòmbèdi cìcilwalwà cyà Tommy Osborn.’ Ewu kàyì wàkwisha mukwèndè to.”

Pa nàнку, mémè kupweka ne njila. Mémè kudyàmbidila ne: “Kàdi mémè?”

²¹¹ Ki Cintu kampànda kwambaci ne: “Tàngilà muulu.”

²¹² Mémè kudyàmbidila ne: “Èyowà’s, Mukalenge, lekèlè ngùikalè ntèekela mabanji àànyì mu Dyulu, bwalu ki mùdì wànyì mwoyi.” Mpindyewu, ncyèna ngàmba aci bwà kudisàmba to. Ndi ngàmba cyòci aci ànu bwalu ncyenzèke, ne Nzambi mmumanyè ne ncyà bushùwà. Nwamònu anyì?

²¹³ Èbè mabanji adi penyì? Udi muswè kwikala kampànda wa munène anyì? Pawikalà yèyè awu, udi muntu cyanàànà. Wèwè fika ànu mwaba wa kùyì muswè kwikala kampànda wa munène to. Muswè kwikala musadidi mukèsè mudipwekèshe wa Kìlistò. Ki njila wa dipàtukila nyèyè awu. Kwàjikì.

²¹⁴ Mwanèètù Boze ne bakwàbò bàdi munkaci mwà kajuula èkèleeziyà mu Chicago. Kubàkèngelabi ànu bwà kulekeela dîngumba adi èkèleeziyà wa Philadelphie awu. Mpindyewu bàvwa bààkula bàmba bwà kupeta muntu kampànda mwikale ne nkooci wa paanyimà penze *nũnku*, mwikale ne dipòlomè dyà DD. Mémè kwamba ne: “Ki nwènù bààdyaci kabèji abu. Panwikala baswè kupeta mpaasàtà wa bushùwà bwà èkèleeziyà awu, petàayi muntu mudipwekèshe wa kale udi bwà kubala dîna dyèndè biikale bikolè, kàdi mwoyi wèndè mwikale ùlàkuka kapyà bwà Nzambi. Angàtaayi ànu muntu wa nàнку awu. Ki udi unùkèngela bwà kupeta nyèyè awu, muntu udi kàyì mumanyè bintu byònsò ebi to, muntu wíkala kàyì mwà kwenza cimbàmbilà anyì kwenzejangana maalu ku bukolè to, anyì wa ùkanwèla mu mabànzà à mîshindù yònsò, ne bikwàbò byònsò, kàdi mwikale ànu unùdiisha ne Diyì dyà Nzambi. Muntu wa mùshindù awu ki wa nwènù kwangata.”

Pa nàнку, kabààkulwa ku difestò dyà nyumà nànsha. Bikèngela njikijè. Ngàpicishi ne pa díbà diine mpindyewu. Mu

tusunsa tutwè ku túsambòmbò, netütangalakè, bu Mukalenge mwà kwanyisha.

215 Ndi ngùmvwà bàmwè bàmba ne: “Kàdi, Mwanèètù Branham, bìvwà bìkèngela wèwè kwalukila pa dìyì adi.” Bàmba ne: “Bantu abu kî mbanyùngùlùke mitù to. Bantu aba kî mbanyùngùlùke mitù to. Cidìbo mbalonge ànu tùlaasà cyanàànà.” Nànkù, mbalonge tùlaasà bìikale banyùngùlùke mitù’s. Aci’s ncyà bushùwà. Èyo. “Kî mbanyùngùlùke mitù to. Mbalonge tùlaasà.”

Nènku ndi muswè kunwèlakù lukonko. Nwamònu anyì? Nudi bùmvwè. Ndi muswè kunwèlakù lukonko. Swáyi nuumvwije byenzi byàbò byà leelù ebi, pìikalàbo kabàyi banyùngùlùke mitù to. Ngambilaayi cidì cibàfikisha ku dyenza maalù mùdìbo benza amu, pìikalàbo kabàyi banyùngùlùke mitù; nwamònu’s, muntu yònsò wakwila ànu dyèndè dingumba, ne lukùkà lwònsò. Yesù kàvwa nànkù to. Yèyè kàvwa ùpututuka bwà cintu nànsha cimwè to. Nwamònu anyì? Kàvwa ne lukùkà to. Yèyè’s ki uvwa cyètù cileejilu.

216 Bwenzàvi, ditùnga, ditùnga dikaadi ne bwenzàvi bupite bwà kacya kwònsò eku. Ncilumbù kaayi aci? Bansonka, bidimba byà èkèleeziyà, bàshipangana, balùme bààsa bakàji bààbò ne beena famiye yàbò bingoma, bòosha ne bânà bààbò balela mu mudilu. Kàdi anji tàngilàayi ànu divulgana dyà bwenzàvi. Nwamba ne kî mbanyùngùlùke mitù? Kàdi ncilumbù kaayi aci? Byenzedi byàbò abi mbyenzedi kaayi?

Matùnga àzùkila bukòokeshi, ditùnga ne ditùnga dikèba kukwàta dyònsò. . . makwàbò bwà kwenza dibèndelà dimwèpelè, ditùnga dimwèpelè, bwà ciikale dibèndela dyàbò bòbò ne ditùnga dyàbò. Bàzùkila bukòokeshi!

217 Nsòmbelu wa masandi, mòna’s, bàà pa buloba mbalwè beena masandi kupita mùvwàbi kacya kwònsò eku. Bakàji butakà mu mìsèèsù, bakàji butakà, kàdi nwamba ne bàdi ne lungènyi mu lwòlò? Kabèèna mwà kwikala naalu to. Kabèèna ànu mwà kwikala naalu to.

218 Tèèlejàayi. Kùvwa muntu umwèpelè mu Bible wàkavùùla bilàmbà byèndè, ùvwa n’Legònà. Yèyè kaayi ùvwa mujimije lungènyi. Pààkalwa Yesù kumusangana ne kumupingajila lungènyi mu lwòlò, wàkavwàla bilàmbà byèndè. Cyà bushùwà’s.

Cidì cinùfikisha ku divùùla bilàmbà byènù ncinyi? Dyabùlù. Ncyà bushùwà. Pashiishe ki nwènù kwamba mudibò kabàyi banyùngùlùke mitù’s? Asa ànu lwendu wènda upweka ne mùsèèsù mwab’ewu, wèndè mu màshinyì upite mìsèèsù mwandamukùlù kùyiku mumòne mukàji butakà, kàdi wàlukile ùngambile. Èyo. Jandùlaayi.

219 Pashiishe nwènù kwamba mùdìbo kabàyi banyùngùlùke mitù amba’s? Dìbà adi ncinyì cidì kaciyì cyènda bìmpè? Kabèèna mwà kwikala ne lungènyi lwàbò mu lwòlò to. Mukàji ne

lungènyi lwèndè mu lwólò kí mmufwànyine kwenza aci to; awu's ùdi ne cyumvwidi citàmbe bwímpè. Mmumanyè ne yèyè ùdi munkaci mwà kudizànjika: musùmbà wa démons yà dyalakana pambèlu pààpa, biikale ànu bantu bàà manyaanu, bakooyike, bapepeledi, bakwàciki bàà maala, bashipyanganyi, ne bikwàbò byònsò. Nwamba ne. . .

220 Bàà pa buloba banwanwa maala makolè mapîte búngì patùdi twakulangana apa. Bàdi batuula mfranga mipîte búngì ku maala makolè, mu États-Unis emu, kupita yidibo batùula bwà byàkudyà. Ngeela meeji ne bìdi. . .Ngápù mwoyi búngì bwà misangu yidi mabànzà à maala à kapyà àlòmba ku cidimu ne cidimu cyònsò eci, mu ditunga edi, kupita mùvwàbi kacya kwònsò eku. Kàdi dinwanwanwa diine dyà maala à kapyà didi dyènza cinyi? Dikutùma mu lupitàadi lwà bapàle.

221 Kansère. Pàdi bangàngàbuka bàà buloba bujimà bafùnda mu bikàndàkàndà, ne banwàmbila ne: “Kansère ku búngì bwàkù.” Mfwankà. Bamwela pambidi pàà mpùku, nènku mbijaadikiibwe ne ùdi ùkupèèsha kansèrèe kàà bisùlùsùluù. Makumi mwandamutekète pa lukàmà à kùdibo bàdi bapeta kansère kàà bisùlùsùlù ku ònwà dyà mfwankà. Kàdi bakàji ne balùme abu bàdi bamupwita kàdi kukupwidijilaye mwisù's. Pìikala aci kaciyi dinyùnguluka dyà mitù, dinyùnguluka dyà mitù mwaba awu didi ncinyi?

222 Pàdibi ne, Èvànjeeliyò wa Yesù Kilistò ùdi mwà kuyiishibwa ne kujaadikiibwa, ne Nzambi wa mu Dyulu mu mmwènekèlu wa Dikunji Dyèndè dyà Kapyà ùlèlema kumutù kwà bantu ne ùleeja ne Yesù Kilistò ùkaadi mu citùpà cyà ndekeelu cyà Dilwa Dyèndè, mwikale munkaci mwà kubàpa cimanyinu cyà ndekeelu. Kàdi baCìseka ne baCyèlulwila, kàdi kudibìikila mùdibo bidimba byà èkèleeziyà; nènku pashiishe ki nwènù kwamba mùdibo kabàyi banyùngùlùke mitù's? Umvwijaayaaku aci. Dìbà dyànyi nyèwù dyènda ànu diya's. Kàdi konkaayi ní kí mbanyùngùlùke mitù's. Cyà bushùwà. Mbanyùngùlùke mitù balonge tulaasà. Aci kàdi ki menemene's. Umvwijaayaaku ngiikàdilù wabò awu. Kanwèna mwà kuumvwija to.

223 Bàdi bàkosa nsukì yàbò, bàvwàla bilàmbà byà bantu bàà pa buloba, bàpàtuka bènda bèndàkana mu mùsèèsù mùshindù awu. Kàdi Bible wa Nzambi pèndè's ùdi ùdimwija ùbenga ciine aci, ùkàndika mene bwà mukàji kusambilaye ne nsukì mibebula. Wamba kàbìdi ne mulùme. . .Kàdi mukàji yèyè ùdi ùcyènza. S'ùdi wamba, yèyè mwine, wàmbila bàyèndè, mùdiye mwena masandi, yèyè mwine, ne mulùme ùdi ne bukenji bupwàngàne bwà kushipa nendè dibàkà ne kumwipata. Aci's ncyà bushùwà menemene. Dîyi dyà Nzambi dyàmbe ciine aci, ne mukàji ùmwwa ciine aci, cibì ùtùngunuka ànu ne kwikala ne nsukì mîpi, kàdi kudibìikila mùdiye mwena Kilistò. Pìikalà aci kaciyi ne mmuntu mmunyùngùlùke mutù, munyùngùlùke mutù ncinyi? Ndi nkeba

muntu àngambilèku ne munyùngùlùke mutù ncinyi, díbà adi. Èyo. Mbanýungùlùke mitù.

224 Balonge bapilùke, ne mapòlomè, à tùlaasà tutùmbùke! Tutu tucicisha díbà dyàbùngì ku dilongeshisha bàna bèètù balela, mu—mu makumi makolè ne dilonga dyà cidì mwoyi wà muntu, kupita mutùdì tubalonesha Bible ne Yesù Kìlistò. Kakwènakù mwànà nànsha umwe mu ditùnga emu udi kàyì mwà kukwambila cidì David Crockett to. Kakwèna cyàbisàtù cimwè cyàbò bàdì mwà kukwambila ne Yesù Kìlistò ùdì Nganyì to. Nènku, kì ndinyùnguluka dyà mitù anyì? Cyà bushùwà, ndyòdì. Mùshindù mwine utùdì bafwànyine ànu kwikala twenda tuya twenda tuya twenda tuya, mùshindù wènzanzàbo awu's!

225 Anji vùlukàayi. Ne èkèleeziyà yìdì yileeja patòòke mùdiyi micítàbe, pàdì Bible ùcipiisha. Bambi mbanýungùlùke mitù anyì? Banyùngùlùke mitù bàà balonge tùlaasà. Aci kàdì ki menemene's. Èkèleeziyà mmicítàbe.

226 Vùlukàayi Lotà. Yèyè's ùvwa muntu wa meeji matwè. Anjaayi kumutàngila, katanci kakesè mpindyewu. Kanwikadi—kanwikadi . . . Katwikadi . . .

Numfwileku luse bwà kupicisha ànu tusunsa túbìdì cyanàànà. Eci cidì—eci cidì ne mushinga mupite bùngì. Cidì cipàtuka pa . . . Nudi balwè mbwà kuntèeleja pàndì ngenza mukàbà wà mèyi ewu.

227 Tàngilàayi. Tàngilàayi. Twìmanàayi kakesè. Sambila ànu mu kasunsùkila kàà kasunsa, munda mwà mwoyi wèbè amu ne: “Mukalenge, swàku ncimòne.” Kangula cyumvwiidi cyèbè. Nzambi àsweku énzè cyòci aci. Tàngilàayi ku . . . Angàtaayi ànu ditunga edì, nkàayaadi. Tùmonàayibi cidì Nzambi mwambe.

228 Bible mmwámbe, ne: “Mpèkaatù yà Sodoma yìvwa yitácisha musùukà mwakàne wà Lotà ku ditùkù ne ku ditùkù.” Bwalu bùvwa ànu ne yèyè kàvwakù ne dikima dikùmbàne bwà kucikàndameena to. Ncyà bushùwà anyì? Kàvwa mwà kucyènza to, bwalu ùvwa mfùmù wa cimenga. Kàvwa mwà kucyènza to. Kàdì Bible mmwámbe, ne: “Mpèkaatù yà beena—beena Sodoma yìvwa yitácisha musùukà wèndè.” Ùvwa mumanyè ne mbìbì, kàdì kàvwa ne dikima dyà kucyènza to, bwà kucikàndameena.

229 Mpindyewu tàngilàayi. Mba-Lotà bùngì kaayi mu Àmèrikè emu, makèèlèlè awu, bàbala Bible wabò, bwà kulongolola diyiisha dyàbò dyà ditùkù, kàdì bu mu mpùukàpùukà bakafikè pa dibàtiiza dyà màyi mu Dìna dyà Yesù Kìlistò? Mbantu bùngì kaayi bàà kùdìbo bàdì bu mu mpùukàpùukà bakafikè pa dibàtiiza dyà Nyumà Mwìmpè? “Yesù Kìlistò umweumwe awu makèèlèlè, leelù, too ne kashidi”? Maako 16: “Bimanyinu ebi nebìfilè bàdì bìitabuuja”? Yone 14.12: “Ewu udi ungiitabuuja Mèmè, byenzedi bìndì Mèmè ngenza neabyènzè pèndè”? “Nwènù bashààle munda Mwànyì, ne Dìyi Dyànyì munda mwènù, nulombe cinùdì baswè ne necyènjiibwè”? Mba-Lotà bùngì kaayi

bàwva bamòne Cyôci aci? Kàdi, ànu bwà kabingilà kààbò, bwà dingumba dyàbò! Cìdi . . . Batàngila bamòna mu Bible.

²³⁰ Batàngila disangisha dyàbò dyà bakàjì babebùle nsuki adi, kàdi pààbò bamanyè ne Bible ùdi ùcìpiisha. Batàngila pàdìbo bènda bàpweka ne mùsèsèsù apu, bidimba byàbò byòbì biine byà èkèleeziyà bènda bàpweka ne mùsèsèsù, bavwàle tupùtulù, kàdi pààbò bamanyè ne Bible mmucibènge. Kàdi kabàyikù ne dikima dikumbàne dyà kucitàndisha to. Kàdi, nànsha nànkù, muntu awu wàmba mùdiye mwena Kilstò, musùùkà wèndè munda mwèndè mwikale ùcilwisha ne mbila mikolè, kàdi kàyì ne dikima to. Pìikalà aci kaciyì Sodoma wa cyena leelù, yèyè awu ùdi penyì?

Nzambì, tùpèeshèku muntu wacilwisha ne mbila mikolè. Ncyà bushùwà. Bu mwàkambà Yone Mubàtiji ne: “Cisuuvi nciètèeka ku muji wà mucì.” Ki cìdi citùkèngela leelù ewu ncyôci aci.

²³¹ Tàngilàayi. Bòbò n’Sodoma wa cyena leelù. Nwàvùlukaayi. Nwamònu anyì? Ditùnga dijimà dikaadi Sodoma ne Gomola byà cyenà leelù. Lotà mwikàle cyàkàbìdì ne mwoyi’s. To. . . Mwikàle ne nsòmbelu awu cyàkàbìdì, bwalu bìdiye wìtabuuja ne mbyòbì ne meeji matòòke ònsò abi bìdi bìmwambila ku Dìyì ne mmupìile.

²³² Tàngilàayi mu Chicago, Chicago mutàmbe bunène ewu, pàvwà bayiishi nkàmà yisàtù abu basòmbe mwaba awu. Ki Mukalenge kungambila dilòòlò adi civwàbo bajinga kwenza. Bàwva ne butèyi bùvwàbo bajinga kungeela. Mémè, kuyaku. Mémè kuya e kwambila Mwanèètù Carlson. Mémè kwamba ne: “Kanwàkucyènzela mu nzùbu wa cilààla-beenyi awu to. Nenwikale ne cyà kuya naaci mwaba wa cyanàànà, ne neciikalè cibambalu cyà diikala dyà màyi à matàmbà. Ne bòbò bàdi ne butèyi bwàngeelàbo, kì mmwòmò anyì, Mwanèètù Carlson?” Kwinyikaye mutù.

Musòmbe mwaba awu mu bìrò byànyì, kukaavwa matùkù ndambù, bwà mémè kulwa, ku disangisha dyà mu Chicago adi. Yèyè ne: “Ncyàdyàkupwàku bwalu abu mwoyi to, Mwanèètù Branham.”

Ki mémè kwamba ne: “Bàdi ne butèyi bwàngeelàbo. Mbwa cinyì, Mwanèètù Carlson? Udi ucìina bwà kungambila ne mbwa cinyì anyì, wèwè ne Tommy Hicks?” Kwinyikabò mitù yàbò. Mémè ne: “Tommy, bwà cinyì kwèna uya kaakula?”

Yèyè ne: “Ncyèna mufwànyìnekù kucyènza to.”

Mémè ne: “Pàànyì’s mwva ndyambidila ne uvwa wamba ne uvwa mufwànyìne kunsankisha’s.”

²³³ Mémè kwamba ne: “Makèèlèlè dilòòlò ngudi Mukalenge mungambile. Nenùpwekè kuntwaku leelù, kàdi nenùjandule ne kanwakupeta nzùbu awu to. Nenùye ku nzùbu wa cyanàànà.

Docteur Mead neikalè musòmbèle *elu* luseke. Muntu wa bafike awu, mukajèndè, ùtu wimba misambu awu, neikale musòmbèle ànu *apa* nùnkù, ne bikwàbò, mwaba wikalàbo bònsò basòmbèle.” Mémè kwamba ne: “Nekwikalè mwakwidi wa beena Bouddha muntwamu.” Ki mémè ne: “Mpindyewu jandùlaayi. Bàdi bandwisha bwalu ndi nyiisha dibàtiiza dyà mu mâyi mu Dìnà dyà Mukalenge wetù Yesù Kilistò. Bàdi båndwisha bwalu ndi nyiisha dimiinu dyà nyòka; ne ndwisha cileeji, cyà ne, muntu yònsò udi wakula mu myakulu ùdi ne Nyumà Mwimpè, ne bikwàbò.” Mémè kwamba ne: “Pwekàayi kuntwaku nùlwe kubandila Nzambi.”

²³⁴ Kubwelabò muntwamu... Kupwekabò kuntwaku, ne mu mèbà miine àbìdì à paanyimà pàà aci awu, anyi mapite apu, pa dîbà kampànda mu mapingaja amu, kubiikilabò Mwanèètù Carlson ku tèlèfonè. Ki kwambaye ne: “Muntu wákamupeesha cibambalu aci, ne yèyè mumana kufuta citùpà cyà mushinga cyà ditèèkesha naaci awu, kwambaye ne: ‘Bikèngela tunuumushe mu ndongamu, bwalu mulongolodi wa ndongamu ùdi wamba ne bàkaavwa bamane kulaya cisùmbù kampànda cyà bimbi bàà misambu nzùbu awu dilòlò adi, anyi mu dindà amu.’” Nènku kabààkapeta mwà kumwangata to.

²³⁵ Pa nànkù twètù kupàtuka kuya ku Town ann Country. Nènku mu dindà adi patwàkamùbwelà, ne patwàkiimanàmu, ki—ki Mwanèètù Carlson kwambayè ne: “Kùdi cintu cimwèpelè. Nwènù bânà bèètù nudi bafwànyine kubenga kupetangana ne Mwanèètù Branham, kàdi,” yèyè ne, “yèyè kèna ne bwòwà bwà kwamba bìdiye wítabuujà to.” Yèyè ne: “Ùkaavwa mungambile ne bintu ebi nebyènzekè menemene ànu mùshindù ùdibi ewu.” Yèyè ne: “Mpindyewu nyèyè ewu. Mulekèlaayi àdyàkwilè yèyè mwine.”

²³⁶ Mémè kwangata Mufundu wa ne: “Ncyàkashikuka ku cikèenà-kumòna cyà mu dyulu to,” mwákamba Pólò. Mémè kwamba ne: “Nudi bacyènzè mbwà kundwisha mémè, bwà dibàtiiza dyà mu mâyi mu Dìnà dyà Yesù Kilistò. Bàà kunùdi aku bapite pa nkàmà yisàtù bàdi bàditèèja bu Docteur *Kampànda*, ne Docteur *Kansanga*.” Mémè ne: “Mémè ncyèna mulonge nànsha tùlaasà tubàndile to. Kàdi ndi ngeela muntu kanà yònsò kadyòmbò mwab’ewu bwà kutwàla Bible wendè ne kwimana mwab’ewu ku luseke lwànyì eku, ne kuvila nànsha òmwè dyà ku Méyi àdi mambiibwe awu.”

Nudi naabi pa mikàbà yà mèyi mwaba ewu, panwikalà baswè kubyùmvwa. Cìvwa mmusùmbà wàkashààlà matama bu byàtì unùdiku kanùyì banji kuumvwa to. Mémè kwamba ne: “Mbwalu kaayi ebu?” Kudikù muntu mwab’ewu, dilòlò edi, uvwapu mu disangisha dyà mu dindà adi anyi? Tumonebi èlè cyanza muulu. Èyo. Èè, cyà bushùwà, tàngilàayi eku ne eku.

Mémè ne: “Nànkù, panùdi kanùyì mwà kucitwa nyama

ku mikòlò to, nàнку lekèlaayi kwikala kunjaanyina mu dikoshi's." Cyà bushùwà. Ki bikemu abi búngì cyaààà, pàdìbo bàya ku luseke banyunguluka ditumba. Kàdì pàdìbo bafika cimònààmèèsù ne cyena bwalu, ngonnyònyì yàndamuna myadi's. Ncyà bushùwà. Cidi. . . Bantu abu kupàtukabò.

²³⁷ Tommy Hicks kwambaye ne: "Ndi muswè mikàbà yà mèyì ayi nkàmà yisàtù, bwà kuyitùmina muyiishi yònsò wa bàdì badyàmba ne mba-Trinitaires bándiku mémè ewu mumanyè abu."

Bantu abu bandabula ku cyanza, bàmba ne: "Netùlwe ku tabernacle aku bwà kulwa kubàtijiibwa cyàkàbìdì."

Bàdì aku anyì bàdì kunu? Tubingilà's. "Ncyèna mwà kucyènta to. Dìngumba dyànyì kadyàkunderkela ncyenza to. Ndi mfuma ku disèla dyà mukàjì. Ndi mfuma ku disùmba dyà ngombe wa cikokedi, anyì ngombe yà cikokedi, èyowà's wè. Ndi—ndi mfuma ku disùmba citùpà cyà buloba. Bikèngela nye kacitàngila." Nwamònu anyì? Bimwè byà ku bintu abi, bu ne, ntubingilà. Ncyà bushùwà anyì? Awu nsòmbelu mmukùmbànyine Èvànjeeliyò anyì? [Disangisha didi dyàmba ne: "To."—Muf.]

Piikalà Èvànjeeliyò ngwa cyà bushùwà, tusumbishaayi byònsò bitùdì naabi bwà twikale ne mwoyi bwèndè Yèyè. Ikala mwena Kilistò. Èyowà's, mukalenge. Amen. Mònaayaaku mpindyewu, patùkaadi tujikija apa.

²³⁸ Kàdì tubingilà twàbò ntwitabaayi yàbò ne màngumba àbò awu.

Mbyenze bu mùdì mucì. Mwya ntàngila Mwanèètù Banks, dīngà ditùkù. Mwya ne mu—mucì wa pin, wùmwà mukùne pàncìwà mmwangeelakù kwàka nàka, kùkaadi bu, kaa, bidimu bitwè ku dikumi ne bitaanu, anyì bipite apu. Nèнку mémè kulekela micì yà mvinyò ayi, matàmbà matòlòkele pa mucì wà pin awu, ne katùyì mwà kupicishila kùpèkupè mwinshì amu to. Ne mwòmò mwine kamùvwa kasoosa nànsha kàà kànà katòlòke to, twamb'eku twamb'eku. Ki mémè kupàtuka kwàka, kwangata scie e kukòsa matàmbà awu, too ne mwàlu mucì wa pin awu kubànda kufika *apa*, mu mùshindù wà wèwè mufwànyine kwendela mwinshì mwàwù awu ne kùpèkupè. Nèнку musùmbà wà bisoosa bilenga bitàmbe binùdiku kanùyì banji kumòna to bìdì mwinshì mwà mucì awu patùdì twakulangana apa. Cìvwa ncyini? Dimiinu divwa mwaba awu. Bìvwa bikèngela kupetadi bukènkè.

²³⁹ Nèнку pàcìdì ànu màngumba, tubingilà twèbè atu, biteeta kubwikila dilèjì dyàbì pa Dimiinu adì dyùdì mumanyè ne didi bushùwà disanganyibwamù adì, udi uditèeka ku luseke lwà Lotà. Imansha bintu abi kule, ne lekèlè Bukènkè bwà Èvànjeeliyò bùkenkeshè panshì apu, bukòlè bwà Yesù Kilistò. Eyo. Kupangisha Bukènkè bwà kufikabo pa dyòdì adì,

nekùdìpangishè bwà kwikaladi ne mwoyi. Bwalu, Bukênkè bwòbò ànu bufikèpu, neditòloke diye ku Mwoyi.

Ki bwà cinyi bantu bàtu bàmba ne: “Kwikadi uya ku àmwè à ku masangisha à mùshindù awu to.” Bàdi bàciina ne nkwépí kwàvwà ndambù wa Bukênkè kulenga cìmwè cyà ku bidimba byàbò.

²⁴⁰ Vùlukààyi mukàji wa ku ciinà cyà màyi. Ùvwa ndumbà.

Ki baakwidi abu biimane mwaba awu. Bòbò kumòna Yesù wàmabila Natànàèlè ne: “Nkààvwa mukumòne, paùvwà mwinshi mwà mucì wa mfigi apu.”

Ki baakwidi kwambabò ne: “M’Beelèzèbùlà. Mmwena lubùku. S’ki yèyè dyabùlù wàwa.”

²⁴¹ Mukàjàànà mutekète awu, mmwenze ànu usemena mwaba awu, mu ngiikàdilù wendè wa bungèndààmàsàndì awu, musòmbe ne balùme bàsambòmbò. Kàdi mmwenze ànu usemena mwaba awu mu ngiikàdilù awu, mu ngiikàdilù uvwaye awu. Ki Yesù kwamba ne: “Ntwàdileku màyi à kunwà.” Muýiiki ùmba ùkùtuka’s. Yèyè ne: “Nda wàngate bàyeebè ulwe nendè mwab’ewu.”

Yèyè ne: “Ncitu nendè to.”

Yèyè ne: “Wàmbi bulelèlà. Ukààvwa naabò bàtaanu, kàdi mwine ùdi musòmbe nendè awu, kí mbàyeebè to.”

Yèyè ne: “Ndi njingulula ne Udi mupròfetà, Mukalenge. Ndi mumanyè ne Maasiyà ki wénza aci pààlwàYe.”

Yesù kwamba ne: “Mémè ki Yèyè awu.”

²⁴² Aci kàdi kukòsaci bwalu. Pààkateema Bukênkè abu pa Dimiinu divwà disanganyiibwa mu kandumbà kàà kale aku, matùkù à bundumbà e kumbà kujika. Kuditwayè mu mùsèèsù, wènda ùtùmbisha Nzambì, wàmba ne: “Lwáyee, kanùmonààyi Muntu Udi mungambile bintu bìndì mwenze. Kí n’Yèyè Maasiyà awu anyì?” Cìvwa ncinyi? Bukênkè mbuyè kalenga kaadimiinu kàvwà mwinshì mwà dilèji dyà ciikishilu cyà bundumbà aci. Èyowà’s, mukalenge.

Mpindyewu tujikijàayi, mu kwamba kwà eci nùnkù. Ncyèna mumanyè ne ncið ne mabèji makwàbò bùngi kaayi to, kàdi ndi—ndi mutwìshìibwe ne ncyàkuàngata ònsò to. Matwè ku dikumi, kàdi awu adi ànu bu cyàbibìdì cìmwè bwà kujikija. Kàdi tujikijàayi, mu kwamba kwà eci nùnkù.

²⁴³ Tùfwànyikijàayi cintu kampànda, musangu ùmwè, cyà nsòmbelu mukùmbànyine. Tùfwànyikijàayi nsòmbelu wa Pòlò Munsantu ne wa nsongààlùme mubanjì awu. Bukênkè bùmwèbùmwè abu mbwàkalengà bantu bònsò bàbìdì aba. Bònsò bàbìdì bààkapeta dibìikila dimwèdimwè dyà kùdi Yesù Kilistò. Ncyà bushùwà anyì? Bònsò bàbìdì bàvwa balongèshìibwe bimpè mu Mifundu. Bònsò bàbìdì bàvwa beena tèlòlji. Vùlukààyi, Yesù

wàkambila—wàkambila nsongàalùme mukòòkeshi mubanji awu ne: “Lamà mikenji.”

244 Awu ne: “Ndi mwenze aci, kacya ku bwânà bwànyì.”

Ùvwa muntu mulongèshìibwe. Ki mùvwà pèndè Pòlò Munsantu. Bònsò bàbìdì bàvwa balongèshìibwe bìmpè mu Mifundu. Kàdi, bònsò bàbìdì bàvwa ne Dìyì. Umwe ùvwa naaDì byumùkile ku dimanya kampànda; mukwàbò ùvwa yèyè ne mutòlokù wà Mwoyi munda amu. Bukènkè abu mbwenze ànu buteema, kumpàla kwà Pòlò, kwambaye ne: “Mukalenge, Wèwè udi Nganyì?”

Yèyè ne: “Ndi Yesù.”

“Bwà apu kaayi, ki mèmè ewu.” Ùvwa mudìlongòlòle.

245 Bukènkè abu bwàkalenga bantu bònsò bàbìdì abu. Umwe wàkatòloka; mukwàbò to. Mùshindù awu ngudibi leelù ewu: èkèleeziyà wa nyumà, èkèleeziyà wa mubidi.

246 Muntu mubanji awu ùvwa ne kabingilà kèndè. Kàvwa mwà kucyènzakù to. Ùvwa mulamina panshì kùdì bujitu bwà balunda bapitèpitè búngì bàà pa buloba. Kàvwa muswè kushiyangana ne baamâyi bèndè to.

Ki lutàtu lùdì naalu bantu bààbúngì leelù ewu. Wèwè wela meeji ne, bwalu udi wa mu diswa kampànda, kwèna mwà kulekelaku bwânà bwènù bwine abu to. “Bònsò nyàwù bànwà maala ne bintu byà mùshindù awu bàdi bènza *bikampànda*.” Èyo, tùngùnuka ànu naabi; ncyèna cilumbu ne diswa adi to, ncyèna cilumbu ne èkèleeziyà awu to. Mèmè ndi ngàmba mbwèbè wèwè. Wamònu anyi? Èyo. Wamònu anyi? Ncyèna cilumbu ne ciine aci to. Bwalu, mmaanyi mu nkunde, nkunde mu maanyi. Ngáfumu ku dinwàmbila ne èkèleeziyà awu kí ncíngà cintu to ànu diswa, dígumba, piikalàbo bàvila Dìyì dyà Nzambi.

247 Mònaayi. Muntu mubanji awu ùvwa ne tubingilà twèndè. Kààkalekelakù bujaadiki bwèndè to, nànsha nànkù. Tudi tujandula ne wàkaya too ne ku bungèndaàmùshingà bwà bunène. Ùvwa ne dimanya. Nènku wàkafika mu kaaba kàà bikèngela kuvudijaye byàbúngì menemene, mu mùshindù wà ne byàkakèngela yèyè kwasa mayeebà mapyamàpyà bwà kutèkelamu bintu byèndè abi. Kàdi pààkafwàye; ki muntu kampànda mwena dipòlomè dyà tulaasà tutùmbùke, mwikale ne nshìngù wa nkoolò, kuyiishayè ku citàlù cyèndè, kakùyì mpatà to. Nènku pààkayiishaye apu, ùvwa mufwànyine kwikala mwàmbe...Bààkashiya mabèndelà mapwekesha, nènku wàkamba ne: “Mwanèètù munanga, mfùmù wa cimenga eci, patùdì twakulangana apa ùkaadi mu mabòkò à Wa bukolè bwònsò, bwalu yèyè ùvwa cidimba cinène cyà èkèleeziyà. Yèyè wàkenza *bikampànda*, ne *bikansanga*.”

mùvwàye naawù amu, yéyè kààkawkàtakù mudimu nànsha ne myâkù yà minène to.

Pààkafikàye munkaci mwà beena Kolintò abu, yéyè wàkamba ne: “Ncyàkafikakù kunùdi ne lungènyi lwà bantu to. Ncyàkafikakù kunùdi ne myâkù minène to, bwalu nwènu nutu nutèeka dyènu dyeyemena mu byà nànkù. Kàdi ngàkafika kunùdi mu bupwekèle, mu bukolè bwà dibiiikà dyà Yesù Kilstò ku lufù, bwà diitabuuja dyènu kwikaladi mu cyòci aci.” Ki nsòmbelu nyéyè awu. Tàngilàayi aci.

²⁵² Yéyè kààkawkàtakù mudimu ne tùlaasà twàkalongaye to. Kàakendakù ne musumbà wà beena mamanya à mu mitù to. Wàkenda mu Nyumà wa Kilstò, mudipwekèshe, ùtùmikila Dìyi dyà Nzambi, pàvwàDi dibèngàngane bikolè ne twitabàayi yàbò bòbò. Kàdi Pòlo wàkamòna Bukènkè ne wàkendelaMù (ncyà bushùwà anyi?), ùlekela Mwoyi wà Kilstò ùleeja Yesù Kilstò kùdi bàà mu cikondo cìvwàye ne mwoyi aci, bwà bantu kumònbò Nyumà wa Nzambi munda mwèndè.

Nènku badipwekeshi bààkaciitabuuja, bikolè menemene, mu mùshindù wà ne bàvwa mene bajinga kutwàla mìshwala. Bàvwa bàyilengesha mubidi wèndè. Ne bàvwa bacìitabuuja, mu mùshindù wa ne, yéyè ùvwa cimfwànyi cilelèlà cyà Yesù Kilstò, mu mùshindù wà ne, cyònsò cìvwàye yéyè ùlenga, bàvwa biitabuuja ne, cìvwa cibènèshiiibwe. Èyowà. Awu ùvwa mmuntu kaayi, mufile mwoyi wèndè, mabanji èndè, ne byònsò bivwàye naabi! Tùlaasà twèndè tulonga; wàkatùpwa twònsò mwoyi, bwà kwikalaye wèndakana ne balobi, ne balombyanganyi bàà kàà pa luse ne balalakanyi mu mùsèsù, bwà kwenza ne makènkè èndè aleeje dinanga dyà Yesù Kilstò.

Wàkamba ne: “Bààkankùma mfimbù mu mwongo, misangu makumi ànaayi ne citèemà; kabiyi bintàcisha to.” Wàkamba kàbidi ne: “Ndi mwambùle mu mubidi wànyi bimanyishilu byà Yesù Kilstò.” Kalùmyàànà aku kakwàte ne byà luse mu mùshindù ùkwàcisha ne bwòwà, kamba ne: “Ndi mwambule mu mubidi wànyi bimanyishilu byà Yesù Kilstò.” Dishiiilangana kààyipu ne munène wa kuneemekiibwa ewu ne bààkwidi bàvwa bamunyòngùlukile.

²⁵³ Kàdi pààkadiye mu Loomò, kakùyi muntu nànsha umwe mwimàne ku luseke lwèndè. Nènku bàvwa munkaci mwà kwibaka cishipeelu, bwà kumukòsabò mutù, pambèlu apu. Ki mwaba awu wàkacyàmbàye. Kaa, ekèlekèle! Yéyè ne: “Kùdi cifulu cyà butumbi cintèekela, ciikalà Mukalenge, Nzujì mwakàne mwà kumpà mu Ditùkù adi; kî ng’ànù mèmè nkààyaanyi to, kàdi mpindyewu bònsò bàtù banange dimwènaka Dyèndè.” Ki nsòmbelu udi mukumbànyine Èvànjeeliyò nyéyè awu, mwànà wa balùme mulelèlà.

²⁵⁴ Wàkangata kaaba kàà Kilstò. Wàkashiya Èvànjeeliyò ùdileejila mu yéyè. Kumpàla kwà kwenzaye nànkù, wàkaya ne

wàkalonga Èvànjeeliyò. Wàkapweka ku Arabie ne kushàalakù bidimu bisàtù, ne wàkangata Dipungila Dikùlùkulu. Ne wàkaleeja, ku Dipungila Dikùlùkulu, ne Yèyè awu ki uvwa Yesù Kilstò. Ki ku Cìlekelaye cìdìleejila mu yèyè, kùdì musùmbà wa bantu badìpwekèshe. Bwà ne, yèyè, pàvwà . . . Yèyè kwamba ne: “Ndi mumanyè mwà kwikala ne difù dyukùte, ne ndi mumanyè mwà kwikala ne nzala ne mupangile bintu.”

Muntu ne dilonga dyà tùlaasà bu yèyè awu, ne mumanyi wa dibàla bu yèyè awu, mwimane ku luseke lwà . . . mupetele dimanya ditwè ngwengwengwe dyà mu tùlaasà kùdì Gamalièlè, umwe wa ku balongeshi bàvwà batàmbe bunène bàà mu ditùkù adi, ne mwimane mwelangane dibòko ne mwakwidi munène. Mwanèètù, yèyè's uvwa mwà kwikala mukùmbànyine miliyò yà ndola ne mwikale ne nzùbu yà mishindù ne mishindù. S' ncyà bushùwà. Kàdi wàkamba ne: “Mémè . . .”

²⁵⁵ Ùkaavwa mushààle ne cinkutu ànu cìmwèpelè. Ki Demaasa ùmòna muntu pèndè ne mudimu wà bwambi wà mùshindù awu! Timote Mwibìdì, nshapità mwi3, mmwàmbe ne: “Demaasa mmundekèle, ne bantu bakwàbò bònsò abu, banange maalu à pa buloba àdìku leelù aa.” Yèyè ne: “Pawàlwà, wantwàdilakù cinkutu cìndì mushiye kuntwaku aci. Kùkaadi mashikà be.” Muntu ne mudimu wa bwambi wa mùshindù awu, kàdi mufwànyine pèndè kwikala ne cinkutu ànu cìmwèpelè? Butùmbi kùdì Nzambi's wè!

²⁵⁶ Bimvùlwija Martin Munsantu, pàvwàye ùkèba kwimanyina Èvànjeeliyò, ne bikwàbò byònsò, kumpàla kwà kwikalayè mukùdimune mucìma. Mu—mu cisangilu cyà Kumpàla kwà Nicée, anyi mu cisangilu cyà Nicée, mu *Baataatù Bàà Nicée*, mu maalu malonda. Ditùkù dikwàbò, uvwa upàtukila ku biibi aku. Ùvwa wa ku Tours, mu France. Nènku kùvwa bantu . . . Ki mukùlákàji mukwàbò mulòmbyanganyi wa kàà pa luse mulààle panshì mwaba awu, upunga ne lufù, kàyì bilàmbà pambidi to. Ne Bantu biikale bapicila mwaba awu, bàvwà mwà kwikalaku bamupè bilàmbà, kàdi kabàyì mwà kumupà to. Bapicilapu benze ànu bu bàdì kabàyì bamòne mukùlumpè awu to. Ki Martin Munsantu kwimanayè mwaba awu e kucitàngila. Bàtu bàmbe ne uvwa . . .

²⁵⁷ Mùsàlaayi ne mùsàlaayi yònsò uvwa ne—uvwa ne muntu wa kwikala kumulaabila bwanga ku bisàbaatà. Kàdi uvwa yèyè ùlaabila bèndè basadidi bwanga ku byàbò bisàbaatà.

Ki kukopolaye cinkutu cyèndè, kwangataye keele kàdi kucipandulula, pankaci, mu bipese bibidì, ne mwelè wèndè wà mvità. Kujìngilayè mukùlákàji mulòmbyanganyi wa kàà pa luse awu mu cyòci aci, wàmbe ne: “Twètù bònsò bàbìdì tudi mwà kushààla ne mwoyi.”

Kwalukilaye kumbèlu e kudyelaye mu bulààlu. Mulààle mwaba awu, wèla meeji mùvwà mukùlumpè awu mwase

Ndi ndyùmvwà ne, bundù kúndì mèmè mwine. Mèmè's nkààvwà pabwìpì ne kubàbenga, bwalu kabàvwà baswè kuntèèleja to. Ndi ndyùmvwà ànu mwà kunyingalala's. Ne ndi mene munyingalale. Nwamònu anyì?

²⁶² Mònaayi. Bìvwà bakwàbò bèèla meeji nànsha biikàle binganyi, nsòmbelu wa mùshindù ewu ngudi mukùmbànyìne Èvànjeelìyò.

Mpindyewu nkàadi njikija.

²⁶³ Muntu mubanji awu, ànu mùdì bààbùngì bàà kutùdì leelù ewu, mbakàngile Dìyì dyà Mwoyi ciibi ne badibenge, ne bashàale cidimba cyà èkèleeziyà; ne tukàadi baleeje nsòmbelu, udi ujaadika mu Bible ne, ùvwà kàyì mukùmbànyìne Èvànjeelìyò uvwayè mulòmbiibwe bwà kwakidila awu to. Ncyà bushùwà anyì? Mmunyi mùdì Èvànjeelìyò mufwànyìne kuteemena mu bukènkè bubwìcidile mùshindù awu, bùvila bukolè bwà Nzambì?

²⁶⁴ Mpindyewu, mùshindù ùmwèpelè wà kwikala ne nsòmbelu mukùmbànyìne, ngwà kulekela Kilistò ne Dìyì Dyèndè (bwalu, Yèyè ùdì Dìyì) bìDileeja mu bupwàngàne bwònsò mu wèwè too ne pàashindikà Nzambì cidìYe mwàmbe mu Dìyì. Bwalu, Kilistò wàkafwà bwà Yèyè kuDileeja kumpàla kwà Nzambì, bu Mulàmbù. Ne Wòwò awu wàkaalukila mu mmwènekelu wa Nyumà Mwìmpè, bwà kuDileejila mu bantu Bèndè, bwà kutùngunuka ne mudimu Wèndè; mwikale ùDileejila mu wèwè, bwà kuuja Dìyì Dyèndè dilaya mu matùkù àciwà alwa aa.

Bu mwàkumvwà Yone Mubàtiji, pàakumvwàye ne Kilistò mmulwè. Ki Kilistò kupàtuka kàdì kubwela mu màyi. Ki Yone kwambayè ne: “Mònaayi Mwànà wa mùkòòkò wà Nzambì.”

Muntu mukwàbò nànsha umwe kààkaCimòna to. Kàdì yèyè wàkaCimòna, Bukènkè bwàkatùùlukà mu Dyulu abu, bwènze bu nkuci. Ne Dìyì dyàmbe ne: “Ewu udi Mwan'Ànyì munanga ùndì nsankila bwà kusòmbela munda Mwèndè.” WàkaBùmòna bùlwa.

Ki Yesù kupàtuka e kubwela mu màyi, Emanuwèlè, kumpàla kwà mu—muyiishi uvwabò bacinkila ne muumishi wa maalu awu. KupàtukaYè e kubwela mu màyi, kumpàla kwà bantu, wàmbe ne: “Ndi muswè kubàtijiibwa kùdì wèwè.”

²⁶⁵ Yone kwamba ne: “Mukalenge, mèmè's ngudi ukèngela bwà kubàtijiibwa kùdì Wèwè. Udi Wèwè ulwa kùndì bwà cinyì?” Mèsù à bònsò bàbìdì kusambakeenawù, mupròfetà ne Nzambì wèndè. Amen. Nudikù bafwànyìne. . . Ndi. . . Mèmè ewu ncyènakù mufwànyìne kunanga bwà kwikala mwimàne mbandila aci anyì? Kumònakù lutàngilu lwà dísù dikolesha, lwà dibànkameenangana lwà Yone alu ne ntèmà lùpetangana ne lutàngilu lwà dísù dikolesha, lwà dibànkameenangana lwà Yesù alu; biikale bânà bàà bààkaakù mukùlù ne mwakùnyì, mu mubidi emu.

266 Yesù kwambayè ne: “Yone, twàla bwà biikale nàнку bwà mpindyewu, bwalu bidi bikèngela twètù kwenza nàнку. Twètù’s ki Mukenji wà dībà edi. Bidi bikèngela bwà twètù kukùmbaja bwakàne bwònsò.”

267 Yone kudyàmbidilayè ne: “Èyowà, Yèyè’s ki Mulàmbù. Bikèngela Mulàmbù ùsukudiibwe kumpàla kwà Wòwò kufidiibwa.” Pa dībà adi kwambayè ne: “Seemènaaku apa.” Ki kuMubàtiizaye. Amen. Mu ngaakwilù mukwàbò ne: “Bidi bikèngela bwà twètù kukùmbaja bwakàne bwònsò.”

Yesù, mumanyè ne muntu awu uvwa mulelèlè, kwambaYè ne: “Kacya kakùtu kwanji kwikala muntu mulela kùdi mukàji, bu yèyè nànsha. Yèyè mmutàmbe ne mupròfetà; nwènù mwà kwakidila bwalu ebu, yèyè ewu mmutàmbe ne mupròfetà.” Ne Yesù, mutàngile mu mwoyi wèndè, ne mumanyè ciine aci. Mwanààbò menemene wa mamwèndè mukùlù utwilangana Nèndè mwaba awu, mpàla ne mpàla.

268 Yone kwambayè ne: “Mukalenge, mèmè ngudi ukèngela bwà kubàtijiibwa kùdi Wèwè. Kàdi bwà cinyi Wèwè udi ulwa kùndi mèmè?”

269 Kwàmbayè ne: “Twàla biikale nàнку awu, Yone. Kàdi, vùlukà ne, bidi bikèngela bwà twètù kukùmbaja cyònsò cìdì Nzambì mulaye. Ne Mèmè’s ki Mulàmbù. Bikèngela Mèmè kusukudiibwa kumpàla kwà kufidiibwa.” Kaa, ekèlekèle! Ekèlekèle!

270 Nènku, leelù ewu, pàdi Makènkè à dilòlò àteema apa, pàdiku kakùyì muntu ne lungènyi lwèndè mu lwòlò udi kàyì mwà kwambaku (mulongi wa Bible kanà yònsò, ukààdikù mutàngile mu Bible emu, mmumanyè) ne edi nditùkù dyà ndekeelu to. Pa nàнку, bidi bikèngela twètù kuumuka ku bimanu binène ebi kumata panshì, anyi kuumuka ku bintu ebi, ne kubwela mu bwakàne bwà Yesù Kilistò mu ditùkù dyà ndekeelu edi, ne kutwibwa Citampì cyà Nzambì kumpàla kwà dyabùlù kutùtwayè cimanyinu cyà nyama wa lwonji. Kaa, ekèlekèle. Èyowà’s.

271 Lòmba Nzambì bwà àlekelè Bukènkè bwà ditùkù edi bujuuke munda mwèbè, bwà wìkale musadidi wa butùmike wa Nzambì. Ne pashìshe ùlekelè mamuma à Nyumà àshaalè kashidi mu nsòmbelu wèbè. Nènku nsòmbelu mukùmbànyine Èvànjeeliyò nyèyè awu.

272 Anyishaayi ngàmbè bwalu ebu, bwà kujikija. Mùshindù ùmwèpelè, mùshindù ùmwèpelè wùdi mwà kwikala ne nsòmbelu mukùmbànyine Èvànjeeliyò, nkulekela Èvànjeeliyò Yèyè mwine, kantu ne kantu kàà Èvànjeeliyò, kabwele munda mwèbè ne kàleejè milayi Yèndè, kayìvwijè mishindikiiibwe. Lekèlè Nzambì ìkalè ne mwoyi munda mwèbè, bwà kushindikika milayi yà ditùkù edi.

Ànu mwàkambà Yone, mùvwà Yesù mwambile Yone ne: “Twàla bwà bìikalè nàнку, Yone. Ncyà bushùwà. Kàdi twètù’s ki baamisànjeelà bàà ditùkù edi, nènku’s bidi bikèngela bwà twètù kukùmbaja bwakàne bwònsò.”

nènku pìikalàbi ne twètù ki beena Kilistò bàà ditùkù edi, twàkidilàayi Yesù Kilistò mu myoyi yètù. Ne Yèyè ùdi Dìyi. Kuvidi kantu nànsha kàmwè kàà ku Dyòdi adi to. Ambà ne: “Didi Bulelèlà.” Ne ùDiteèke mu mwoyi wèbè, ùtàngile mamuma à Nyumà pa wèwè, ne ùkùmbaje mulayi wònsò ùtùYe mwenze mu Bible. Nzambi mmuswè kukùmbaja Dìyi Dyèndè, ne Yèyè kàtu ne bìngà byanza to ànu byànyi mèmè ebi ne byèbè wèwè abi. Kàtu ne mângà mèsù to ànu àànyi mèmè aa ne èbè wèwè awu. Kàtu ne lùngà ludimi to ànu lwànyi mèmè elu ne lwèbè wèwè alu. “Mèmè ndi Mwonji wà mvinyò. Nwènù nudi matàmbà.” Matàmbà ngàdi àkwàma bimuma. Mwonji wà mvinyò ngùdi ùfila bukolè kùdi ditàmbà. Ki nsömbelu udi mukùmbànyine nyèyè awu.

²⁷³ Disambila dyànyi dìdi, bwà aba bàdi ku cisanji anyi mu . . . mu citupà cyà buloba cidi mikàbà yikafika, ne aba bàdi apa aba: Nzambi wa ngàsà yònsò, wa mu Dyulu, àkenkeshèku Nyumà Mwímpè Wendè mubènesha pa twètù bònsò, bwà ne twètù, kubangila dilòlò edi, kubangila apa, twamòna mwà kwikala ne nsömbelu udi Nzambi mufwànyine kwamba ne: “Ndi musànkishiibwe be. Bwelàaku mu masànkà à Cyendèlèlèlè àvwà makulongolwela kacya ku difùkà dyà dyulu ne buloba.” Nzambi wa mu Dyulu àtumèku mabènesha Èndè pa nwènù bònsò.

²⁷⁴ Ndi ndòmba bwà Nzambi ànùbènéshèku nwènù bakàji, dilòlò edi, nwènù bàdi ne nsukì mípì abu, mu mùshindù wa nwènù kumòna, ne kuseemena kule ne mmwènenu wa cyena leelù wa ditùkù edi ewu, ne numanya ne Bible ùdi wàmba ne kabìwba bikèngela bwà nwènù kwenza nàнку to. Ne pawikalà mupìile bwà divwàla dyà bilàmbà byà bisalula masandi, bwà Nzambi wa mu Dyulu àpòngolweleku ngàsà Wèndè mu mwoyi wèbè, bwà kwikadi wacyènzakù kàbidì to kashidi kèèbè, bwà kwikadi mupìile kàbidì ku cintu bu nàнку nànsha. Nyumà Mwímpè àkukàngwileku cyòci aci ne àkuleejèci. Swàku, wèwè udi kùyì ne dibatiiza dyà Nyumà Mwímpè awu . . .

²⁷⁵ Nwènù balùme bàdi ne bakàji bèènu, bìikale nubàlekela bashàala bamfùmù bàà nzùbu ne banùpulumuna eku ne eku abu, Nzambi wa mu Dyulu àswèkù ànùpèèshè ngàsà bwà kushimika dikàsà dyènù panshi ne kwaluja cyàkàbidì mukàji awu ku lungènyi lwèndè mu lwòlò, èyo, ne àmanyè ne awu mwaba ngwèbè wèwè mu Kilistò. Mpindyewu, kí nne wikalè bu mfùmù wa cikisu to, kàdi wèwè udi mutù wà nzùbu. Wavùluka ne, mukàji kàvwà nànsha mu difùkà dyà ku cibangidilu to. Yèyè udi ànu cintu cyangata ku wèwè, cidi Nzambi mufile, mukupèèshe wèwè, bwà kwikalayè ùkubèja, bwà kwikalayè ùlama bilàmbà byèbè bitòoke ne kwikala ukwipikila byàkudyà, ne bikwàbò. Mukàji kí mmfùmùwèbè wa cimbàmbilà nànsha.

²⁷⁶ Nwènú bakàjì bàà beena Àmèrikè nutu nwátwa eku nwátwa eku ne mupimbu wà bilaabu kwísù, ne dyùlù dyela muulu, bu mvùla mwà kulòka, mbifwànyine kukutukija mu màyi, kàdi kubanga kwela meeji mùdi mfùmù wà cimbàmbilà wa mùshindù kampànda. Ki cyùdi, bwà cilùmaacikàjì's, kàdi kí mbwà mwànà wa balùme mulelèlè wa Nzambì to. Cyà bushùwà.

²⁷⁷ Nzambì ànùpèèshèku ngàsà nwènú balùme, bu bânà bàà balùme bàà Nzambì, bwà kwimanyikakù lukutukutu lwà mùshindù bu nàнку alu. Ncyà bushùwà. Ànùpèèshèku ngàsà, bwà kwimansha mfwankà ayi, kulekela ditèèleja dyà minèkù yà bundù ayi, lukutukutu lwònsò alu. Twikalàayi bânà balùme bàà Nzambì, bwà twamòna mwà kwikala ne nsòmbelu udi mukùmbànyine Èvànjeeliyò.

Bwà muntu kampànda ùpweka mu mùsèèsù, wàmbakù ne: “Ne kùtukù mwena Kilistò, ki yèyè uyààyà wàwa. Udi Nzambì ùDilejila munda mwèndè ki yèyè uyààyà wàwa, ne muntu wàwa's mmwena Kilistò mulelèlè, bwà piikalàku mwena Kilistò kacya. Udi wèwè mufwànyine kwela meeji mùdiye ne mmwènekèlu wa cyena kale. Yèyè's nyinàbànzà wa menemene.” Ki bwalu mbwòbù abu's.

²⁷⁸ Ikàla mwena Kilistò wa bamanyè ne ngwà kweyemenyiibwa, bwalu twètù tudi beenyi pànwàpa. Pànwàpa kí n'Kwètù to. Kwètù nku Dyulu. Twètù tudi bânà bàà balùme ne bàà bakàjì bàà Mfùmù kampànda, bàà Mfùmù *awu*. Twikalàayi ne nsòmbel- . . . twènzàayi bwà ne nsòmbelu wètù ikalè nsò—nsòmbelu mumanya ne ngwà kweyemenyiibwa. Twikalàayi ne nsòmbel- . . . nsòmbelu wìkala mwà kutwà mushinga cintu citùdi twamba ne ki citùdi aci: mwena Kilistò. Kàdi pawikalà kùyì mwà kwikala ne nsòmbelu wa mùshindù awu to, nàнку ùlèkèlè kubìkidiibwa ne udi mwena Kilistò, bwalu udi wèwè ànu wela bundù pa Kiipàcilà kiine.

²⁷⁹ Twasàkidilaayi, bakwètù, bwà dilòòlò edi dyà luuya lukolè, kacya nwasòmba mwab'ewu. Ndi ne dyeyemena ne kakwàkwikala nànsha umwe wa kunùdi wajìmina to, mu Ditùkù adi. Ndi—ndi—ndi ne dyeyemena ne nwènú ne mémè, bònsò pàmwè, netùpetè ngàsà kumpàla kwà Nzambì, bwà ngaamònakù mwà kwimanyina misangu yònsò ànu cìdi Bulelèlè aci, ncìyikù mwà kunùtapa ku mwoyi to, kàdi kabìyikù byà kwikala kunulaminyina bulelèlè to. Nwamònu anyi? Mémè mufwànyine kwenza nàнку, ncyèna mufwànyine kwikala taatù wa mùshindù mujaalàme to, bu mémè mwà kulekela wanyì mwànà wenza cintu kanà cyònsò nàka. Nèmmulongòlòlè. Dinanga kanà dyònsò edi nedyènzè nàнку. Dinanga mudimu wàdi nkulongolola. Ndi muvùlùke mùvwà mumfùndile kabèji aku, ditùkù adi, Pat. S'ncidi ànu naakù. Nèнку dinanga mudimu wàdi nkulongolola. Ki mùdi Bible mwàmbe. Nèнку piikalàdi kadiyì dijaalame to, ki bwà cinyi Nzambì ùtu utùlongolola. Mmutùangè.

²⁸⁰ Twikalààyi kù ne nsömbelu, kubangila ku mpindyewu, udi mukùmbànyine, ne kalolo ne musànggeelu. Kwikadiku ucyùka, wamba ne: “Èè, Nzambi àbèneshiibwè, ndi mumanyè ne mukàjì awu mmuMupetè. Yèyè’s ùwà mwakùle mu myakulu. Ùwà mujè maja mu Nyumà.” Abi mbîmpè. Kàdi piikalayè kàyì ne mamuma à Nyumà to, Nyumà kênàmù to. Yèyè ùdi ànu ùtentula disaluka dyà mùshindù kampànda, anyì cintu kampànda, bwalu Nyumà Mwîmpè ùdi mwà kwikala ne mwoyi ànu ku nsömbelu wa mamuma à Nyumà. Ki mùshindù ùmwèpelè ùdiYe mwà kwenza ngwôwò awu.

²⁸¹ Nzambi ànùbènèshè. Twînyikààyaakù mitù yètù, bwà katanci kakesè cyanààna.

Nzambi udi mupòngòlole Bukènkè Bwèndè mu ditùkù dyà ndekeelu edi awu...Bwòbò abu bwikalè butèèkîibwe mwab’ewu kumpàla kwànyì, bwà Bible Wendè, ne fòtò wa Banjèlò aba, Bukènkè bùdi kabùyì buumvwika ebu mu mmwènekèlu wà cipaapu cyà musàkà, cìdi nànsha beena maalu à mamanya kabàyìku bamanyè ne Bwòbò abu mbufikè mwab’ewu bìshi to, kabèènakù mwà kuBuumvwija to. Kàdi, Taatù, bwà twètù kaayì tudi ne kusàkidila. Wèwè ukààwà mutwàmbile twètù, ngondo ne ngondo kumpàla kwà kwenzekaci, nènku tudi ne disàkidila Kùdì.

²⁸² Swàku bwà bantu, bàdì babìkidiibwa ku Dìna Dyèbè abu, buumuke ku mpèkaatù, dilòòlò edi, Mukalenge, ku bupidyà. Swàku, bu mùdìbi ne...Byàkèngedi bwà ngàakulè muumishe maalu ndwishangana ne bânà bèètù bàà bakàjì, kabìyì ne mbwalu ncyèna mubanange to, Mukalenge, kàdi ncyèna muswè kumòna dyabùlù ùbàjìngila mu mùshindù wà bàdishinda bafwà, dìmwè dyà ku matùkù àdì panshì aa to, kàdi kukèbabò bwà kutuutakeena Neebè mu ngiikàdilù wa mùshindù awu, paanyimà pàà bamanè kuumvwa Bulelèlà bwà Nzambi, mùshindù ewu. Swàku bwà kuumvwabò ne bàdì ne dibànzà kùdì ànu bòbò biine, bwà kuyabò kakenketa Mifùndu, ne kumòna ne ncyà bushùwà anyì. Pa dîbà adi bàye ku binù, ne meeji ònsò matòòke, bamba ne: “Nzambi, aci m’Bulelèlà anyì?” Pa dîbà adi ki cyònsò cìikalà ne musinga, Mukalenge, piikalàbo ne meeji matòòke pa bwalu abu, bwalu Dîyì Dyèbè m’Bulelèlà.

²⁸³ Bantu nyèwù batùùle. Bààbúngì bàà kùdìbo, pàmwàpa, mbapètè maalu àdì mabàtápe ku mwoyi. Kàdi Nyumà wa Nzambi mmwakùle naabò, ki bòbò kusòmba bapùwe bwà kutèèlejabò. Dìbà dìdì dyènda dipita. Dìbà dikaadi dipite mu dilòòlò, ne dikaadi kàbidì dipite mu cikondo citùdì ne mwoyi eci. Dìbà dikaadi dyènda dibwela. Buloba bukaadi bwènda bupeta citaleela. Nzambi, mîdimà neyènzè katàtaaka, ne pashìishe Dilwa dyà Mukalenge, bwà kwangata Èkèleeziyà Wendè kuya nendè. Mùshindù mwine utùdì tuKusàkidila bwà bwalu ebu’s, Mukalenge!

284 Tudi tulòmba mpindyewu bwà Wèwè kubènesha muntu yònsò udi mu Bwikadi bwà Nzambi. Yònsò udi utèèleja mukàbà wà mèyi ewu, Mukalenge, mu nyùngùlukilu wa buloba bujimà, swàku àdisake kule ne twitàbàayi ne bintu byà kale abi, ne alwe akwacile Nzambi udi ne mwoyi mudimu, alwe èlèMu byèndè byònsò, ènzè mwàkenzà mukalenge-mukàji wa ku Sud awu. Yèyè wàkalwa, byàkamukèngela ngondo yisàtù bwà kufika kùvwà muntu kampànda uvwa uleeja mpàla wa Yesù Kilstò, anyi wa Nzambi wa mu Dyulu; Solomo. Yesù wàkamba ne: “Yèyè wàkalwa mufùmìne ku bitùpà byà kuleekùlè byà buloba, bwà kutèèleja lungènyi lwà Solomo, kàdi mònayyi ne udi mutàmbe Solomo bunène ùdi apa.” Ne twètù tudi bamanyè ne “udi mutàmbe Solomo bunène” ùdi mwaba ewu, Nyumà Mwìmpè munène Yèyè mwine ùdi mwaba ewu, mwikàle ùkwàcila mudimu mu bantu. Mùshindù mwine utùdi tuKusàkidila bwà bwalu ebu’s, Taatù. Ndi ndòmba dibènesha mpindyewu.

285 BènesHà mpaasàtà wetù munanga, Mwanèètù Neville. Mukalenge, pàndi—pàndi mmutàngila ne mvùluka midimu yèndè mikolè yà dinanga, mwoyi wànyi ùdi ànu utùpika’s. Ndi mumunange. Pa kumumòna mùshindù ùdiye ùkùba mukàjèndè ne bânà bèndè bakesè, ndi—ndi ndòmba, Nzambi, bwà Wèwè kumupa dikàndà. Umupè mwoyi mukolè. Umubènèshè bwà bikwàbò bidimu byàbùngì, byàbùngì byà mudimu, mu budimi bunène bwà dinowa mutùdi tusanganyibwa emu.

286 BènesHà bambi naanyi bàdi basòmbe mwab’ewu dilòdòlò edi aba. Bààbùngì bàà kùdìbo mbeenyi bafùmìne myaba yà kwà cyanàànà. Ndi ndòmba bwà Wèwè kwikala naabò kwine aku, Junie ne Mwanèètù Ruddell, ne bantu bàà mushinga mukolè bàà èkèleeziyà myanààbo ne èkèleeziyà ewu abu, miimane kacya ànu yàkwàta Bukènkè bwà Èvànjeeliyò mu bitùpà bishìilèshìilàngàne byà bimenga mu nyùngùlukilu mwònsò mwàmwa, bwà Bukènkè bùmwebùmwebè ebu, bàlwàngana mvità bwà bwalu Bwàbù. Twasàkidila bwà bantu abu, Mukalenge. Ubàkolèshèkù ku mwoyi. Ne ùbàpe ngàsà wa kutàmbabò mateeta manène ne bikwàbò bìdì bìlwa pa buloba bwà kuteeta beena Kilstò bònsò ebi.

287 Ondopaku babèèdi ne beena ntàtu, Mukalenge. Ikala neetù mu lumingu lùlwalwà elu mpindyewu. Utùpèku mwoyi mukolè. Swàkukù bwà tuumàleesònà tukesè ne tukòsòlòke, twà kàlaasà kàà Dyàlumingu twà mu ditùkù edi etu, katùumukukù mu mwoyi yàbò to. Swàku bwà bèèlanganèpu meeji, muunya ne bufùku. Wafilaku mabènesha aa, Taatù. Mu Dìnà dyà Yesù Kilstò, mmùndi ndòmba nùnkù. Amen.

288 Nudi baMunange anyi? [Disangisha didi dyàmba ne: “Amen.”—Muf.] Nudi baCítàbùùje anyi? [“Amen.”] Twìmbàayi cyàkàbìdì musambu wètù mulenga wa ne, “Ndi muMunange, ndi muMunange awu,” patùdi tudisanga bònsò pàmwebè apa. Mwanèètù wa bakàji Ungren ùdi penyì? Ùdi mwab’ewu anyi,

umwe wa kùdìbo, anyì mwanèètù wa bakàjì uvwa mwimbe pyàno awu, umwe wa ku bainábànzà mwab'ewu? Ncyèna mumòne pàdiye to. Èyo, nyèyè ewu, inábànzà udi apa ewu. Ncyà bushùwà.

²⁸⁹ Mvwa muswè, dilòlòlò edi, ne kaneemu kònsò, kàdi ncìvwa mumòne Mwanèètù wa balùme Ungren to. Mvwa muswè bwà yèyè àngimbilèku, dilòlòlò edi, *Wèwè Udi Munène's Wè!* Ngeela meeji ne mwanèètù awu ùkaadi mwalùkile kumbèlu. Nwamònu anyì? Mvwa muumvwe musambu awu mu dindà emu, mèmè kuwànyinsha ànu cyà bushùwà. Ekèlekèle, kaa, ekèlekèle! Mmushààle ànu wimba munda mwà mwoyi wànyì's. Nènku mvwa—mvwa—mvwa muswè kumuvmvwa wimba *Wèwè Udi Munène's Wè!*

²⁹⁰ Mpindyewu twimbaàyaaku *Ndi MuMunangè*, twètù bònsò, cyàpàmwè. Mpindyewu bwitààyi ànu kwìsù cyanàànà. Nènku twikalàayi baMweyèmène Yèyè mpindyewu, twamba ne: “Mukalenge, kwòkò kwikàle kaacintu kàà musunya aka munda mwànyì, ùkùmùshèku, ànu mpindyewu. Ùkùmùshè.” Ne wèwè, pambèlu, udi umvwa mukàbà wà mèyì ewu, paùdì umvwa musambu ewu, imbà neetù, dìbà adi, ànu mu nkwasà wèbè mene mùdì musòmbèle amu.

Piikalàbi ne cyà nàнку cìdikù, pawikalà mupìshìibwe kùdì Dìyì, pawikalà wela meeji ne Dyòdì adi kì n'Dìyì to, kenkètà Mifundu, ùmòne ne ní n'Cyà bushùwà. Ncikutàngila wèwè. Cìdi cyùmvwija Mwoyi anyì lufù.

Ne pashìishe patùdì twimba musambu ewu apa, kwòkò kwikale kaacintu kàà musunya mu nsòmbelu wèbè, kwènàku muswè bwà kwela cyanza cyèbè muulu, mu nkwasà wèbè amu anyì? Ambila bânà bèèbè ne mukàjèèbè bèlè byanza byàbò muulu, bananga bèèbè mu nyùngùlukilu wèbè amu. Imba *Ndi MuMunangè*, ne fila mwoyi wèbè kùdìYe. Amba ne: “Nkezùlèku, Mukalenge, ku bubì bwònsò.”

Patùdì twimba mpindyewu apa, tujuukilàayi kuulu.

Ndi muMunange, ndi . . .

Mukalenge Yesù, ndi ndòmba bwà Wèwè kwondopaku bantu, bìikalà mwà kwangata mishwala eyi pambidi pààbù aba. Ndi nyibènesha, mu Dìná dyà Yesù Kilistò. Amen.

Ne wàkampetela lupàndu
Pa mucì wà Kàlvaryò.

²⁹¹ Mpindyewu, mu dibènesha dinène edi! Tùngùnuka wèwè ànu ne kuwimba, mwanèètù wa bakàjì. Bwitààyi ànu kwìsù nwikale nwelangana meeji, mu kasunsa kàmwè mpindyewu. Tùsambilàayi, munda mwà mwoyi yètù ne: “Mukalenge Yesù, nkenkètèku. Ndi muKunange cyà bushùwà anyì? Wèwè utu mwàmbe ne: ‘Panwikalà baNnange, nenùlame mèyì Àànyì mamba. Panwikalà baNnange, nenùlamè Dìyì Dyànyì.’” Ne

pashiishe munda mwà mwoyi wèbè amu, ambà ne: “Mukalenge, swàku ndamèku Diyì Dyèbè. Swàku nDisokòke munda mwà mwoyi wànyì, bwà nciKwenzediku kàbìdì mpèkaatù to, mbwena kwamba ne, kubènga kwitabuuja cintu kanà cyònsò cyùdì Wèwè mwambe.”

²⁹² Mpindyewu patùdì twimba *Ndi MuMunangè* apa, tulabulanganeku ne muntu udi pabwìpì neetù ku cyanza. Olola ànu cyanza, wamba ne: “Nzambi àkubènèshè, mwanèètù wa balùme, anyì mwanèètù wa bakàjì.” Bitùlùlùbitùlùlù menemene mpindyewu.

“Ndi...” Nzambi àkubènèshè, mwanèètù. “Ndi...” Nzambi àkubènèshè, mwanèètù wanyì wa bakàjì. Nzambi àkubènèshè, mwanèètù wa bakàjì. Nzambi àkubènèshè. Nzambi àkubènèshè, mwanèètù wa bakàjì. “Ne wàkampet-...” Nzambi àkubènèshè, mwanèètù wanyì wa bakàjì. Nzambi àkubènèshè. Nzambi àkubènèshè. Nzambi àkubènèshè. “muci wà . . .-rìyò.”

²⁹³ Mpindyewu twèlààyi byanza byètù muulu kùdìYe.

Ndi—ndi muMunange
Bwalu . . .

Udi ne cintu kampànda, cikwàbò, cyùdì muswè kwenza anyì?
Ndi muswè bwà wèwè kutangalaja.

. . .mémè
Ne wàkampetela lupàndu
Pa mucì wà Kàlvaryò.

²⁹⁴ Nudi baMunange anyì? Kì mmulenga anyì? Ndi nsambidila muntu ne muntu wa kunùdì, bânà. Mbifwànyine kwikala ne dikwàcisha kaayi kùndì bwà kwimana kaaba aka bwà kwamba maalu aa piikalabì ne mémè, munda mwà mwoyi wànyì, ncìwà ngèèla meeji ne nebìnùkwàcishè? Pààbì, s’ndi mucyòke ne muzengele. Ncyèna nànsha ne bukolè bwà kwimana mwab’ewu to. Makàsà akaadi ànsaama. Ne bisabaata byànyì, ndi mwianemu too ne mûngààvu kukopakanamu, ne bikwàbò byònsò, mu mùshindù wa ne makàsà akaadi mangelze buzewu. Kàbìdì ndi mucyòke be! Ncicyèna kàbìdì mwànà mutekète to, to. Ne ndi muyiishèyìishe mayiisha à mèbà àsàtù anyì ànaayi, mwikale kàbìdì nsambidila babèèdì, biine abi nyaku muunya ne bufùkù. Cìndì mufwànyine kwikala mwimànyine mwine mwab’ewu ncinyì, bwà kubyènzà?

Nudi bamanyè ne, bidimu byònsò makumi àsàtù ebi, bu ne bìvwa mbwà dimanyika, mémè’s ntu nkaadi munyeemenyèème cyòcì aci. S’nutu bamanyè ne mémè ncitu ngàngata mfranga. Aci nudi bamanyè. Ncìtukù muyàngàte to . . .Mémè ewu nkaadikù munwàmbile cintu kampànda mu Dìna dyà Mukalenge kacyì cyenzèke anyì? S’nudi bamanyè ne aci ncyà bushùwà.

Ntu mununange. Dinanga dyà Nzambi ndìdì mu mwoyi wànyì bwà muntu ne muntu wa kunùdì. Mvwa mwà kujinga

ne...Mvwa mwà kujinga kushààla mwimàne kumpàla kwà Nzambì, ngàmbe ne: “Nzambì, swàku—swàku—swàku mbàkwàcisheku. Swàku—swàku ngènzèku *cikampànda*.” Ncyèna mwà kucyènza to. Bikèngela muntu ne muntu imanè pàa nkààyèndè. Nwamònu anyi?

²⁹⁵ Ndi—ndi—ndi ngiitabuujà ne tukàadi pa kubànda twètù bônso mpindyewu, òmwè dyà ku matùkù àdi panshi aa. Kàdi byòbì mwà kwenzeka ne túlaalè tulù kumpàla kwà cikondo aci, mèmè mwangàciibwe kunùdi, vùlukàayi ne, nèntuutakeenè nènu Mwàmwa. Ndi mumanye ne Mwàmwa mùdikù. Bikèenà-kumòna biine bitu binwàmbile maalu ónsò abi, bu mùvwàbi bipwàngàne, mbyenzèke ànu mùvwàYe mubyámbe amu. Muntu nànsha umwe, mu bidimu byònsò ebi, kèna mwà kwambakù kaaba aka ne ntu munwàmbile cintu kampànda civwà mwà kuula kàdi kaciyi cyùle to. Buloba bujimà, mbumanyè aci. Kacya kanùtukù banji kumòna pa cibumbà cyà ku cyambilu apa, citùbo bambile muntu ne muntu kaciyi Bulelèlà bwà menemene to. Nwamònu anyi? Bitu ànu byùle misangu yònsò. Nzambì umweumwe awu ùtu mumpè mùshindù wà kutàngila dyàmwàmwa dyà ridó wa cikondo. Mèmè kumòna bakàji abu ne balùme bàngèla mabòko kunshìngù bàanguupukila, bàmbe ne: “Kaa, Mwanèètù Branham.”

²⁹⁶ Ncyèna—ncyèna ànu mwà kusòmba to. Nènkù, mèmè mucyòke, nyààya, nànsha bishi. Nyimà ùdi ùnsaama. Ne mèmè mwine, ditùkù dyònsò dìcyacyà diilililà edi. . . Nkàadi—nkàadi—nkàadi ne bidimu makumi àtaanu ne binaayi. Nudi bamanyè ne, udi usàkidila ànu dikènga dikwàbò ditùkù dyònsò dìcyacyà diilililà edi.

Disambila dyànyì didi ne: “Nzambì, ùdamèku ne mutù ku nshìngù. Ùdamèku ne mutù ku nshìngù, bwà mèmè kuyiisha Dìyì, kushààla mwimàne pa Bulelèlà abu, too ne pàngààmònà mwanàànyì wa balùme, Joseph, mufike bukolè bukumbàne, ne mùle tètè ne Nyumà Mwìmpè; ndi mwà kwangata Bible mukùlàkàji ukàadi musùnsùke ewu, kumutèèkaYe mu cyanza, kwamba ne: ‘Mwanàànyì wa balùmè, tùngùnukà Nendè too ne kundekeelu kwà mwoyi wèbè. KuMudìidikù cibàngà to.’”

²⁹⁷ Mvwa ndyàmbedila ne pàmwàpa Billy ùvwa mwà kuyiisha Èvànjeeliyò. Nzambì kàtukù mumubiikile yèyè to.


Kàdi ndi ngiitabuujà ne, Joseph yèyè, nànsha mùcidiku kambodyoto kàa maalu makolè emu, ndi ngiitabuujà ne Nzambì mmumubiikile. Ki bwà cinyì bàmà nendè kabàtukù mwà kupetangana nendè to, yèyè mmulombodi. Nènkù ndi—ndi—ndi mumanyè ne Nzambì mmumubiikile. Ndi muswè kwikala mmulongesha mu njila wa Dìyì, njila wa Dìyì dyà Mukalenge, bwà kiikadi wàlwa kulekela Dìyì adi to. Ndi muswè kudyènzèlaci, mèmè mwine, bu Nzambì mwà kwanyisha. Nènkù pàngìikalà nkaadi mukùlàkàje ne mukasòmbèle lwà

paanyimà, ne mwikalè mwà kumumòna kwàka, mwimane mu cyambilu, wamba ne: “Èvànjeeliyò umweumwe ewu, papa wanyi wàkamwimanyina. Nyăwù musòmbe mwaba wàwa, mukùlákàje ne mucibùlùke, dilòòlò edi. Kàdi ndi muswè kwangata kaaba kèndè ne mvwale bisàbaatà byèndè, ngìmanè mwaba wàwa.”

²⁹⁸ Dìbà adi nêmbândishè mèsù muulu, ngàmbe ne: “Mukalenge, lekèlaaku musadidi Wêbè àyè byàndi mu ditalala.” Ki cìndi muswè kumòna, bikolè menemene. Too ne pààlwà diine dîbà adi. . .

²⁹⁹ Kàdi amba túng bu mêmè mwà kujuuka mu lukòngò lukwàbò? Ncyêna mwà kujuuka to. Bikèngela ndwe ne elu lukòngò. Bikèngela ngìmanè neenù. Nwênù ki bàdi bàkèngela mêmè kwimanyina, ne kunùfidila mulubu kùdi Nzambi, wà Èvànjeeliyò ûndi muiishe. Nudi nwela meeji ne ndi mufwànyine kwimana kaaba aka kàdi kukèba bwà kunùpàmbula, nnupàtula mu Cintu kampànda cîmvwà ngeelela meeji ne ki cyà bushùwà anyi? S’ndi ànu mufwànyine kunùkolesha ku mwoyi bwà kuya kaCyènta. Kàdi ndi mumanyè ne, pàdici cyà mashimi, ndi muswè kunùpàtulamù, kunùbweja mu cìdi cyà bushùwà. Bulelèlè, byùmukile mu mwoyi wànyì, Nzambi ùdi ùmfidila bujaadiki ne, ndi munùnange, muntu ne muntu, ne dinanga dilelèlè, dyà Nzambi ne dyà bwena Kilistò. Nzambi ànùbènèshè. Nwànsambidilaayikù.

³⁰⁰ Ncyêna mumanyè cìdi matùkù àànyì àcilwalwà mandamine to, kàdi ndi mumanyè Yèyè udi mulame matùkù àànyì àcilwalwà awu, nànkù pa cyôci aci ki pàndi mujaamine.

³⁰¹ Ndi ngaaluja cyambilu eci, kùdi muntu ûntù nendè dyeyemena ditàmbe kutumbuka, bu musadidi wa Yesù Kilistò, mpaasàtà wetù, Mwanèètù Neville. 

NSÓMBELU WEBÈ MMUKÛMBÀNYÌNE ÈVÀNJEELIYÒ ANYÌ? LUA63-0630E
(Is Your Life Worthy Of The Gospel?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 30 a ngondo mwisambombo, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org